

# Ahabw'enki Tutari Kigombe Ky'ediini?

Jeffersonville, Indiana, USA

Okwamwenda 27, 1958

1 Naatunga omugisha okugaruka hanu aha kituuti ogundi murundi, bwanyima, ninteebereza, haihi y'amneezi nk'ashatu ntariho. Zaakaamugye zigumiirwe, hamwe naanye. Oo, nduhuukireho, hati, n'obu kiraabe, kandi nooyehurira munonga nk'orikwenda kugaruka kutaaha omu kuheereza. Kandi nituteekateeka hati kutandika oruteerane hanu hanu omuri Tabirinaakuru egi, saabiiti egi erikwija, Orwakashatu oru orurikwija nyekiro. Kandi Ruhanga ku araakunde, nyine nk'oku . . . Mukama andaganiise obuheereza busya kandi obw'omuringo gw'omutaano. Kandi ku Araasiime kukora atyo, nyine amatsiko kutandika obwo-obwo buheereza bw'omuringo musya saabiiti egi erikwija, hanu omuri Tabirinaakuru omurundi gw'okubanza.

Kandi nabwo, tiinyine nteerane ezitebeekanisiibwe, kureka omuri Australia hamwe na New Zealand, omu kwezi Kwokubanza oku okurikwija. Reero bwanyima Ow'eishe-emwe Osborn naashaba oruteerane rwa hamwe oru ndi nk'owaamuraganiise hanu obwire obuhingwire, omuri Tulsa, kwonka bwanyimaho, beitu nabwo orwo titukaruhame.

2 Buzima kibaire kirungi, Ow'eishe-emwe Jeffreys, kukukwata omu ngaro enyima hanu, kandi n'okuhurira mutabani waawe naayeshongora ekyeshongoro ekyo, naiwe orikuteera enanga. Ekyo ninkikunda, omwana na ishe. Ekyo timurikukikunda? "Manyiiza omwana omuhanda ogu ashemereire kutoora." Ekyo kihikire, Omw. Guenther, no-noomanya ngu ekyo kihikire, imwe mwembi. "Manyiiza omwana omuhanda ogu ashemereire kutoora, kandi n'obu arikura tarigurugamu." Kandi ago n'amazima. Nihabaasa kubaho obwire obu yaakubaasa kugurugamu, kwonka gwo tigurimurugamu. Mwareeba? Gurya-guryaguma nawe obutoosha. Okwo kwegyesibwa okw'okubanza kandi na byona ebi yaatendekirwe kukora, buzima bi-biryaguma nawe. Hati, eki ni . . .

3 Naabugana Ow'eishe-emwe Jeffreys aheeru kuriya, naagira nti, "Ow'eishe-emwe Jeffreys . . ." Naateekateeka, noomanya, burijo nshemererwa kureeba ow'eishe-emwe mugyenzi wangye weena yaija kututaayaayira, kwonka ekiro ekyo eki ow'eishe-emwe arikwija kutaayaaya! Eki n'ekiro ky'abantu abateeranira omuri Tabirinaakuru, oruteerane oru rutakatandikire. Eki nikyo kiro . . . Nitwenda kukwata ekiro eki, na nyencakare akasheeshe, na nyencakare ekiro, turi omu bi turikwikiriza hanu omuri Tabirinaakuru, ku-kubigarukamu ogundi murundi. Twine enyikiriza ezitari z'obutoosha buzima, ez'omutaano munonga, kwonka omu muringo gumwe nari ogundi nituzishanga omuri Baiburi egi. Nizireebeka kuba zirimu kurungi.

4 Kandi hati ku haakuba harimu ow'eishe-emwe omugyenzi nari ow'eishe-emwe kazi, ow'ekigombe ky'ediini nanka, nari-nari orikuhanisa, ashutamimu kuhurikiza ebi ekiro eki, nitwenda kukumanyisa ngu nootangirirwa buzima. Waareeba, buzima kwo nootangirirwa. Kwonka hati ni . . . Oo. Kandi eki nitukigumya munonga. N'ahabw'ekyo ku kiraareebeye ngu torikwikirizana nakyo, mpaho, hati, okore nk'oku nkora naaba nindya shumbuusha erimu enyama. Kandi naaba nindya shumbuusha erimu enyama, ei ndikukunda munonga, burijo, naaba ni . . . Naaba nindya shumbuusha erimu enyama, ku ndikubuganamu enjuma, tindikunaga shumbuusha egzo. Ni-ninaga enjuma reero ngumizamu nindya shumbuusha. N'ahabw'ekyo, nari nk'okurya enyama y'enkoko. Hati, mwena nimukunda enyama y'enkoko, mwareeba. Kandi ku orikuruma eigufa, torikureka, nooyetoroora eigufa kandi ogumizamu noorya enyama y'enkoko. Mbwenu, mukore mutyo ekiro eki, eki ndiyo ningamba hanu, no . . . ku oraagire eki waahurira, ogire oti, "Hati, ti-tindi . . . nshutami omuri eki, nk'Enyegyesa nkye y'ekanisa, omuri ezi nteerane ishatu eziraakurateho. Bari nk'abarikugaruka omu bi-bi barikwikiriza, nibabigarukamu."

5 Kandi omuringo gwonka ogu orikubaasa kutuma omuntu haihi Yaakikiriza, n'okukihamisiriza munonga kuhitsya obu baraamanye ngu Ekyo nikyo kintu ekihikire. Ogwo nigwo muringo gwonka ogu orikubaasa kutuma kyakwata. Nka munywani wangye, Omw. Woods ou ntuura nawe; ku oraateere omusumaari gukataahamu ekicweka, reero orubaaho rwona rutahame, omuyaga niguza kurugwisa ahansi juba juba. Kwonka nooteekwa kuguteera gutaahemu, guhamire kimwe. N'ahabw'ekyo hati eki ku ndaakigumiisize kimwe hamwe na hamwe, ahariimwe abagyenyi ekiro eki abashutami muhurikiize, tindi-tindikugyezaho kubateeza entsibo. Ningyezaho kuhamisiriza ekanisa egi ebi turikwikiriza. Boona abaayetegyereza ekyo kurungi buzima hati, bagire bati, "Amiina." [Abateeraine baagira bati "Amiina." -Omur.] Ni kirungi. Ekyo-ekyo kiri gye. Kandi eki naaza kukiha omu mikono yangye. Reero-bwanyima e . . . Nibakikwata aha rutambi rw'amaraka, n'ebindi nk'ebyo, ngu bwanyima, ku baakwenda kumanya ebi turikwikiriza obwire obwo n'ebi twemerereire buzima, kandi n'omusingye ogu tuhamiireho, entambi z'amaraka ezi niziija kubishoboorora. Kandi eki nitukikora rimwe na rimwe, 'habw'okuba hariho abantu basya abataahamu kandi-kandi nitugumizamu. Hati titurikubaasa kuraba omu Nyegyesa zoona z'ekanisa, kureka zimwe ahari ezo ezi turikwenda ku-kugambaho. Kandi hati, Orwakashatu nyekiro, n'obu kiraabe, nizitandika . . .

6 Hati, Orwokubanza n'Orwakabiri, ningyenda, kushaba, kweteekatekyera saaviisi y'okutamba endwara. Kandi nimubaasa kuteera amasimu, nari kyona eki muraabe nimwenda kukora, reero mureete omuntu weena ou murikwenda kureeta, ahabw'oruteerane oru orurikwija. Kandi mubagambire bataija baine obwira hati, bataija, bakagira bati, "Mbwenu, hati naaza kwiruka ntaahemu nshabirwe, ekiro eki. Reero nyencakare omu kiro, byona . . ." Ekyo otakikora. Taahamu ohurikize omwanya mukye, 'habw'okuba nitwenda kwetwara tushoboorore Ekigambo ekyo kurungi munonga kugira ngu Sitaane atabona nangwa n'akacweka kamwe kakye k'omwanya gw'okwehigiramu. Reero ku oraarekye okwikiriza kwave kukahika aha muheru gwakwo, kuhitsya obu oraatandikye kwikiriza, bwanyima okareka omuntu waawe w'omunda akatandika kukora, obwo okwikiriza kwa

Ruhanga nikuza kukishagika. Reero nooza kugyendera kimwe ogumizemu. Mwareeba?

Habw'okuba, okwikiriza kwawe tikukaagasha kihango munonga; omuntu waawe ow'omunda naateekwa kutoora ei okwikiriza kwawe kurikutoora, reero bwanyima okwikiriza kwa Ruhanga kwije enyima kubihamye byona. Mwareeba? Kwonka, ku kuraabe kuri okwikiriza kwawe okurikugira kuti, "Oo, eego, naakitunga hati hati!" Kandi nangwa n'omuntu waawe w'omunda, akagaruka enyima hanu, akagira ati, "Hoona nikiza kukora ahariinye?" Tikiraakikore, aho aho. Waareeba? N'ahabw'ekyo nitwenda ngu egi ebe saaviisi ehikire y'okutamba endwara. Kandi ntakataahize omuntu weena omu bishengye, n'ebindi nk'ebyo, ahabw'okutambirwa, nari zaasaaviiis nsya ezi, buzima niinyenda ngu beetegyereze ekirikubataasyamu. N'ahabw'ekyo mwijukye, kandi mwije mututaayaayire, nitwija kushemererwa kuba naimwe.

7 Hati mwijukye, hati, omu kasheeshe, nituza kugumizamu n'Enyegyesa y'ekanisa. Kandi na nyencakare omu kiro nikyo kimwe. Hati nimutangirirwa okwija, kandi omuntu weena naabaasa kwija. Burijo tushemererwa kureeba omuntu weena. Kwonka hati eki, ekiro eki, kyorekyereirwe abantu ba tabirinaakuru egi hanu, ababakuriire omuri egi Nyegyesa. Ahakuba, omu kubuurira kw'aheeru, omu kubuurira engiri kw'aheeru, tutoorana Enyegyesa z'Ebyahandiikirwe z'okubandizaho kubuurira Engiri y'aheeru. Kwonka hanu omuri tabirinaakuru, twine ebiteekateeko byaitu hamwe n'enyikiriza zaitu, nk'e-nk'e-nk'ekanisa, kandi ekyo nikyo turikuza kurabamu, ekiro eki.

Kandi tutakabiikwire Ekigambo Kye ekihairwe omugisha, nitubaasa kwinika emitwe yaitu tushabeho akaanya kakye.

8 Ruhanga ow'Obushoborozi bwona kandi ow'amaani, Ou, ensi etakatandikire kwetooroora ahari atomu y'okubanza, Okaba ori Ruhanga. Tokahindukahoga na kakye. Kandi ku hariba hatakiriho za atomu z'okugikwatirira, kandi hatakiriho n'ensi y'okukwatirirwa, nabwo Oryaguma ori Ruhanga. Ori ow'obusingye bwona, kwiha iranaira. Niwe Ruhanga. Tokagirahoga butandikiro bw'amagara, kandi toine bugarukiro bw'amagara. Nikwo Origuma obutwire bwona. Kandi, Taata, Iwe ahabw'okuba otaine bugarukiro, kandi itwe twine obugarukiro, mbwenu nitushaba Embabazi Zaawe, Ai Ruhanga, turikumanya ngu ogu mwoyo gwaitu nigwija kutaaha omu Butahwaho, kuruga omu kyanga eki ky'okubara obwire, kutaaha omu Butahwaho. N'ahabw'ekyo, Mukama, turi hanu kushwijuma okujunwa kwaitu, kureeba oku twemereire omu maisho g'Ekigambo Kyaw, kandi n'okureeba oku turi omu bumanyi bwaitu. Tutwire amagara Agarikukuschemeza? Emwoyo yaitu neehamya Omwoyo Waawe? Kandi enyegyesa yaitu neehamya Baiburi egi? Kandi, Taata, ka tushwijume byombi, n'obwegyendesereza, omuri saaviisi ezi ishatu ezindi ezirkwija. Kitukorere, Mukama.

9 Heereza omugisha omuriisa hanu, abadiikoni, ababiiki, kandi n'abashomi boona, abantu abaija omu kanisa egi. Ebiro ebi mazire hanu, Mukama, hariho baingi, baingi munonga abu ntarikumanya nangwa n'amaziina gaabo, nari ei barikuruga, kwonka nimpamya ngu Noomanya ebirikubakwataho byona. Kandi turi hanu ahabw'egyo nshonga emwe, ekiro eki, Mukama, kukwatanisa hamwe omu Kigambo ekihandiikirwe. Otuhe Omwoyo Orikwera omu magara gaitu, kugira ngu tubaase kushutama twine obusingye, tutuurize, kandi n'omu kutiina Ruhanga, reero tushwijume amagara gaitu n'Ekigambo Kye. Kitukorere, Mukama.

Kandi omu kyombeko eki, ekiro eki, Mukama, harimu ab'eishe-emwe bagyenzi bangye b'enyikiriza ezitarikushushana z'e-z'ekanisa. Kandi, Mukama, ninsiima munonga kureeba bari hanu kukwatanisa naitwe. Obundi nitubaasa kutaikirizana aha ngyenderwaho nkye z'Enyegyesa. Kwonka omuri egyo ngyenderwaho emwe nkuru munonga, twemereire nk'ab'eishe-emwe abakwatanisiise hamwe omu rugamba. Ekyo, Ai Ruhanga, ka kyongyere amaani omu kukwatanisa kwaitu-kwaitu, kandi n'e . . . n'emirunga y'embabazi za Ruhanga na rukundo bitugumeho bikanye. Hati, nitumanya, Mukama, ngu ogu n'omurimo gw'amaani munonga gw'omuntu kukora, ahawb'okuba hanu twine nitugamba, ekiro eki, aha muheru gw'abantu abarikuza omu Butahwaho. N'ahabw'ekyo nitushaba ngu Omwoyo Orikwera ataahire kimwe omu Kigambo, reero Akishuuuru kandi Akitushoboororere, omu muringo Gwe, ebintu ebi Arikwenda ngu tumanye. Kituhe, Mukama. Kandi ishatu ezi . . . obwire bwa saaviisi ku burahwe, ninshaba ngu tuyende nk'ekanisa egarwirwemu amaani, ekwatanisiise hamwe, tutaire emitima yaitu n'ebigyendererwa byaitu byona hamwe, n'abanyarurembo bagyenzi baitu b'omu Bukama bwa Ruhanga, reero tuyende omu maisho nk'oku kitakabahoga.

10 Niinyenda Kukusiima, Mukama, hanu omu maisho g'ekanisa n'a-n'ag'abantu abari hanu, ku hati Ompaire saabiiti nyangi z'okuhuumura kurungi. Niinyehurira kurungi ekiro eki ahawb'Okubaho Kwawe n'emigisha Yaawe. Ai Ruhanga, nitushabira ow'eishe-emwe hanu, ow'eishe-emwe mugyenzi waitu orikuza eseeri y'amayanja, eifo okwo hare omuri ezo nsi z'omwirima, mbi, ei amagara ge gonyini gari omu kabi. Ai Mukama, ha omugisha Ow'eishe-emwe mugyenzi waitu Jeffreys yaaba naagyenda, na mutabani we, hamwe n'omukazi we, kandi omukanyise munonga. Ninshaba ngu ateho omuhanda omu mwirima okuhitsya obu Omushana gw'Engiri guraayakte omu myanya yoona. Tuhurile, Taata, ahakuba nitushaba eshaara egi omu Iziina rya Mukama Yesu, Omwana Waawe. Amiina.

11 Hati, ekiro eki, ninshoma omu Baiburi yangye nkye eya Scofield. Niho mpingwize emyaka makumi abiri n'etaano, enshumi nkye echingwire. Kandi nabwo nimbaasa kugishoma, kwonka egiirweho oruho munonga. N'ahabw'ekyo nguzire gaarubindi z'okushomesa naaba ninshoma, mbwenu naaza kureeba oku ziraakore ekiro eki, omurundi gwangye gw'okubanza.

Hati, nyine amashomo, nk'eri, eririkugira ngu, "Ekanisa neeteekwa . . ." Oo, ebintu bingi, ku turaabaase kubihikaho. Rimwe aharigo ni, "Ahabw'enki nitwetwa Ekanisa? Ahabw'enki tutari kigombe ky'ediini? Ahabw'enki-ahabw'enki nitwikiririza omu burinzi Obutahwaho bw'amagara g'omwikiririza? Ahabw'enki nitujuukirira abakazi ababuurizi? Ahabw'enki turikubatiza nitwibika abantu omu maizi? Kandi Ekanisa eryaraba omu Kubonabona?" Hamwe n'ago mashomo maingi hanu, ninteebereza nyine ikumi n'ataano nari ikumi na munaana, ahabw'ebiro bikye ebiraakurateho.

12 N'ahabw'ekyo nintekateeka, ekiro eki, eky'okubanza kya byona, kutandika na, nikireebeka Mukama ataire omu mutima gwangye eishomo eri, e . . . Ahabw'enki Tutari Kigombe Ky'Ediini? Enshonga erikutuma . . . Hati, titwine eki turikufa n'abandi bantu b'ebigombe by'amadiini. Titwine eki turikufa nabo, kwonka niinyenda kushoboorora ahabw'enki tutarikukwatanisa n'ekigombe ky'ediini kyona. Nkeemekyerwa omu kanisa nkye y'Ababaputisiti, nk'oku murikumanya. Kandi Baputisiti ti kigombe ky'ediini, ekaba etari kyo, okuhitsya ijweriho aha, mbwenu hati ehindukiire kimwe ekigombe ky'ediini nk'agandi goona. Kwonka, enshonga eyaatumire tutaaba ekigombe ky'ediini . . .

13 Hati, turi ekibiina. Turi ekibiina, ekihandiikirwe hanu omu-omu mbuga z'amateeka nk'ekibiina, ekibiina ky'abantu abeeteeraine hamwe kuramya Kristo, kwonka tituri omu kigombe ky'ediini. Tihariho n'omwe orikuza kututegyeka, nimureeba? Ti kigombe ky'ediini. N'e-n'ekibiina kwonka, okukwatanisa kw'Abakristaayo abaikiriza. Abantu baija hanu aha kanisa. Reero egi ehinduka ekanisa yaabo y'omuka ku barikuba nibenda kwija, obwire bwona bw'amagara gaabo.

14 Kandi nibabaasa kwija hanu bahakanise buri kintu eki turikubuurira. Ekyo tikiine nshonga buzima. Nabwo, obwire bwona waaba ori Omukristaayo, oine okukwatanisa, n'okukoragana nk'abandi boona. Mwareeba? Ku naakugira nti niinyikiririza omu kubatiza kw'okwibika omu maizi, kwonka iwe orikwikiririza omu kushukyeeraho amaizi, kandi okakuhamiraho buzima, nabwo tukaaguma turi nk'oku twakubaire turi ku twakubaire twembi nitwikirizana. Nitubaasa kutaikirizana, kutagira ebiteekateeko ebirikushushana. Kwonka waaba ori ow'eishe-emwe Omukristaayo nari ow'eishe-emwekazi, nootangirirwa kurungi, mwareeba, buri omwe.

15 N'ahabw'ekyo titwine ekigombe ky'ediini kyona, ahabw'okuba niinyikiririza ngu ebigrande by'amadiini nibitaanisamu obw'eishe-emwe. Bamwe omuribo nibagira bat, "Mpaho, titwine kakwate koona omuri okwo kusisiimuka. Okwo n'okusisiimuka kw'Abametsodisiti." "Mpaho, abo n'Ababaputisiti. Titwine . . . Turi Abametsodisiti. Titwine kakwate nakwo." Ow'eishe-emwe, Kristo ku araabe ari omu kusisiimuka okwo, twinetwena twine akakwate nakwo. Nituteekwa kuta . . . N'o-n'Omubiri gwa Kristo oguri-ogurikubonabona. Kandi ekyo ninkireeba munonga omu nsi ebiro ebi, oku ngu tugizire . . . Hati, Kristo takakoragaho, omurundi na gumwe, ekanisa n'emwe ekigombe ky'ediini na kakye. Hati, reka ekyo kihamibwe kurungi.

16 Hati, hati, ninza kubabuuza nyencakare omu kiro, ku muraabe nimwenda kumanya ekintu kyona aha bintu ebi, nk'ebayaayo ebi ndikujuriza, nari ekindi kintu. Tiinyine bwire bw'okushoboorora ekyo nkakimarayo, tindaahikye aha ishomo erindi, 'habw'okuba noobaasa kumara saabiiti nyingi aha ishomo eryo rimwe ryonka. Kwonka ku oraabe nooyenda kumanya omwanya, ekintu kyona, ombuuze kwonka, okite hanu aha-aha meeza, reero ninza kukugarukamu.

17 Hati, ekigombe ky'ediini ekirikukirayo kuba ekya ira, kandi ekanisa y'ekigombe ky'ediini y'okubanza ei turagizire, n'ekanisa Enkatorika. Kandi ekakorwamu ekibiina ky'ediini emyaka magana ashatu n'omushobo bwanyima y'okufa kw'entumwa y'aha muheru. Kandi ekyo kihikire. Ekyo nimukitunga omu kitabo ekirikwetwa Early Nicene Fathers, kandi nimukitunga n'omu bihandiiko bya Josephus, kandi, oo, na baingi ab'e-ab'ebayaayo bakuru. Mwareeba? Kandi n'okuhikira kimwe omu-omu . . . busingye bwona bw'ekanisa, kushuumira kimwe kuhika aha kufa kw'entumwa y'aha muheru, kandi emyaka magana ashatu y'orubaju ruri orw'entumwa, hakaba hatariho amakanisa g'ebigombe by'amadiini. Kandi Abakatoriki nibo kanisa y'okubanza kwekoramu ekigombe ky'ediini.

Kandi amakanisa g'Abapurotesitante nigo bigombe by'amadiini ebyarugire omu kigombe ky'ediini. Okuhunduuza kw'okubanza kwija, kukaba kuri okwa Luteeri; ahanyima ya Luteeri haija Zwingili, ahanyima ya Zwingili haija Kaluvini, n'okugumizamu batyo. Kandi n'okushuumira kuhika aha Kusisiimuka kwa Wesili, n'okugumizamu kushuumira kuhika ahari Alekizanda Kampubeli, Yohaana Smith, n'abandi, mwareeba, kugumizamu kushuumira. Kandi omugyendo ogw'aha muheru ogu twine hati n'obubiina bukye obwahukaine bw'obusingye bw'Abapentekoote.

18 Kandi niinyikiririza ngu Ruhanga akakora omuri buri busingye. Kwonka mureetegyereize ngu, buri bwire ekanisa ku eremwa, kandi ahonaaho ku beekoramu ekigombe ky'ediini batandikiraho kuremwa obwire obwo? Kandi ku baremwa, Ruhanga tagaruka kwimutsya egoy kanisa na kakye. Efeera aho buzima. Hati iwe . . . Ku muraabe nimwenda kumanya ebyafaayo ahari ekyo, ni-nitubaasa kubireeta, ku-ku hatariho ekanisa, tekabahoga omu byafaayo by'amakanisa, tihariho obu ekigombe ky'ediini kyona kiraagwire haza kikagaruka kwimuka. Baputisiti, Metsodisiti, Puresibateeri, eky'Abaluteeri, kyona eki kiri, ku byagwire, ebyabyo byahwa. Hati, ekyo kihikire. Hati, eki, na-naabagambira hati, mujware zaajaketi, 'habw'okuba eki nituza kukihamisiriza. Mwareeba? Tekabahoga, omurundi na gumwe. Omuntu ku yaabaire arugayo we wenka ekanisa akagikoramu ekibiina, ekaba etandika.

19 Ruhanga akoragana n'omuntu okwe, kitari kigombe ky'ediini. Tihariho busingye na bumwe obu Ruhanga arakoragaine n'ekigombe ky'ediini. Burijo akoragana n'omuntu okwe. Omu Ndagaano eya Ira, Akakoragana n'omuntu okwe. Omu Ndagaano Ensy, Yaakoragana n'omuntu okwe. Omu busingye bwona, Atuura naakoragana n'omuntu okwe, atari ebigombe by'amadiini. Mbwenu, n'ahabw'ekyo, Ruhanga ku araabe atari omu kigombe ky'ediini, nikingashira ki kugira akakwate koona n'ekigombe ky'ediini? Hati, tindikugamba aha bantu abari omuri ekyo kigombe ky'ediini, ningamba aha kigombe ky'ediini kyo kyonka, 'habw'okuba abantu ba Ruhanga bari omuri ebyo bigombe by'amadiini byona.

20 Hati, Ruhanga takaikiriza ngu ekintu kyona kibeho Atabandize yaarabura ku kyaza kubaho. Tindikwikiriza ngu hariho ekintu kyona eki . . .

Hati, nk'oku twine enshonga ezirkwimuka, omu makanisa, nk'ei tuherize kutunga enshumi nkye ehwiringire ekwatsire aha shagma n'amajuta, n'ebindi nk'ebyo. Kandi nimumanya n'ebaruha "Y'Ow'eishe-emwe omukundwa Branham," hamwe n'ebindi. Kwonka enshonga eyatumire ekyo naakihakanisa, n'ahabw'okuba tikiri omu Kigambo. Kandi egoyi niyo nshonga erikutuma naahakanisa ebigombe by'amadiini, ahawb'okuba tibiri omu Kigambo. Kandi nihateekwa kubaho ekintu eki turikuteekwa kwegamizaho okwikiriza kwaitu. Mbwenu ku turaabe tutarikubaasa kukwegamiza aha kigombe ky'ediini, nituteekwa kukwegamiza aha Kigambo kya Ruhanga. Ahawb'okuba Ogwo nigwo musingye gwonka, Ekigambo kya Ruhanga.

21 Kandi nabwo Ekigambo kya Ruhanga ku kiraabe kitarikugamba aha kigombe ky'ediini, kureka kikagamba nikihakanisa ekigombe ky'ediini, n'ahabw'ekyo nituteekwa kugambira hamwe n'Ekigambo. Tuteetaire aha ki bishopu, eki ondiijo weena arikugamba, eki ondiijo weena arikuteekateeka, eki omuntu murungi arikugamba, eki ekintu kyona kirikugamba, ku kiraabe kitari nk'oku Ekigambo kya Ruhanga kirikugamba, obwo kigwire. Mwareeba? Nikiteekwa kubakwo. Ekigambo nikiteekwa kuba kamara byona. Ekigambo kya Ruhanga nikiteekwa kuba amiina erikuhereeruka.

Hati mwijukye, tindikwiha obukristaayo aha muntu weena (ekyo nimukyetyegyereza) omu bigombe by'amadiini. Harimu emitwaro n'emitwaro y'abantu ab'omuhendo omuri ebyo bigombe by'amadiini byona, abari abaana ba Ruhanga. Kwonka okubataanisa n'okubashoroora, ninkihakanisa. Kandi n'Ekigambo kya Ruhanga nikikihakanisa.

22 Kandi niinyikiriza ngu tihariho nkora eri omu nsi eriizooba, tihariho nkora eraabaireho omu nsi, kureka egoyi ei Ekigambo kya Ruhanga kyagambire ngu eryaija. Niinyikiriza ngu Ekigambo kya Ruhanga nikituha byona ebi turikwetenga, hanu honyini omu Kigambo. Kuruga . . . okutandika kwaitu kuhika aha muheru, nibishangwa omu Kigambo kya Ruhanga honyini. Kandi nabwo ni-niinyikiriza ngu ku kiraabe kiri omu Kigambo kya Ruhanga, obwo tushemereire . . . Nikigamba ebitakabaireho. Kandi Ekigambo kya Ruhanga n'okurabura.

23 Hati, torikushoma Ekigambo kya Ruhanga nk'oku oshoma eihurire. Nooshoma Ekigambo kya Ruhanga orikwebemberwa Omwoyo Orikwera, waareeba, ahawb'okuba Omwoyo Orikwera We wenka agamba naarabira omuri Kristo. Kristo akasiima Ruhanga ngu Akashereka ebintu ebi amaiso g'abanyabwengye n'abarikwetegyereza, yaabishuuuruira abaana bato abarikubaasa kwega. N'ahabw'ekyo, nooreeba, tihariho muringo gwona gw'okwegyesibwamu, tihariho muringo gwona gw'okwekoramu ekigombe ky'ediini. Hariho omuringo gumwe gwonka gw'okuba ohikire, ogwo ni, okwebemberwa Omwoyo wa Ruhanga. Kandi obwo bumanyi obu waatungire nibuteekwa kwikirizana n'eki Kigambo. Waareeba? Obwo nooba waakitunga. Waareeba?

24 Nk'oku twaza kuhika ahaifo hanu omu dakiika nkye hati, nitukoragana n'abantu abari-abari . . . Bamwe omuribo n'aba Kaluvini enkomba, bamwe omuribo n'aba Arminian enkomba, hamwe-hamwe n'ab'emiringo etari emwe. Hati, burijo habaho, n'obu waakukisharamu kikaba kikye kita, nikigira embaju ibiri. Ekyo kihikire buzima. Kandi embaju zombi ziine enshonga ezi zeegamiireho omu kuhajaana. Kwonka, eki kiri n'eki, Amazima gaakyo gari nkahi? Aho niho turikuza kuhika, ahu turikuteekateeka, ahawb'embabazi za Ruhanga, ngu nituza kubooreka Amazima gaakyo. Hati reka tukwate . . . Kandi aha niho mpandiikiire zimwe ahari ezi nyegyesa z'amakanisa.

25 Mubiikuure Baiburi zaanyu, edakiika nkye, imwe mwena hati. Kandi ka tuze omu kitabo ky'Okushuururwa, eshuura 1; nari tubanze, n'Okushuururwa, eshuura 17. Hati reka tutandikye kushoma haza tureebe ahu aga makanisa gaatandikiire, kandi n'e-n'ekyagatandikire. Hati, Baiburi neerabura buri kintu kitakabaireho. Neerabura aha biro ebi-ebi tutwiremu. Mbwenu hati, Okushuururwa, eshuura 17, ku muraabe nimwenda. Naagamba eya 13, tiyo egoyi ei naaba nimmanyisa, egoyi neekwata aha . . . Egyo nayo, nitugihikaho ahanyima y'akaanya kakye, egoyi eri omu bunabi bw'Amerika. Kwonka hati muhurikize mutaireho omutima munonga.

Bwanyima omwe ahari baamaraika mushanju abaabaire baine enyabya mushanju yaija, yangira . . . Ija nkwarekye . . . orubanja oruricwerwa maraaya omukuru oshutami aha maizi maingi.

Hati mwijukye, eki nikihurirwa nk'enaama. Hati, ogu mukazi w'emicwe mibi, hati, ku turaabe nitwenda kwegyesa eki, nooteekwa kubanza waamanya eki ebirikushushanisa ebi birikumanyisa. Hati, omukazi, omuri Baiburi, naamanya "ekanisa." Ni bangahi abarikumanya ekyo, ngu turi Omugore? Ekanisa n'Omugore.

26 "Ija nkwarekye orubanja." Hati, nihaza kubaho orubanja oruricwerwa maraaya omukuru, omukazi otashemeire oshutami aha maizi maingi. Hati, omukazi naamanya, "ekanisa," kandi amaizi nigamanyisa

“abantu.” Hati, ku oraakyetegyereze, nabwo, reeba, omushororongo gwa 15 okiri aho, omushororongo gwa 15, gw'eshuura ego emwe.

Yaagaruka yangira ati: Amaizi agu waareeba ahi maraaya ogwo yaaba ashutami, n'abantu b'emiringo mingi . . . n'emitwe mingi . . . n'amahanga n'endimi. Mwareeba?

Hati, egi kanisa nkuru, omukazi mukuru, hati mwijukye ngu n'omukazi w'emicwe mibi. Kandi omukazi ku araabe naamanyisa ekanisa, (kandi Ekanisa ya Kristo n'Omugore, Omugore orikwera), mbwenu hanu hariho omukazi otarikwera. N'ahabw'ekyo naateekwa kuba omukazi otarikwera, orikweyeta, omugore. Mwareeba? Hati, beitu naakora ki? “Ashutami aha,” nari, “okuba ahaiguru ya,” nikimanyisa, “okugira obushoboorozi aha maizi maingi.” Omu bigambo ebindi, aine obushoboorozi omu mahanga goona n'endimi n'abantu. N'omuntu mukuru, omukazi ogu ni mukuru.

Hati, owaashambaine n'abagabe b'ensi, . . .

27 Hati, owaashambaine n'abagabe b'ensi, . . .

“Ahakuba abagabe b'ensi bashambaine,” abantu abatungi, abantu bakuru bashambaine nawe.

Okaashambana ota, omugabe akaashambana ata, n'ekanisa? N'okushambana kw'omwoyo. Okw'omwoyo! Obushambani niki? Ni, mpaho, ni nk'omukazi otari mwesigwa ahari iba; naatuura n'omushaija ondiijo kunu aine iba. Mbwenu ekanisa egi, n'ahabw'ekyo, ne-neeyeyeta Omugore wa Kristo, kunu eriyo neeshambana n'abagabe b'ensi, n'amagara gaayo agataschemeire, okwatura kwayo okutaschemeire. Oo, Kitsimbire emizi kandi Kiboneire. Ninkunda Ekigambo.

28 Hati, yetegyereze.

. . . owaashambaine n'abagabe b'ensi, n'abatuura omu nsi bakasinda viinyo, nibwo bushambani bwe.

“Viinyo” ye niyo yaabaire naaha, okukyamukirira kwe, “Niiitwe Ekanisa ego! Niiitwe tukiine.” Mwareeba? Hati, ekyo mukite omu biteekateeko byanyu hati. Kare nnu. “N'ahabw'ekyo yantwa- . . .”

Hati, maraika akagambira Yohaana ati, “Naaza kukworeka orubanja oru oruricwerwa egi kanisa nkuru.” Hati, mureebe.

N'ahabw'ekyo yantwara omu ihamba ndi omu Mwoyo, naareeba omukazi ashutami aha nyamaishwa erikutukura, . . .

Erangi erikutukura, omuri Baiburi, neemanyisa “okubonera munonga.” Erangi erikutukura neemanyisa “okutukura nk'okw'eshagama eri nsya.” Kandi enyamaishwa neemanyisa “obushoboorozi.”

Mureebire, enyamaishwa ku yaatuuhuukire omu nyanja, ekyo kiri omu Kushuururwa, eshuura 13. Kandi waareeba enyamaishwa neetuuhuuka omu nyanja, nikimanyisa ngu obushoboorozi obu bukaba nibwimuka omu bantu.

Kwonka omu kitabo ky'Okushuururwa 13, omwana gw'entaama ogu ku gwaizire, gukaruga okuzimu omu itaka, t'omu bantu, Amerika. Kwonka kandi, bwanyima, gukaba gwine amahembe makye abiri, obushoboorozi bw'ebi'ediini n'ebi'obutegyeki. Reero gwaheebwa obushoboorozi, gwagamba nk'ekijoka ekyagubandiize oku kyagambire. N'ahabw'ekyo nimuteekwa kukihandiika, nitutaaha omu kuhigwa kw'ediini hamwe n'ebintu ebyo bimwe ebi baakozire omuri Rooma y'obukaafiiri emyaka mingi ehangwire, ahabw'okuba ni OKU NIKWO MUKAMA ARIKUGIRA.

Hati kireebe. “Ashutami aha nyamaishwa, obushoboorozi.”

29 Okeetegyereza Rebeka? Eliezeeri obu yaamubugana, bukaba buri omu bwire bw'omwabazyo, kandi yaayeshera engamira. Habw'okuba, Eliezeeri akagira ati, “Omwishiki oraije kandi akeeshera egi ngamira, niwe araabe . . . kandi akampa eky'okunywa, niwe araabe ogwo ou Otooraine, Mukama, kuba omugore w'omuhelereza Waawe, Isaaka.” Kandi ku yaabaire akiri omu kushaba, Rebeka yaija yaataha amaizi yaamuha eky'okunywa, kandi yaayeshera engamira. Yetegyereze, engamira ekaba eri enyamaishwa. Kandi egyo nyamaishwa yonyini ei yaabaire naayeshera, niyo yaamuheekire yaamuhitsya ahari iba, Isaaka.

30 Kandi, eriizooba, amaani g'Omwoyo Orikwera, agu ekanisa erikweshera kandi ekaramya, nikyo Kintu Ekirigiheeka kugiiha omuri egi nsi, kuza kubugana Omugore. Buzima, Isaaka akaba ari aheeru okwo omu ishwa, omu mwabazyo. Titurikubugana Mukama omu Kitiinisa. Abaefeso, eshuura ya 5, ekyo neekigamba. “Turyamubugana omu kaabunga. Oo, ekyo nikituma Abametsodisiti baayeteekateeka kuteera akaari. Kiteekateekyeho! Mwareeba? Mukama . . .

Isaaka akaba yaarugire omu nju ya ishe, ari okwo omu ishwa obu areeba Rebeka naizira aha ngamira. Kandi Rebeka akakunda Isaaka, ku yaamureebire omurundi gw'okubanza, atyo yaaguruka aha ngamira yairuka kumubugana. Ekyo kihikire. Okwo niyo turikubugana Mukama. Kandi engamira egyo ei yaayesheire, ekamuheeka yaamuhitsya ahari iba.

Kandi ago Maani agu Ekanisa erikuramya, agu ensi erikweta eby'akahugye, agu Ekanisa erikuramya, nigo gariba amaani ago gamwe agaritwara Ekanisa omu kaabunga, "Okubugana Mukama omu kaabunga." Omwoyo Orikwera! Mwareeba? Hariho. . .

Kandi, reeba, Rebeka akaba ashugaine.

31 Kandi omukazi ogu ni maraaya, ou turikugambaho hanu. Hati, mwayetegyereza eki amaani gari hati? Aamaani, eki garikumanyisa, ngu, nigamanyisa egoy nyamaishwa. Omukazi akaba ari aha nyamaishwa erikutukura. Hati, ekaba neeza kuba enyamaishwa ya muringo ki? Erikutukura, ago gakaba nigaza kuba amaani "g'obutungi." Egi neeza kuba ekanisa ya muringo ki hati? N'ekanisa entungi, kandi ekanisa nkuru, kandi n'ekanisa y'amaani, kandi obushoboorozi bwayo nibutwara emitwe mingi n'abantu b'emiringo mingi. Kandi abagabe b'ensi bashambaine nayo omu mwoyo, abo ni, abantu bakuru b'ensi. Hati twaza kugimanya, omu kaanya kakye, kandi twetegyereze ebikwatsire aha bigombe by'amadiini ebi.

Omukazi ogwo akaba ajwaire emyenda ya bujwa (ey'obutegyeki), . . . ajwaire emyenda ya bujwa n'erikutukura, . . . ayehunzire eby'ezaabu n'amabaare ag'obuguzi bwingi . . . eruuru, aine ekikopo ky'ezaabu omu ngaro ze ekijwire ebihagaro n'okusiisikara kw'obushambani bwe:

Akaba aine ki omu ngaro ze? Enyegyesa ye, ei arikuha abantu naagira ati, "Niiwe egoy Kanisa. Turi eki." Kandi atumire abagabe b'ensi baaba abasinzi hamwe nawe, batyo. "Turi eki. Niiwe bushoboorozi bukur! Nitutwara buri ihanga. Niiwe kanisa erikukirayo obukuru eriho. Mwije, munywe aha byaitu . . . Hanu, shukaho kakye kaayo. Muginywe. Muginywe."

Ngigyo aho, mwareeba. Kandi akaba aine ekikopo omu ngaro ze.

32 Reeba.

Omukazi ogwo akaba ajwaire emyenda ya bujwa n'erikutukura, . . . ayehunzire eby'ezaabu n'amabaare ag'obuguzi bwingi n'eruuru, aine ekikopo ky'ezaabu omu ngaro ze ekijwire ebihagaro n'okusiisikara kw'obushambani bwe:

Hati, banywani, titurikushoma eihurire ry'obutoosha. Nitushoma Ekigambo kya Ruhanga ekitahwaho kandi ekihairwe omugisha. Eiguru ryona n'ensi biryahwaho, kwonka Ekigambo ekyo kirayagumaho. Ekyo kihikire.

Kandi aha . . . -buso bwe hakaba hahandiikirwe eiziina, nimmanyisa, hahandiikirweho eiziina, BABULOONI (EY'OMUBONANO) ORUREMBO ORUKURU, NYINA WA BAAMARAAYA N'EBIHAGARO BY'ENSI.

33 Hati, hanu obwire obuhingwire, tindikuteekateeka ngu n'omu kanisa hanu, kwonka nkabuurira aha ishomo, Engaro Okuhandiika Aha Kisika, reero naaha ebyafaayo bya Babulooni. Hati, buri nkora eraimukireho, buri diini na buri nkora eziraho omu nsi eriizooba, zikatandikira omu kitabo ky'Okutandika. Hati, ku oraakwate ekitabo kya Hislop ekirikwetwa Two Babylons, ku oraabe nooyenda kukisherura omu byafaayo, nari bimwe omuri ebyo bitabo birungi, noobaasa kubona buri nkora yoona ei orikwenda. Naaza kubagarurayo enyima okwo omu dakiika nkye, aha bakazi abarikubuirira, mwareeba, reero mboorekye ahu byatandikiire, mwareeba, okwo omu kitabo ky'Okutandika. Kandi n'aha bintu ebi ebitari bimwe, oku byaimukireho omu kitabo ky'Okutandika. Okutandika nikimanyisa "entandikiro." Ni bangahi abarikumanya ku ekyo kihikire? Okutandika n'entandikiro. N'ahabw'ekyo buri kintu ekiriho, kikaba nikiteekwa kugira entandikiro.

34 Ku ndikureeba omuti . . . Mbaire ndi omu ihamba okumara ameezi abiri, ashatu, nk'amneezi abiri. Nindieeba omuti, oku guri murungi. Ngureeba, gukura gujunda; ogundi gumera omu mwanya gwagwo, amagara agarikugumizamu. Reero ekyo nkiteekateekaho. Kwonka hariho ahantu ahu ogwo muti gwatandikiire. Gukaba niguteekwa kugira entandikiro. Kandi omuringo gwonka ogu gwabaire nigubaasa kuba omuti, nari kuba omwela, nari omuguruka, nari omulebeni, nari omukindo, nari eki gwabaire guri kyona, hakaba nihateekwa kubaho Obwengye bw'ekika kyahaiguru enyima yaagwo. Nari ku guraabe guri gumwe, gwabaire guri omuti gw'omwela gumwe, ekintu kyona ekiri omu nsi kikaabaire omuti gw'omwela gwonka. Kwonka Ekintu, kikuru, Obwengye bw'ekika kyahaiguru, bukabita omu buteeka.

Eiziina Rye Erirkwera risiimwe! Niwe Ogwo Owaataire okwezi n'enyonyyoozi omu kaabunga. Akata buri kintu omu buteeka bwakyo. Kandi naaza kuta Ekanisa Ye omu buteeka. Needa kuhinduka nk'oku Arikwenda ngu Ehindukye; burugwa-izooba, burengyerwa-izooba, bukiizi-bwa-bumosh, nari obukiizi-bwa-buryo, nari oku Arikwenda kwona. Kuri nitubaasa kwiha ebiteekateeko ebi by'ebigombe by'amadiini omu biteekateeko byaitu reero tukeeheerayo kimwe omu Musharaba. Naaza kugita omu buteeka, ku turaayorobe nk'emiti n'ebindi bihangirwe Bye. Tokareebaga okwezi nikugira kuti, "Tindikuza kwaka ekiro eki. Imwe nyonyoozi 'mwe mwakye omu mwanya gwangye ekiro eki." Kwonka itwe, oo, tuhindukireho, nimureeba.

35 Hati, Babulooni, yetegyereze oku Babulooni yaareebekire. Neereebeka omu kutandika kwa Baiburi. Ereebeka rwagati ya Baiburi. Kandi ereebeka aha muheru gwa Baiburi. Hati, haine ekiriho. Hati, neetandika na Nimuroodi. Nimuroodi akatandikaho Babulooni omu ruhanga rwa Shinaari, haihi munonga na rwagati y'Omugyera gwa Tigurisi n'ogwa Furaata. Kandi Furaata ekaba erabamu echingura. Kandi-kandi buri ruguuto, omu nsi egoy yoona, oku rwabaire rugyendera kimwe rukahika Babulooni. Kandi buri rimwe ahari ago marembo rikaba riri nka fuuti

magana abiri obugazi, ago marembo gakaba gakozirwe omu muringa. Kandi ku waabaire ohika omunda y'orurembo rwa Babulooni, buri ruguuto rukaba rugyendera kimwe ruhika aha kitebe ky'obukama.

36 Hati, noobaasa kuza Rooma, eriizooba, kandi buri ruguuto nirugyendera kimwe ruhika Rooma. Kandi hariho ekishushani kikye kya Mariamu oshugaine ahari buri nshonda, ahu oruguuto rurikuhindukira rukatoora ahanti, akiikiire Kristo omwana omu ngaro ze, naaranzya okwo Rooma. Mwareeba? Neereebeka omu kutandika, kwa Baiburi; ereebeka ahagati ya Baiburi; kandi ngigi hanu neereebeka aha muheru gwa Baiburi.

Hati, niinyenda kugumizamu ninshoma kumara edakiika nkye, kwenda ngu mubaase kutunga omusingye gw'eki. Mwareeba? Kare. "Naareeba omukazi ogwo," hati reeba, "ekanisa." Ku oraareebe omukazi, oteekateekye "ekanisa." Mwareeba?

... naareeba omukazi ogwo asinzire eshagama y'abarikwera, ...

Hati, ekigambo orikwera nikiruga hi? Ekigambo orikwera nikiruga omuri "ogwo okozirwe orikwera" nari "oyeziibwe," okozirwe orikwera. Kare.

37 ... naamureeba asinzire eshagama y'abarikwera, ...

Hati, omukazi ogu ku araabe ari ekanisa, ekahtiganisa abarikwera. Kandi niyo kanisa nkuru munonga. Eine obushoboorozi omu nsi yoona. Eshutami aha maizi maingi. Kandi e ... Abagabe b'ensi nibashambana nayo. Mbwenu, neeha? Ni nk'enaama. Hati Omwoyo yaaza ku ... Noomanya, hashemereire kubaho ebiconco mwenda by'omwoyo omu kanisa; eky'obwengye, ekindi eky'okwetegyereza, ekindi ahabw'okutamba endwara, kandi n'ekindi ahabw'ebindi.

... kandi n'eshagama ey'abaitsirwe ahabwa Yesu: ...

Nikireebeka nk'abaabaire batarikuta omutima munonga aha bi Yesu yaagambire. N'eki ekanisa yaagambire. Nikyo. Kandi ekyo kihikire, nakyo.

38 ... ku naamureebire, naatangaara munonga.

"Nkatangaara munonga. Na ... Ogwo mukazi akaba na-na-na naatangaaza, ka naatangaire oku ya ..." Hati, reka nze omu mwanya gwa Yohaana ngyezeho kukishoboora kakye, mwareeba. Yohaana akagira ati, "Ngugwo ashutami aho. Naayetwaramu kuba ekanisa Enkristaayo. Aine oburyo bwona bw'okutunga aha sente zoona ez'ensi. Abagabe b'ensi bari ahansi y'ebigyerre bye. N'omutungi kandi aboneire, kwonka naabaasa ata kusinda eshagama ey'abaitsirwe ahabwa Yesu? Naabaasa ata kuhiiganisa abarikwera? Naabaasa ata kwita abo bajurizi ba Kristo? Kandi obwo arikwegambaho kuba Omukristaayo, we wenka, ekanisa Enkristaayo?"

39 Hati, reeba.

Maraika yambuuza ati: Waatangaazibwa ki? Niinyija kukugambira eky'omubonano ky'ogwo mukazi n'eky'enyamaishwa ei arikugyenderaho, eine ... emitwe mushanju n'amahembe ikumi.

Hati, eki n'okushoma kw'obutoosha hanu hati. Eki mukikwate. Eki nikiza kwanguha munonga.

Enyamaishwa ei waareeba ekaba eriho, hati teriho, neeyenda kushuuma ... kuruga omu kiina ekitaine bugarukiro, eze omu kuhwerekyerera; kandi abatuura omu nsi, abu amaziina gaabo gatakahandiikwaga mu kitabo ky'amagara okuruga aha kuhangwa kw'ensi, baryatangaara ku barireeba ... ahabw'oku-ababw'okureeba enyamaishwa egyo, ahakuba ekaba eriho, mbwenu teriho, haza kandi neijsa kubaho.

Hati, hati eki nikiteekwa kukwata, mbwenu nkiki hanu. Akagamba, hati yetegyereze, ngu, "Boona," buzima ti bakye, kureka, "boona abatuura omu nsi baryatangaara." Boona baryatangaara. Ensi yoona eryatangaarira omukazi ogu. Hariho ekibiina kimwe kyonka ekitarikwija kuba nikimutangaarira, kandi ekyo n'abo abu amaziina gaabo gaahandiikirwe mu Kitabo ky'Amagara eky'Amwana gw'entama.

40 Hati, eki nimbaasa nabwo kukitaahizamu hanu honyini, 'habw'okuba twaza kukitaahamu omu dakiika nkye. Mwareeba? Amaziina gaabo gakahandiikwa ryari omu Kitabo ky'Amagara eky'Amwana gw'entama? Omu ruteerane oruhweire oru baagiiremu? Ekiro eki baza aha rutaari? Ekiro eki baayegaitsire aha kanisa? Tindikugyezaho kubakora kubi. Kureka, nimbagambira, Baiburi neegira ngu, "Amaziina gaabo gakahandiikwa omu Kitabo ky'Amagara eky'Amwana gw'entama kwiha aha kuhangwa kw'ensi." Buzima! Ruhanga, omu kutandika, ku yaareebire ngu Aryayohereza Omwana We, Aze omu mwanya gw'omusiisi, obu Eshagama y'Amwana wa Ruhanga yaasheesheka. Baiburi neegira ngu Eshagama Ye ekasheesheka ensi etakahangirwe. Ni bangahi abarikumanya ngu Baiburi ekyo neekigamba, ngu, "Eshagama ya Kristo ekasheesheka ensi etakahangirwe"? Eggo Shagama obu yaasheesheka, buri mwikiriza w'ogwo Mubiri, amaziina ge gakahandiikwa omuri eggo Shagama, omu Kitabo ky'Amagara eky'Amwana gw'entama, kuruga aha kuhangwa kw'ensi. N'enki ekirikukutiinisa? Oo, ow'eishe-emwe! Ekyo nikiigura enyigi, tikwo?

41 Mbwenu, hati ka tushome eki hanu honyini, reero tureebe yaaba ekyo eki kirikugamba kihikire. Mwareeba? "Kandi maraika yambuuza ati, 'Ahabw'enki wa . . ." Ningira ngu n'omushororongo gwa 8, "Enyamaishwa ei

waareeba . . ." Kare. Nigwo.

Enyamaishwa ei waareeba ekaba eriho, hati teriho, neeyenda kuruga omu kiina ekitaine bugarukiro, . . .

Hati, ekyo nituza kukigarukaho, kwonka niinyenda ngu mbanze nkuate eki ekindi, 'habw'okuba twaza kukihikaho.

. . . eze omu kuhwerekyerera; kandi abatuura omu nsi, abu amaziina gaabo gatakahandiikwaga mu kitabo ky'amagara okuruga aha kuhangwa kw'ensi, . . .

"Nihaza kubaho ekibiina omu nsi," omu bindi bigambo, "ekiribehwabeihwa," ahakuba akababeihabeihwa. Kwonka hariho ekibiina kimwe kyonka ekitarabehabeihirwe, kandi ekyo n'abo abu amaziina gaabo gaabaire gari omu Kitabo ky'Amagara ensi etakahangirwe. Ekyo nituza kukitaahamu handi hakye.

42 Hati yetegyereze omukazi ogwo, egyo kanisa; akaba ari "Babulooni, ey'omubonano." Nitumureeba naareebekyera omuri Nimuroodi. Ekygendererwa kya Nimuroodi kikaba kiri ki? Nimuroodi akombeka orurembo kandi yaareetera ezindi ndembo zoona kutoijera orurembo oru. Tukaabaasa kureeba ekintu nk'ekyo eriizooba? Hariho omwanya nk'ogwo ebiro ebi? Hariho ekanisa eine obushoboorozi ahari buri ihanga omu nsi? Buzima. Hariho omwanya ebiro ebi ogurikutuma buri ihanga ryagutoijera? Omwanya ogwo guriho?

Ka tugumizemu tushome ebindi ebi, kakyeho, kugira ngu mutungye ekishushani kyona. Kare.

. . . owaareebire enyamaishwa eyaabaire eriho, . . . hati teriho, kandi neija kubaho.

Eki nikyetenga omutima ogwine obwengye.

Hati, ni bangahi abarikumanya ngu obwengye ni kimwe aha biconco by'Omwoyo? Hati, mbwenu, ni kibiina kya muringo ki eki Arikugambira? Naateekwa kuba naagambira ekibiina ky'abantu abaine e-ebiconco by'Omwoyo birikukorera omu Kanisa egi.

. . . eki nikyetenga omutima ogwine obwengye.

43 Hati, yemerera, ekyo okisherure omu busingye obu bwona bw'ekanisa hanu, bwaba nibuhwaho. Omwoyo Orikwera naagamba, oku ebyo biconco biraije kuba nibikora omu biro by'aha muheru. Hati, twine ebiconco by'okutamba nibikora. Oo, ni-nibikora kurungi. Mbwenu, ow'eishe-emwe, hariho ebindi biconco. Ekyo ni kimwe aharibyo. Ekyo n'ekintu kikye munonga. Eego, nkiki hanu honyini ekiconco ekirikubikirira hare. Ekyakukizireyo oburungi ni kiiha, ekiconco ky'Omwoyo Orikwera ky'obwengye, kuta Ekigambo kya Ruhanga hamwe kandi n'okworeka Ekanisa ahu twemereire, nari omuntu kutambirwa? Twena nitwenda kukira. Kwonka haakiri amagara gangye gakire, okukira omubiri gwangye kukira, obwire bwona. Oo, mugyenzi!

Hurira Omwoyo Orikwera naagambira omuri Yohaana, ahari Patumo, akagira ati, "Okukishoboorokyera nikwetenga obwengye. Ka ahurikize Eki." Hati, turiyo nituteera ekishushani hanu. "Eki ni . . ."

44 Eki nikyetenga omutima ogwine obwengye. Emitwe mushanju nibwo bubungo mushanju, ahu ogwo mukazi ashutami;

Hariho orurembo rumwe rwonka, oru ndikumanya, omu nsi.

Hariho endembo ibiri, ezi ndikumanya, eziine obubungo mushanju n'okukiraho omurizo. Cincinnati ni rumwe aharizo, orushemereire kuba ruri ekitebyo kya Cincinnati ekiteebereziibwe. Ni nyina w'omushega, nimukimanya, ngu . . . n'ebindi. Kwonka rwine ebirikukira ahari ebyo omurirwo. Kwonka tihariho kanisa n'emwe erikutegyeka Cincinnati.

Hariho omwanya gumwe gwonka omu nsi yoona, ahu ekanisa eri aha bubungo mushanju, erikutegyeka ensi yoona. Hati, nibwo mperize kurugayo, ebintu ebyo byona.

Kandi nkareeba aho ahu kirikugira kiti, "Okukishoboorokyera nikwetenga obwengye." Okushuururuwa 13. "Orikwetegyereza abare enamba y'enyamaishwa, ahakuba n'enamba y'omuntu." Batari abantu baingi, ekibiina ky'abantu, kureka omuntu "omwe." "Enamba egoyi ni magana mukaaga na makumi mukaaga na mukaaga."

45 Kaingi mpuriire, ngu, ahaiguru y'ekitebe ky'obukama kya paapa wa Rooma, hahandiikirweho ngu, "VICARIVS FILII DEI." Nkaba ntura niinyebuuza ekyo yaaba kyabaire kiri amazima. Teera omusitaari, haza ogutondekaniseho eshuura, omu nyuguta z'Orurooma, reero orebee ku kiraabe kiri kwo. N'amazima gonyini. Nkeemerera haihi munonga ntyo n'ekirunga ky'enshonda ishatu kya paapa, ekiri omu kirahuri, "Obushoboorozi ahari gehena, eiguru, hamwe na purigaatori." Mwareeba? N'ahabw'ekyo, ebintu ebyo, nibwo mperize kurugayo, niho ndugire Rooma kandi nimmanya ngu n'amazima. Hati nitumanya ngu kyayorekwa butunu.

Kandi nibo bagabe mushanju; aharibo bataano bakagwa (abaabaire bariho obwire obwo) omwe ariho (ogwo niwe orikwenda kwija hati, owaabaire ari Kaisaari), ondijo takaizire (owaabaire ari Heroode, owaabaire ari mubi); . . .

Hat reeba. Reeba oku kihikiire kimwe.

... ku ariija, ashemereire kugumaho omwanya mukye.

Hariho omuntu weena orikumanya obwire obu Heroode yaategyekyeire? Ameezi mukaaga. Akakurura nyina omu ruguuto rw'omu rurembo, aha kiti kimwe ky'embaraasi. Yaayotsya orurembo; bwanyima yaabeikerera Abakristaayo ngu nibo bakikozire. Kandi yaateera omukuri ari aha rubaju rw'akabungo obwo bariyo . . . obwo bariyo nibootsyu orurembo. Ameezi mukaaga-mukaaga. Kyo reeba, "Enyamaishwa . . ."

46 Hati reeba, reeba oku yaabaire ari ekyatsire. Mwareeba? Hati, reeba.

Enyamaishwa eyaabaire eriho, mbwenu etariho, . . . niwe mugabe owa munaana, kwonka n'omwe ahari abo mushanju (obuhangwa bw'owa mushanju), kandi nawe naija kuhwerekyerera.

Buri muntu naamanya okuhwerekyerera eki kirikumanyisa, ni "okuzimu." Kandi reeba ahu yaarugire, "okuzimu." Niki? Ekiina ekitaine bugarukiro. Tihariho musingye gw'enyegyesa y'Ekikatoriki. Enyegyesa y'Ekikatoriki teine Baiburi. Tihariho ekintu kyona ekirikwetwa Baiburi aha nyegyesa yoona y'Ekikatoriki, nangwa na kakye. Tibarikugira ngu eriho. Omusaserdooti akeema eruguru kuri, ogu musaserdooti mukye eruguru hanu aha kanisa ya Sacred Heart akaijayo. Yaagira ati, "Oo, uwe . . ." Nkaba nimugambira aha kubatiza Mary Elizabeth Frazier. Yaagira ati, "Oo, omubatiize omu muringo ogu ekanisa Enkatorika y'okubanza yaabaire ebatizamu."

Naamubuuza nti, "Ekyo kikabaho ryari?"

Yaagarukamu ati, "Omuri Baiburi, Baiburi yaawe."

Naamubuuza nti, "Ekanisa Enkatorika ekabatizaho etyo? Egyo n'enyegyesa y'ekanisa Enkatorika?"

Ati, "Yee."

Naamubuuza nti, "Omu kutashobya kw'ekanisa Enkatorika, ahabw'enki ehindukire munonga?" Mwareeba?

Yaagarukamu ati, "Mbwenu, nooreeba, mwena nimwikiriza Baiburi. Nitwikiriza ekereziya." Mwareeba? "Titurikufayo eki Baiburi erikugamba. N'eki ekereziya erikugamba." Ekyo buzima nikwo kiri. Ku orihika aha kahayano, aharikyo, oije okigyezeho rimwe, waareeba. Tibarikufayo eki Baiburi erikugamba; ekyo tikiine kakwate. Nibafa aha ki ekereziya erikugamba. Mwareeba?

Kwonka titurikufayo eki ekereziya erikugamba. Nitwikiriza eki Ruhanga arikugamba. Amiina. Ahakuba omuri Baiburi, kihandiikirwe ngu, "Ka buri kigambo ky'omuntu kibe ekishuba, kwonka Ekyangye kibe Amazima." Egyo niyo nshonga ahabw'enki tutari kigombe ky'ediini.

Hati reeba. Hurikiza eki, edakiika yonka. "Abagabe bataano abaabaire bariho, bakagwa, abagabe bataano." Ekyo ku oraabe nookyenda kuruga omu byafaayo, naaza kukikworeka. "Kandi omwe ariho, kandi ondiijo aryajia."

47 Hati reeba, "egyo nyamaishwa." Hati, enyamaishwa ekaba etari omugabe. Ekaba eri "egyo eyaabaire eriho, mbwenu etariho; haza kandi eriho, mbwenu etariho; kandi eriho, mbwenu etariho." Niki? Okuhungurirana kwa baapaapa, obushoboorozi, enyamaishwa erikutegyeka. Obwo nibwo Rooma empagaani yaahinduka ekaba Rooma y'obwa paapa. Rooma empagaani ekahinduka, reero yaaba okutegyeka kwa baapaapa, kandi, bakagira paapa omu mwanya gw'omugabe, kandi paapa n'omugabe w'ebi'omwoyo. Egyo niyo nshonga ajwekwa ekirunga, omugabe w'ebi'omwoyo, naagira ngu niwe mutsigire wa Yesu Kristo. Nikyo ekyo.

48 Hati yetegyereze.

Kandi twaza kwhayo egyo nyegyesa y'Ekikatoriki tukworekye oku eshensheire ekataahiria kimwe omu makanisa g'Abapurotesitante, waareeba, oku na hati ekiri omu kanisa y'Abapurotesitante, nyangi. Buzima, neehakanisa, Baiburi, neehakanisiza kimwe. Hati, "Enyamaishwa eyaabaire eriho, mbwenu etariho." Hati oijukye ngu, "Boona abatuura omu nsi, baryabeihwabeihwa, abu amaziina gaabo gatakahandiikwaga kuruga aha kuhangwa kw'ensi."

49 Reka tureebe.

Enyamaishwa eyaabaire eriho, mbwenu etariho, (omushororongo gwa 11) niwe mugabe owa munaana, kwonka . . . ahari abo mushanju, kandi nawe naija kuhwerekyerera. (Naija kugumizamu okuhitsya obu arihika omu kiina ekitaine bugarukiro aha muheru gw'orugyendo.)

Kandi amahembe ikumi agu waareeba n'abagabe ikumi, . . .

Hati reeba hanu. Ku oraabe nooyenda kureeba ekintu ekirikutangaaza, reeba eki.

. . . nibo bagabe ikumi, abatakeemire; kwonka nibaija kuheebwa obushoboorozi nk'abagabe okumara eshaaha emwe hamwe n'egyo nyamaishwa.

Ti bagabe abajwekirwe ebirunga; ni ba ngambanyenka. Waareeba, tibakabaga bagabe abajwekirwe ebirunga

na kakye, kwonka bakaheebwa obushoboorozi nk'abagabe, eshaaha emwe, omu butegyeki bw'enyamaishwa. Ekyo kiri omuri obu bwire bukye bw'omwirima hati hati obu ba ngambanyenka barikwimukaho. Waareeba? "Bakaheebwa obushoboorozi nk'abagabe, okumara eshaaha emwe hamwe n'egyo nyamaishwa." Hati, kare.

50 Abo nibakwatanisa hamwe kuha egyo nyamaishwa amaani gaabo n'obushoboorozi bwabo;

Baryarwanisa Omwana gw'entaaama, kwonka Omwana gw'entaaama aryabasingura, (ekitiinisa!) ahakuba ni Mukama w'abakama, kandi Omugabe w'abagabe, kandi abo abu aine n'abaayetsirwe, abaatoorainwe kandi abeesigwa.

Nkaayenzire kubuurira eishomo ahari ekyo hati hati, "Abaatoorainwe ensi etakahangirwe, kandi bakaguma bari abeesigwa omu kwetwa kwabo." Haleluya! Nikyo ekyo. "Nibeetwa, abaatoorainwe kandi abeesigwa." Kandi n'enhumiki, mwareeba, "Abaatoorainwe, kandi abeesigwa." Baryamusingura, n'obu bakuba bakuru bata.

51 Kandi komyunizimu nkuru egi, enkora ya komyunizimu ei twine ebiro ebi, egyo mutagifaho. Egyo buzima neekorera omu ngaro za Ruhanga. Nimbaasa kukihanya na Baiburi egi. Naaza kumubonabonesa ahabwa buri mujurizi ou yaitsire. Eego, sebo. Imwe mureebe abagabe aba boona nibaikirizana hamwe, kandi baryamwanga. Kandi eihanga ryona, ensi yoona, komyunizimu eriyo neegikubuura. Ahabw'enki, neeteekwa kuba eri enkora ya Ruhanga, y'okugifubira. Noogira oti, "Rindaho kakye, Ow'eishe-emwe Branham. Komyunizimu, n'enkora ya Ruhanga?" Buzima, kyarimwe, n'enkora ya Ruhanga. Baiburi nikwo erikugira. Kwonka neetaahamu kucwera orurbanja abatatiina Ruhanga kandi abantu ebizaarwa abarikwitsa enshoni. N'enki ekitsigaire omu nsi egi? Eki twine niki? Hanu ekiro kiri . . .

52 Naaza kwemerezaho eishomo ryangye nk'edakiika emwe, kyaba nikibaasika. Mbaire ninshoma omu kicweka kimwe ky'Ebyahandiikirwe ahu ngu ekinyandaaro kitariza omu kuteerana kw'abantu ba Mukama okuhitsya aha ruzaaro rwakyo rw'omwijkuru wa ikumi na bana. Ni bangahi abarikumanya ekyo? Ekyo kihikire, ekitabo ky'Eky'ebiragi 23; ekinyandaaro. Omukazi ku arahambirwe omu ishwa, okwo n'okugira ngu, ari hare n'oburinzi bw'omushaija, reero omushaija akakiza ogwo mukazi amaani, ogwo mushaija naateekwa kumushwera. Kandi ogwo mukazi n'obu yaakuba maraaya, ogwo mushaija naateekwa kuguma nawe kuhitsya obu arifa. Kandi omukazi ogu ku yaakumushwerwa, arikugira ngu n'oshugaine, haza atashugaine, obwo naabaasa kwitwa ahabw'ekyo. Kandi omushaija n'omukazi abashwereine, ku baakuzaara ekinyandaaro, ekyo, kitariza omu kuteerana kw'abantu ba Mukama, okuhitsya aha ruzaaro rwakyo rw'omwijkuru wa ikumi na bana. Kandi emyaka makumi ana n'obusingye bumwe. Ekyo kibi kiriyamara emyaka magana ana kitakarugire omuri Israeli.

53 Ruhanga ayanga ekibi. Nooteekateeka ngu nooza kuribatirira Eshagama Erikwera ya Mukama Yesu, ngu ahabw'okuba ori ow'ekigombe ky'ediini nanka, haza oteekateekye ngu oryataahamu? Nooza kwizira omu mateeka ga Ruhanga kitari ekyo torikwija na kakye. Nikwo. Omudiikoni, omubuurizi, kyona eki turi, tikiine kakwate nakyo. Noizira omu biragiro bya Ruhanga.

Obusingye ikumi na buna. Ogwo muntu ashutami hanu hati ou tubaire nitukigaaniraho hamwe. Ambuurize ati, "Mbweni shi obwo nitumanya tuta orikwija kujunwa?"

Naagira nti, "Aho niho oshemereire kuba owa Kaluvini murungi." Eiziina ryawe rikahandiikwa omu Kitabo ensi etakahangirwe. Ruhanga naatoorana egyo shagama. Ekyo kiri Ahariwe. Waareeba?

"Kwonka ekyo kiine . . ."

54 Muhurikize. Imwe minyeeto 'mwe, eriizooba, tindikumanya yaaba muri abashomi b'omu kanisa egi, nari ahu murikushomera, imwe minyeeto 'mwe y'aboojo n'abaishiki. Mubaire nimumanya, ngu ebintu ebi murikukora, ku haraabe hariho obundi busingye, abaana baanyu baryacwerwa orurbanja ahabw'ebi murikukora? Ahabw'enki mutarikutamu ekitiinisa emicwe mirungi? Imwe baishiki 'mwe abari aheeru hanu mujwaire obwo bujwaro bugufu munonga obwa ira n'ebindi bintu aho, noomanya, ekyo nokyeyorekyera omuri muhara waawe. Noomanya ngu nyokwenkuru waawe a-akaba ari omukazi ow'omutindo, na nyoko ari omwishiki omuzini wa disiko, kandi ku egyo ariyo nshonga erikutuma waagyenda ojwaire busha eriizooba? Buzima nikwo kiri. Abaana baawe nibaija kuba bata? Eego, sebo. Ruhanga akagira ngu Atura abaana eby'okushiisha by'abazaire baabo n'abaijukuru baabo, okuhitsya aha busingye bwa kashatu n'obwa kana.

55 Kandi noomanya, ow'eishe-emwe mugyenzi wangye, ngu buri kaire ku okora ekyo ekihikire, kiryahika aha baana baawe?

Reeba hanu, ka tukwate Abaheburaayo, eshuura ya 7. Baiburi neegira ngu, Melekizedeki obu-obu yaabugana Abrahamu naaruga kwita omugabe, akamuha omugisha, kandi Nikigira, kiti, "Leevi . . ." Naagamba aha kuha ebicweka bya kimwe kya ikumi. Yaagira ati, "Leevi akaba aragiriirwe Mukama kwiha ebicweka bya kimwe kya ikumi ahari beene ishe." Kandi Leevi owaahairwe ebicweka bya kimwe kya ikumi, akaha kimwe kya ikumi, ahakuba akaba akiri omu nda ya Abrahamu obu yaabugana Melekizedeki. Kandi Abrahamu akaba ari ishenkuruza. Abrahamu akazaara Isaaka, Isaaka yaazaara Yakobo, Yakobo yaazaara Leevi; Levi, ishe, ishenkuru, ishenkuruza. Kandi Leevi ku yaabaire akiri omu nda ya Abrahamu, Baiburi neegira ngu akaha Melekizedeki kimwe kya ikumi. Haleluya!

Hatagira omuntu weena owaakugambira ngu hariho enkora yoona omu nsi erikubaasa kuremesa enkora nkuru ya Ruhanga. Neegumizamu buzima! Ecatebeekanisibwa enyima okwo omu kutandika. Tihariho daimoni nari baadaimoni abarikugasha abaakubaasa kuremesa puroguraamu Ye.

56 Hati, Baiburi teragizire ngu “omu buryo bumwe” akakiha. Baiburi neegira ngu, “Akaha kimwe kya ikumi,” obu yaabaire ari omu nda ya ishenkuropa. Ekitiinisa! Ogwo niwe Mukama wangye. Oo, Akakimanya, nangwa, n'ensi etakabaire kuhangwa. Akaba naamanya buri kimwe. Kandi akaha kimwe kya ikumi akiri omunda ya Abrahamu.

Mbwenu ow'eishe-emwekazi, ow'eishe-emwe, noobaasa ota kwirukira aheeru hanu, abantu bakatuura kandi bakaza omu kakungu na baka bashaija, na baanyinamaka nibasheenya amaka kandi n'okutuura nk'oku muriktuura, nimuteekateeka ngu obundi busingye nibwija kuba buta? Nkiki hanu eki buri. Tiburi kindi kureka ekibiina ky'abantu b'ebinyandaaro, abazairwe bashobire, ekibiina ky'abasiisikaire. Kandi hariho ekintu kimwe ekibutsigariire, kandi ekyo n'ekiro kya bomu ya atomika eki tutwiremu. Ekyo buzima kihikire. Turi omu bwire bw'aha muheru.

57 Ashutami akasheeshe aka, enyima kuri hare omu nshozi za Kentucky, omutsigazi mukye, tokaabaasize kumwirira haihi nka fuuti ikumi, naakora eisyanga ry'omugusha. Obundi akaba atarikumanya haihi n'okutaanisa omukono gwa buryo n'ogwa bumosho, obu yaahurira. Nkaba ngiire omu mwanya ogutaikiriziibwe. Tindamanyire ahu naabaire ndi. Nkaba ndi omuri rumwe omuri ezo mpanga. Kandi nkaba ninza eruguru okwo kuhiiga kaamugye. Reero ku naashutamire eruguru okwo, naatandika kugaaniira nawe. Reero omutsigazi ogu yaagira ngu akaba naayenda kuza omu mahe. Reero kuza kushanga, twatandika kugamba ahari Mukama, yaagira ati, “Mubuurizi 'we, torikwikiriza ngu turi omu bwire bw'aha muheru?” Ari eruguru okwo hare omuri ezo nshozi.

Naagira nti, “Buzima, nibwo turimu. Buzima, mutabani, turi omu bwire bw'aha muheru.”

58 Turi hanu. Obu nibwo bwire obu tutwiremu, ow'eishe-emwe. Tuburimu. Torikureeba oku abakazi abazaire enyima okwo, n'abashaija abazaire, oku baabaire batuura, hamwe na baashwenkuru na baanyokwenkuru? Torikureeba oku sho na nyoko batwire? Ti ky'okutangaaza turi omu kusiisikara nk'oku ebiro ebi. Ti ky'okutangaaza, noobaasa kubuurira oteerwe omutwe; nibagumizamu nibajwara ebijwaro bigufu munonga nka butoosha, kandi bakucwera amacwante omu maisho. Nibareetsa sigara bakutuumuurira omwika, reero bagire bati, “Fa ahabyawe.” Ahabw'enki? Ahabw'okuba orwo nirwo ruganda oru barikurugamu. Ekyo naaza kukihikaho, butsimba, Oruzaaro Rw'Enjoka. Nituza kureeba ahu omukazi arikutaahiramu, tureebe ahabw'enki nibatwaza batyo. N'abaana ba Sitaane kwiha aha kuhangwa kw'ensi. Ekyo kihikire. Kandi titwinemu ekintu kyona, eki etsigariire, n'ahabw'ekyo okucwerwa orubanja nikyo kitsigaire kyonka. Titurikubaasa kugira ekindi kyona kureka kucwerwa orubanja. Ruhanga naaza kucwekyereza ekintu ekyo kyona. Kandi abantu nibo bakikozire. Ruhanga tarakigyendereire ngu kibe kityo, kwonka Akamanya ngu kiryaba kwo. Egyo niyo nshonga eyaatumire Yaagira ngu, “Aryabeihabeiba boona abatuura omu nsi, kureka abo abu amaziina gaabo gaahandiikirwe omu Kitabo ky'Amagara ky'Omwana gw'entaa ensi etakahangirwe.”

59 Ka tukireebe. Tushome okwewongyerayo kakye hati. Hati, hati niinyikiriza ngu turi aha mushororongo gwa 12.

Kandi amahembe ikumi agu waareeba n'abagabe ikumi abatakeemire; kwonka nibaija kuheebwa obushoborozi nk'abagabe okumara eshaaha emwe hamwe n'egyo nyamaishwa.

Abo nibakwatanisa hamwe kuha egyo nyamaishwa amaani gaabo n'obushoborozi bwabo.

Baryarwanisa Omwana gw'entaa, kwonka Omwana gw'entaa aryabasingura, ahakuba ni Mukama w'abakama kandi Omugabe w'abagabe, kandi abo abu aine n'a-abaayetsirwe, abaatoorainwe kandi abeesigwa.

Yaagaruka yangira ati: Amaizi agu waareeba ahi maraaya ogwo yaaba ashutami, n'abantu b'emiringo mingi . . . emitwe mingi . . . n'amahanga n'endimi.

. . . amahembe ikumi agu waareeba hamwe n'enyamaishwa baryayanga maraaya ogwo . . .

60 Reeba ekyo hati, aga “mahembe ikumi,” obugabe ikumi obu. Waareeba, ekyo ni buri kintu kirikutaahamu, eki bangambanyenka aba bari. Reeba orubaju oru bangambanyenka barikwegamiramu. Nibeegamira nkahi? Iwe-iwe ngambira ngambanyenka otarikwegamira orubaju rwa komyunizimu. Waareeba? Kandi baryayanga (ki?) “maraaya ogwo,” omukazi, ekanisa. Kwonka niki? Reeba ekirikuza kukikora.

. . . baryayanga maraaya ogwo, atsigare wenka ajwaire busha, baryarya enyama ye, bamwokyeze kimwe n'omuriro.

61 Baryatuntumura ekintu ekyo kirugye ahari maapu, buzima mpamize nk'oku nyemereire hanu. Kuri twaba twine obwire bw'okwihayo eryo eishomo aho ry'egyo kanisa, reero tukarirabya omu Byahandiikirwe, tukahika ahu Kirikugamba, kirikushomwa kiti, “Abagabe b'ensi egi boona, hamwe n'abakama b'emeeri boona, boona, bakaborooga, ahakuba Babulooni orukuru rukacwekyerezibwa omu shaaha emwe.” Eshaaha emwe, obwire bwarwo bukaba buhikire! Kandi, oo, oku Kirikugira kiti, “Mushemererwe, imwe abarikwera 'mwe, kandi naimwe mwena baanabi abarikwera, ahakuba Ruhanga yaaruhoora enzigu ahabw'eshagama y'abarikwera na beene

waanyu." Waareeba, ekyo kihikire. Buzima, komyunizimu neekorera kyarimwe omu ngaro za Ruhanga. Nk'oku Omugabe Nebukadeneeza yaakoreire kyarimwe omu ngaro, okwija kutwara abo Bayudaaya obu baatwarwa bajwaire busha.

62 Kandi ekibi nikibaasa kugumizamu nikishiisha, oruzaaro oruhikiriire nirubaasa kuguma omunda omwo reero oruzaaro rugumizemu nirusiisikara, nirusiisikara, kandi nirusiisikara okuhitsya obu ahanyima y'omwanya mukye rurikuhwaho. Nikihiha ahu, ahabw'okuba baanyinabo na baishebo kandi n'abandi baatwire batyo omu maisho gaitu, kandi n'omu muringo ogwo, okuhitsya obu hataine kintu kyona eki tutsgaize. Kandi nimumanya eki Yesu yaagambire? Omurimo ogwo kuri guitaracwirweho, tihaakurokokireho muntu n'omwe.

63 Nimureeba? Nimureeba ahabw'enki twine ebi? Tindikugamba aha bantu. Ba Arthur Godfrey na buri muntu, nimumanya, mwareeba, na ba Elvis Presley, kandi-kandi za ovoro bazishuumize ahansi, omu manyugunu, n'eishokyne nirireereetera omu bitsya byabo, kandi n'emiringo egi yoona ei eminyeeto erikutwazamu. Ekirikukireeta niki? Niki? [Ow'eishe-emwe Branham yaakongoota aha kituuti emirundi ikumi na gumwe -Omur.] N'ahabw'okuba kikaruga omu kibiina ky'abantu abaatwireho ira, ebinyandaaro. Tihariho ekitsigaire! Oo, nibeemerera beeshongora bati, "Ruhanga onyirize, haihi Naiwe," nk'omweshongozi Ernie hamwe n'abandi boona batyo, beeshongora ekyeshongoro ky'omuringo nanka, n'ebindi nk'ebyo batyo. Ow'eishe-emwe, noomanya ki? Obwo, obwo n'oburyarya bwonyini. Eego, sebo.

64 Omuntu orikuza aheeru okwo akazina disiko n'ebiyeshongoro bya disiko kandi n'ebintu by'omuringo nk'ogwo byona tashemereire kuba ari aha kituuti eki. Tashemereire kuba ari enyima hanu na kakye. Ogu n'omurimo gw'abanyamurwa, abeetsirwe Ruhanga. Ogu n'omwanya gw'abaheereza abaayetsirwe Ruhanga. Kandi otaija enyima hanu ahabw'ebintu nk'ebyo. Ogwo nigwo murabanamu gwabo ebiro ebi, ekanisa bagihhindwiremu nk'ekibiina ky'abeeteeraine. Ekibiina ky'abeeteeraine ni kirungi, ku muraabe nimwenda kukikora, kiri ahariimwe. Kwonka ka mbagambire, hariho entaaniso mpango ahabw'okugyezaho . . . rwagati y'ekibiina ky'abeeteeraine hamwe n'ekanisa. Eego, sebo. Ku muraabe nimwenda kukora ebintu ebyo omu kibiina ky'abeeteeraine, kandi mukagira n'ago magyeniyi agatari gamwe n'ebindi nk'ebyo, ekyo kiri ahariimwe. Kwonka, ow'eishe-emwe, ekanisa eshemereire kweyererwa kutandikira aha kituuti kuhikira kimwe omu kishengye ky'ahansi y'eitaka. Ekyo kihikire. Tindikumanya kweyererwa n'amadirisa masya hamwe n'ebindi. Nimmanyisa okusisiimuka kw'omutindo gwa ira, oku Ruhanga ayohereize okuraataataanise ekintu ekyo kuruga aha rubaju rumwe kuhika aha rundi. Eego, sebo. Nk'okutaho etaara, etaara y'amashanyarazi ekaakira ebiyenje byetooroire ekijuma kya apo. Eego sebo, nibitaataana etaara ku erikwaka.

65 Hati Reeba, "Abo nibakwatanisa hamwe, kugiha amaani gaabo." Ndi ahaifo y'aho hati. "Amahembe ikumi." Eego, hati.

Ahakuba Ruhanga akakita omu mitima yaabo ngu bahikiirize enaama ye, (nikyo ekyo.) ahabw'okugira omutima gumwe okuha enyamaishwa egyo obushoboorozi bw'okutegyeka obugabe bwabo, okuhitsya obu ebigambo bya Ruhanga birihikiirizibwa.

Hati, kandi omukazi ogwo ou waareeba, nirwo rurembo orukuru orurikutegyeka abagabe b'ensi boona.

Hati, tikirkwetaagisa okukyetooroora, nitumanya ngu abo n'abakuru b'ekanisa y'Abakatoriki omu madaara gaabo g'obukuru. Tikirkwetaagisa omuntu weena . . . Ekyo ni-ninkiikiriza mpamize nk'oku ndikwikiriza ngu nkutunga Omwoyo Orikwera. Ekyo ninkiikiriza nk'oku ndikwikiriza ngu ndi Omukristaaoy oyemereire hanu eriizooba, ngu abo bakuru b'ekanisa y'Abakatoriki omu madaara gaabo g'obukuru nibo-nibo . . . Orurembo rwa Vatikani nirwo-nirwo rurembo oruri aha bubungo mushanju. Abakuru b'egyo kanisa omu madaara gaabo g'obukuru niyo nyamaishwa eyaabaire eriho, mbwenu etariho. Ni Babulooni. Buzima buri kintu kyorekirwe, kurungi munonga omu Byahandiikirwe byona. N'ekanisa Enkatorika.

66 Hati, hati hanu hariho ekyaza kukukanga munonga. Noogira oti, "Hoona, tiinye ou orikugambaho kubi, Ow'eishe-emwe Branham?" Kwonka reka ngire eki naakubuuza. Ka tugarukye enyima aha mushororongo gwa 5.

Kandi aha buso bwe . . . hahandiikirweho, BABULOONI (EY'OMUBONANO) ORUREMBO RUKURU, NYINA W'EBIHAGARO . . . NYINA WA BAAMARAAYA N'EBIHAGARO BY'ENSI.

Akaba ari ki? M-a-r-a-a-y-a. Kandi akaba ari n-y-i-n-a. Ari ki? N-y-i-n-a. Akaba aine eki azaire. Nyina w'aboojo? Wa baamaraaya. Maraaya niki? Nikyo kimwe nka-nka maraaya, omukazi enhambani. Ekyamuhindwire enhambani niki? Enyegyesa ye. Akaba naayetwaramu kuba ekanisa Enkristaaoy, kwonka akaba naaha enyegyesa z'ebigunjano by'abantu. Kandi hanu naagira ngu akaba aine . . . Ku eraabe yaabaire eri ekibiina ky'ediini ky'okubanza, reero nikireebeka orikushusha oti hariho ebibiina bimwe ebyagirugiremu. Akaba ari nyina wa baamaraaya. Ekyo tikwo kiri? Nyina wa baamaraaya. Hati, akaba atarikubaasa kuba nyina w'aboojo. Akaba atarikubaasa kuba nyina . . . Akaba naateekwa kuba nyina w'abakazi. Kandi, ku baraabe baabaire bari abakazi, gakaba gari amakanisa. Hati ka tukisherure. Niki ekyarugire omu . . .

67 Ekibiina ky'okubanza kikaba kiri kiiha? Ekanisa Enkatorika. Ekibiina kya kabiri kikaba kiri kiiha? Luteeri. Ekibiina kya kashatu kikaba kiri kiiha? Zwingili. Kikashuuma kyahika ahari oha? Kaluvini. Reero kuruga omuri ekyo kyataaha omuri Angilikaani, kandi okuruga omuri Angilikaani kyataaha omu Bametsodisiti. Abametsodisiti,

Abametsodisiti bakazaara ki? Okuruga omuri abo haija Alekizanda Campbell. Okuruga omuri Alekizanda Campbell haija Yohaana Smith. Okuruga . . . Alekizanda Campbell niyo kanisa Enkristaayo; bwanyima, bakaba baagizireho ina nari itaano, ekanisa ya church of Christ hamwe n'ezo nyegyesa nkye zoona ezindi ezaakomookiremu. Bwanyima hanu haija ekanisa y'Ababaputisiti, ekagira obubiina bukye bwingi munonga obwagirugiremu. Kandi omu kanisa y'Abametsodisiti hakarugamu . . . omu kanisa y'Abametsodisiti, hakarugamu, hakabanza kurugamu Abametsodisiti ba Wesili, reero baayecwamu emirundi ena nari etaano. Bwanyima baayekoramu Abametsodisiti b'ogundi muringo, kandi baagaruka baayecwamu, bwanyima baayekoramu Abametsodisiti b'Obusingye. Kandi kandi baija baaruga omuri ekyo baaza omu Banazarayo. Kandi okuruga omu Banazarayo baaza omuri Pilgrim Holiness, reero kuruga omuri Pilgrim Holiness baagumizamu nibashuuma. Enyegyesa nkye niziimukaho zityo, zaagumizamu nizishuuma, buri emwe omuri ezo nyegyesa nkye-nkye ezaatandikiire enyima okwo zikagumirizamu kimwe nizishuuma. Kwonka buri emwe omurizo ekakora ki? Aha muheru zikahereerukira omu Bapentekoote.

68 Kwonka Abapentekoote bakakora ki? Ekintu nikyo kimwe eki nyinabo yaakozire, bakagarukirayo kimwe baakora ekibiina. Bwanyima kikahindukamu ki? E-ekigombe ky'ediini. Za omuri kimwe, ekintu ky'okubanza nibakubuuza bat, "Enyegyesa yaawe n'eha?" Mwojo 'we, nibakushokoza n'ekishokozo ekine amaino marungi, mwareeba, kumanya eki ori, eki orikwikiriza. Kandi waaba otakirizaine nabo, ow'eishe-emwe, noobingwa ahonaaho. Kandi ekyo kihikire.

Kandi otateekateeka ngu ahabw'okuba noogira ngu ori Omupentekoote ngu obwo orinzirwe. Ow'eishe-emwe, nihaza kubaho Abapentekoote baingi abateishukire omuhanda nk'oku hariho abari omu muhanda, nimpamya. Mwareeba?

69 Hati, ebyo bibiina byona by'amadiini, kuri byarekire omugisha gwa Pentekoote gukagumizamu, batagukoremu ekibiina ky'ediini, bakagureka omu bw'eishe-emwe reero bakareka Omwoyo Orikwera akashoroora. Omwoyo orikwera ashoroora. Anania na Safira rimwe bakataahamu baagamba bat na bat; reero Omwoyo Orikwera yaagira ati, "Ahabw'enki mwabeiha?"

Kwonka nitugira tuti, "Hati, ogwo n'Ow'eishe-emwe Jones, otamugambaho ekintu kibi kyona hati, niwe orikuha emitijo okukira abandi omu kanisa. Nimmanya ngu aine Omwoyo Orikwera; nkamuhurira naagamba omu ndimi, kandi ndamureebire naateera akaari ari omu Mwoyo." Ekyo tikiine makuru nk'okushuka amashaza aha muguta gwomire. Mwareeba? Tikiine kakwate nakyo. Ruhanga niwe oine eky'okugamba. Aine obushoboorozi kugamba yaaba amwine nari atamwine. Buzima. "Kwonka tukaihamu, oo, ekigombe kyaitu ky'ediini. Mpaho, tukamubinga omu-omu ba Assemblies, aba Oneness baamwakiira." Aba Oneness bagyenda nawe omwanya mukye, reero bwanyima baamubinga. Ahabw'okuba, nibamutwarayo, reero aba Yesu Wenka bamwakiira. Aba Yesu wenka bagyenda nawe omwanya mukye, reero ekindi kintu ekiraamutware ni Church of God, emutwara. Aba Church of God of Prophecy bamutwara, reero ab'omugyendo gwa Tomlinson bamutwara. Oo, mugyenzi! Ow'eishe-emwe, ku turaabe haihi tutahweireho! Omwo n'omuri Pentekoote, okusiisimuka okurikuhereeruka. Mbwenu hati baine ekitiinisa kya bururu, kandi baine abarikuramya amajuta, hamwe n'e-n'eshagama aha buso. Kandi, oo, embabazi, tindikumanya ahi baahika hati. Ekintu kimwe kyonka eki . . .

70 Ekintu kyona kisiisikaire. Nimumanya ku Baiburi yaagizire ngu kirysiisikara? Nimumanya Baiburi ku erikugamba ngu ebiro ebi, biryaija, obu nangwa n'emeeza za Mukama zirijura entanaki? Kandi yaagira eti, "N'oha ou Ndikubaasa kwegyesa obutumwa? N'oha ou Ndikubaasa kushoboororera Akaamanya? Ahabw'okuba ekiragi ronikiteekwa kuba aha kiragi, aha kiragi, omushorongo aha mushorongo." N'oha ou Arikubaasa kwegyesa obutumwa? Encuukye eziprugire aha mabeere, nyina. Mwareeba?

71 Hati, tihariho-tihariho mukazi, omukazi w'engyeso mbi omuri tauni egi otarikubaasa kuzaara omwishiki oshugaine. Yaazaarwa naaba ashugaine, hati, kandi naabaasa kukura kurungi. Kwonka ku oraabe oteetegyereize, ngu nyina atwire ari ow'egyo micwe, ogwo mwishiki, obucweka mwenda ahari ikumi, naaza kutwaza nk'oku nyina arikutwaza buzima. Hati, nimumanya ngu ekyo kihikire. Omukazi mukuru oyepangisiize enju y'obwa maraaya, naabaasa kuzaara omwana w'omwishiki. Naabaasa kuhitsya emyaka ikumi na mukaaga, ashemeire kandi aine emicwe mirungi nk'eirebe ryona, kwonka, ku yaakuguma atyo. Kwonka, ekirikyo ni ngu, naagarukirayo kimwe atwaza nka nyina.

72 Hati, ekanisa Enkatorika niyo yaabaire maraaya nkuru y'okubanza eyaareetsire enyegyesa ezi yaayegunziire yo yonka, emigyenco, eki, Baiburi yaagizire eti, "Ekaruga omu kiina ekitaine bugarukiro kandi eryagarukayo eze omu kuhwerekyerera." Ekyo Baiburi ekakigamba. Hati, ku baraabe nibeegyesa ekyo, kigwire. Kigwire, kurugiirira aha Kigambo kya Ruhanga. Reero ngigi hanu ekanisa y'Abametsodisiti yaija, eyaagizairwemu, omukazi muto murungi, kwonka ekakora ki? Ekahindukira kimwe yaagarukayo kandi yaakora ebintu nibyo bimwe ebi nyina arikukora. Neereka abashomi baayo bajware sikaati ngufu munonga. Neebareka bareetsa zaasigara. Neebareka batwaza okutarikwo kandi bakora nk'oku barikwenda. Tihariho ekintu kyona eki barikukigambaho. Omuriisa mukye omugurusi oine okwetegyereza kukye enyima okwo, enyima y'ekituuti okwo, naatiina ngu eizooba rimwe naija kubura omushaara, nari esafuriya ya zaabisikwiti.

Ka nkugambire, ow'eishe-emwe, haakiri mbuurira Engiri, kandi ndya zaabisikwiti nywa n'amaizi g'omu mufuregye, kwonka ngambe Amazima aharikyo. Buri omwe aha bantu bangye n'obu yaakwimuka akashohora,

nkaaguma mbagambira Amazima aharikyo. Eego, buzima.

73 Ni nshonga ki? Oo, n'etikiti y'eby'okurya. "Mbwenu, noomanya, ndi omuriisa w'ekanisa erikukirayo obuhango eriho omu rurembo." Imwe Ababaputisiti n'Abametsodisiti, muhurikiize nabi w'ebishuba. Hati, ekyo nikishaasha, kwonka omuntu weena orikwegyesa naahakanisa Baiburi egi ni nabi w'ebishuba. Tindikufayo n'obu kyakuba kiboneire kita, n'obunabi bw'ebishuba. Ekyo kihikire.

"Oo, buri kintu kiri gye eiziina ryawe ku riraabe riri omu kitabo." Eiziina ryawe niribaasa kuba omu daazini y'ebitabo. Kwonka ku riraabe ritari omu Kitabo ky'Amagara, obuzire! Noobaasa kuba murungi munonga, noobaasa kuba omwesigwa kandi oshemeire kandi ow'emicwe mirungi nk'oku orikubaasa, ekyo tikiine kakwate koono nakyo.

74 Esau akaba ari omuntu murungi okukira Yakobo kabiri, kyahika aha kuba omuntu murungi, naafa ahari ishe omugurusi empumi n'ebindi byona. Kwonka Yakobo akaba ari omuryangatanisa atarikuruga ahari nyina, ekinyabaishiki mukuru. Kwonka Ruhanga akagira ati, "Yakobo nkamukunda Esau naamwanga," aboojo abo batakazairwe. Abarooma 8 nikwo harikugira. Ekyo buzima kihikire.

Ruhanga naamanya ekiri omu muntu. Kandi naamanya n'ekiri omu kanisa, nayo. Nitubaisibwaho Omugaati gw'Amagara, Omugaati gw'Ekigambo kya Ruhanga. Hati, egyo niyo nshonga ahabw'enki tutari kigombe ky'ediini.

75 Hati, niinyenda kubaha ekindi kikye . . . Niinyenda kubaha eky'okureeberaho kikye eki naaba mpandiikire hanu. "Omukuru . . ." Hati, omu kitabo ky'Okushuururwa, 19:2. Nyine ekintu ekihandiikirwe hanu. Niinyenda kureeba nyetegyereze eki kiri hati.

Ahabw'okuba emanja ezi acwa n'ez'amazima kandi n'ez'oburyo; ahakuba akacwera orubanja maraaya omukuru owaasiisire ensi n'obushambani bwe; kandi yaamuhoora enzigu ahabw'eshagama y'abaheereza be. (Ogwo nigwo muheru gw'ekanisa Enkatorika.)

76 Hati, nitwenda nabwo ngu oyetegyereze, nabwo hanu, ngu ekigombe ky'ediini, ngu ekigombe ky'ediini nabwo nikishangwa omu Byahandiikirwe hanu, ngu e . . . Kandi Baiburi tekagambahoga aha kigombe ky'ediini na kakye. Ekigombe ky'ediini kikaruga omu kanisa Enkatorika. Niyo nyina w'okubanza w'ebigombe by'amadiini, kandi buri kigombe ky'ediini nimwo kyakomookire. Hati, eki nikiza kucumita kakye. Nikiza kuguma nikyeyongyera kucumita kakye obwire bwona, mwareeba. Kwonka ni-niinyenda ngu mureebe ku ebgombe by'amadiini bitarazairwe nari okuteebwaho Ruhanga. Bikateebwaho Sitaane.

Ekanisa ya Ruhanga ni . . . Titwebaganiisemu, twena turi omubiri gumwe; amatsiko gamwe n'enyegeyesa emwe; bamwe omuri rukundo. Egyo niyo Kanisa ya Ruhanga ohuriire. Otafire aha bi bo, ebantu ebyo, turi bamwe! Ekyo kihikire. Yaaba n'Omumetsodisiti nari Omubaputisiti, ow'eishe-emwe, ku araabe azairwe obwa kabiri kandi aijwire Omwoyo Orikwera, n'ow'eishe-emwe mugyenzi wangye. Nitugyenda hamwe tukwataniise. Nikwo. Eego, sebo. Tikirikureetaho ntaaniso yoona.

77 Musa. Obumwe n'obumwe nindeeba oku n'oku reero ngira nti, "Noomanya ekyo kibiina ekirikurengyesereza omu kwikiriza ky'Abapentekoote, Ow'eishe-emwe Branham, ahabw'enki nookwatanisa n'ekibiina nk'ekyo?" Noomanya? Musa akareeba Abaisraeli. Yaabareebera omu dirisa egyo emwe ei Faraho yaabareebiremu. Faraho akabareeba nk'ekibiina ky'abakaatsi b'obudongo, kwonka Musa yaabareeba nk'abatoorainwe Ruhanga. Akamanya ngu baine okuraganisibwa. Ahabw'enki? Akakimanya kurabira omu Kigambo. Kandi ahabw'okwikiriza . . . Arikwenda kwema aha ngoma, kuba Faraho, n'ensi yoona eri ahansi y'ebigyere bye, ashutami aho naanywa viinyo, n'abakazi barungi b'okumuuhuirira, nk'omugabe rubambansi, nari ngambanyenka, nari omugabe w'ensi, Musa owaahama, aine emyaka makumi ana, akaba abiine omu bushoboorozi bwe. Akaranzya ekyo kibiina ky'abakaatsi b'obudongo, kwonka yaamanya ngu n'omwe aharibo. Haleluya! Nikyo ekyo. Akamanya ngu n'omwe aharibo. Kandi ahabw'okwikiriza, kwonka, yaacwamu!

78 Buri muntu naateekwa kucwamu. Nooteekwa kucwamu. Nooza kucwamu hati. Nooza kucwamu omu kasheeshe. Nooza kucwamu nyencakare omu kiro, ku oraabe okihuriire. Obwire bumwe nooteekwa kucwamu. Ow'eishe-emwe, nkacwamu ira munonga. Baiburi egi ekaba eri kashoboorozi yangye.. Baiburi egi yaaba Ekitabo kyangye ky'Amagara. Baiburi egi yaaba Ekigambo kya Ruhanga. Baiburi egi niyo erikumbaisaho. Baiburi egi niyo mpamiireho.

79 N'ahabw'ekyo, Musa akaranzya Abaisraeli. Kandi taragambire kwonka ati, "Oo, n'abantu barungi munonga. Tiinyine nshonga nabo. Oo, ngaaha, tinkaabagambaho ekigambo kibi kyona." Okwo nikwo abantu baingi barikukora ebiro ebi. "Oo, abo Bapentekoote kandi n'abo bantu abaine Omwoyo Orikwera, hamwe n'abo bantu abarikwikiriza omu kutamba kwa Ruhanga, oo, ti-ti-tiinyine nshonga nakyo." Kwonka Musa tikwo yaatwaize. Akatsigaho Misri yaahinduka omwe aharibo. Yaagyenda yaashanga beene ishe. Akaba ari omwe aharibo.

80 Ow'eishe-emwe, okwo nikwo ndikutwaza. Ninja kutoora omu muhanda gw'aba Mukama abakye abarikugaywa, n'obu baakuba bari abantu bakye, nari oku bari kwona. Baine okuraganisibwa, kandi nindeeba amaziina gaabo omu Kitabo ky'Amagara eky'Omwana gw'entaama. N'ab'eishe-emwe bagyenzi bangye. Ekyo kihikire. Sharamu oyemerere nabo. N'obu baakuba bashobize nari batashobize, yemerera aho n'obu kiraabe. Ku baraabe bari omu nshobe, bahwere kuza omu mazima. Kihikire. Tokaabhwera waaba oriyo noobahemangura.

Waareeba, gyezaho kubaihayo.

81 Charlie, nk'oku baagambire aha W'eishe-emwe Allen, aha muriro ogu ba . . . eshagama omu ngaro. Nkagira nti, "Tinkagayaga A. A. Allen, na kakye." Naagira nti, "Kuri nimbaasa kubuurira nka A. A. Allen, tinkaagiraho n'obu yaakuba saaviisi y'okutamba." Hati, kyahika aha kutaikirizana aha shagama okuba akamanyiso k'Omwoyo Orikwera, omu ngaro zaawe, ekyo ninkihakanisa. Kwonka kyahika aha bw'eishe-emwe, n'ow'eishe-emwe mugyenzi wangye. Ninkwatanisa nawe omu rugamba. Ekyo kihikire. Ku araabe agwire, ningyezaho kumuhwera. Kandi ku araabe atagwire, ku ndaabe ngwire, niinyenda ngu ampwere. Kandi ogwo nigwo muringo ogu tu-turaagumizemu hamwe. Hati, reeba hanu.

... akaba ari BABULOONI, (EY'OMUBONANO) . . . NYINA WA BAAMARAAYA . . .

82 Hati nimureeba oku ekanisa ebiro ebi, banywani, nimureeba oku aga makanisa ebiro ebi garikutuura omuringo gwona ogu garikwenda kutuura? "Tikiine nshonga buzima, mugumizemu omumaisho," empunu neerya empunu ngyenzi yaayo, tibarikufayo. "Ahabw'enki, tihariho kabi koona omu kukora ekyo. Ahabw'enki, noogyezaho kuba ow'omutindo ogwa kare." Hati reeba enyegyesa yaabo. Hati niinyenda . . . Hati reeba. Ogwo nigwo muze gwabo. Nooreeba, ku emyaka mikye ehwiringire, ekanisa Enkatorika niyo yonka eyaabaire neikirizibwa kuza omuri sineema? Ekanisa y'Abametsodisiti ekaba etakaateekateeka aha kintu nk'ekyo. Ebyo bigombe by'amadiini byona biti, "Ngaaha! Egyo n'emirimo ya Sitaane." Niinyebuuza ekyabaireho niki? Eego, sebo.

83 Kandi nimumanya, mukaabaasize kutwara abo baishiki bato b'Abakatoriki, barugayo n'obu bunanka bwabo bukye . . . (Hati, bamwe omuriumwe aboojo bakuru abarikwingana naanye obukuru.) . . . barugayo baza kureeba ekintu kikye eki ahu baabaire bagira ebirikuhiha omu maju. Ogwo muntu, ningira ngu, ari okuzimu, ekiro eki. Tindikumanya. Tindi muramuzi we. Kwonka ku yaayeshongoire ekyo kyeshongoro kikye kibi ky'okubanza ekyagiire aha rediyo, kitashwijumirwe, ekyo kya "mubihinye, baishiki 'mwe, mubihinye; mubihinye mubihitsye ahaiguru reero mworekye entegye zaanyu nungi." Ekyo ni bangahi abarikukijuka obu kyashohora omurundi gw'okubanza, emyaka mingi eyaahingire? Egyo niyo nshobe y'okubanza aho aho. Ekyo kihikire. Kandi ku baatungire ogu muntu okuruga Texas, baatwara abo bakazi ebiso okwo reero baabajweka ebyo bijwaro by'omunda kutuma baareebeka nk'ab'amaani okukira oku baabaire bari, n'ebintu ebiri nk'ebyo, haza baabareka baagumizamu nabyo. Kandi hati kikakora ki? Kikashensheramu. N'omwoyo.

84 Omuntu omwe akaba naagamba, ekiro kiri. Yaagira ati, "Tindikumanya eki ndaakore. Nyine omwojo murungi, omwesigwa, kwonka omwojo ogwo ahikire aha kutwara kyona eki arikutaho engaro."

Naamubuuza nti, "Ahabw'enki?"

Ati, "Naakwatanisa n'omushuma."

Waakwatanisa n'omushuma, naiwe wenka nooba omushuma. Omukaikuru wangye wa Kentucky akaba akira kugira ati, "Waabyama n'embwa eine emira, naiwe, noimukaho oine emira." Kwata-kwata omukazi otari murungi, reero orekye omwishiiki . . . hazo omute hamwe n'o-omwojo w'emicwe mirungi, kandi eky'okubanza noomanya naagira engyesho nk'ez'ekibwana ky'embwa. Kihindure orundi rubaju. Noomanyirwa aha kibiina kyawé. Yetaanise! "Mubarugyemu," Baiburi nikwo erikugira, "mubeetaaniseho!" Ekyo kihikire.

85 Ebigombe byabo by'amadiini ku biraagarukyeyo omu kusiisikara nk'okwo okw'okureka abantu baabyo . . . Mpaho, hanu ekiro kiri, omu kanisa mpango nungi y'Ababaputisiti, kikabeetaagisa kusiibuura abashomi. Omushaija abaire naabaasa kubuurira edakiika makumi abiri zonka, 'hab'okuba omuriisa abaire naateekwa kureetsa. Abashomi boona bashohora aheeru. Boona baayemerera aheeru aho nibaareetsa omu bibiina, bwanyima bagaruka ogundi murundi, omuriisa hamwe n'abo boona. Nkaza omu kanisa y'aba Congregationalist, aho hakaba heemereireho omushaija, ajwaire eganduura mpango ndaingwa, ayemereire aho, yaagamba, yaayegamira ekituuti ati, arikugamba aha kimuri eki yaashangire aha mutwe gw'orushozi. Nikyo ekyo kyonka eki yaagambireho, reero yaarugaho yaashohora. Kandi enkumu ze zikaba nizishusha erangi ya kinekye ahabw'omwika gwa sigara. Eego. Kandi yaagamba aha bakazi, ngu abashaija babaire nibaza kuzaana . . . Ni muzaano ki ogu gw'Abagirimaani ogu bazaana n'ekyo, munonga n'o-noogaba zaacanisi, noomanya? Gukaba gwine . . . Oo, nteekateekire ngu ninza kugwijuwa. Matatu, bakaba nibaza kugiraho omuzaano gwa matatu. Nintekateeka ngu nigwo. Yee, n'ahu orikugaba zaacanisi. N'okuzaana canisi kwa butoosha. Omuzaano gwa matatu, omu kishengye ky'ahansi omu itaka! Mugyenzi, barungi 'mwe! Okwo niyo omusingye gwayo guri. Tiki'okutangaaza! Niki? Nibakora ekyo, reero bateerera enduuru ekanisa Enkatorika aheeru hanu omuri egi myanya y'okuzaaniram u emizaano kandi kunu nabo nibazaana waakareeba. Ahabw'enki, naimwe Abapurotesitante musiisikaire nkabo, mbwenu mukaakigambaho ki? Enyungu terikubaasa kweta ebinika "endofa." Buzima terikubaasa. Nimukikora, kandi ekyo, bagira bat, "Eego, ndi Omupuresibateeri. Ndi Omumetsodisiti." Ori busha okuhitsya obu oraazaarwe obwa kabiri. Ekyo kihikire. Kandi ku oraakore ekyo, nookimanya. Omuriwi nihaba harimu ekintu ekikukugambira ngu ebintu ebyo bigwire, kandi noija kubirugamu buzima nk'oku amaju gaawe garikukira embaata oburaingwa. Noomanya ngu ago n'Amazima. Buzima. Eego, sebo. Ebintu ebyo nibigyendera omuri ekyo. Ahabw'enki?

... NYINA WA BAAMARAAYA . . .

86 Kimwe omu biro ebi, nyina owa ira naaza kugira ati, "Nimumanya ki? Nabwo, mukundwa, tushangirwe turi bamwe." Reero obwo nimumanya eki kirikuba kiri? Okwegaita kw'Amakanisa nikuza kubagaita boona hamwe nk'oku bari hati. Kwonka nimumanya ekirikuza kuba aha kabiina kakye nk'aka? Nimwija kubonabonesibwa, boojo 'mwe. Ekyo buzima kihikire.

Kwonka otafayo, Omwana gw'entamaa aryamusingura! Ahakuba ni Mukama w'abakama kandi Omugabe w'abagabe, kandi Ruhanga aryayebembera Ekanisa Ye, omu mwanya gw'ekigombe ky'ediini. Aryashuka ago Majuta g'omuhendo mwingi munonga g'Omwoyo Orikwera ahari egyo kanisa. Ow'eishe-emwe, Omuriro guryaruga omu Iguru, reero obumanyiso n'ebi 'okutangaaza bibebo, ebi mutakareebaga. Eego, sebo. "Mutatiina, imwe obusyo obukye, Shoimwe naasiima munonga kubaha Obukama." Eego, sebo. "Ogwo origumisiriza kuhitsya aha muheru!" Nikyo ekyo. Gumizamu noogyenda. Amaisho guma ogahangire Gologosa. Baiburi egi ehikire. Reka kweraarikirira.

87 Hati reeba. Hariho emize emwe ei baine. Emwe aha micwe ei baine. Nitubaasa kugumizamu. Eky'okubanza noomanya, kikashenshera omu makanisa g'Abapurotesitante. Reero abakazi b'Abakatoriki baatandika ku . . . Ahabw'enki, kikaba kitaine nshonga kujwara obujwaro bugufu munonga, kasita baabaire nibaza aha kanisa kandi bakeeshemba ekitambaara kikye aha mitwe yaabo. Nk'omugyenko ngu, "Otarya enyama yoona aha Rwakataano." Kandi, oo, ni nkahi ahu orashangire eky'okushemba ekitambaara aha mutwe kugira ngu otaahe omu kanisa? Niinyenda ngu muunyorekye Ekyahandiikirwe ekyo. N'obunabi bw'ebishuba. Kiri nkahi omu kanisa ngu nooteekwa kujwara enkofiira omu kanisa? Ku orikujwara enkofiira aha mutwe gwawe, noohemura Kristo, buzima; abashaija, nibo ndikugambaho. Abakazi, mwine eky'okwetwekyerera, kwonka nimpiga omuntu weena kuunyoreka ahu eri enkofiira nari ekitambaara. N'eishokye ryawe! Mbwenu ryona orishazire. Hati ekyo niki? Oo, nibagira bati, "Ekyo n'eky'omutindo ogwa ira." Ku kiraabe kiri kityo, ni Baiburi! Kandi Ekigambo kya Ruhanga kihikire.

88 Nkagamba hanu, enshumi nkye ehwiringe, aha mukazi owaanaabiise ebipyere bya Yesu, kandi akakwata eishokye rye, noomanya, kandi-kandi akaribiragarisa. Nkagira nti, "Omuringo gwonka ogu omukazi yaakubaasa kukora ekyo, n'okwemerera aha mutwe gwe kugira ngu atungye eishokye erirkugasha ahansi aho kunaabisa ebipyere Bye, akaribiragarisa." Ekyo kihikire. Oo, eego, n'e-n'eky'enshoni kureeba omuringo ogu . . . Hanu, embeera y'obutiti, okugyendagyenda bajware ekooti nungi ngufu batyo, emibiri yaabo ebunwize neereebeka.

Hati noogira oti, "Ahabw'enki noojumiirira abakazi?" Mushemereire kujumiirirwa.

Naimwe abashaija abarikureka abakazi baanyu bakakora ekyo, ow'eishe-emwe, ti-tindikumanya eky'okukuteekateekaho. Hati, ekyo kihikire.

Naimwe abariisa, tindikumanya yaaba muri hanu. Kwonka ku oraareebe ogwo muntu, omugambire aije, omugambire, andeebe. Mwareeba? Ku araabe atarikuha Kristo ekitiinisa akareka abashomi be bakagumizamu hataine . . . Hati we . . . Nibabaasa kubikorera okwo aheeru atarikumanya, kwonka yaaba atakibagambiire, tashemereire kuba omuheereza wa Yesu Kristo. Ekyo buzima kihikire. Tashemereire kuba omuheereza wa Kristo. Omuheereza wa Kristo ashemereire kuba ataine bwoba kyaba nikiruga omuri Baiburi. Buzima. Kwonka mbabo aho, nibaza aheeru kandi bakikora n'obu kiraabe.

89 Reero bwanyima, eky'okubanza noomanya, kikeetaagisa Abapurotesitante kukikwata. Imwe Abametsodisiti barungi 'mwe, naimwe Ababaputisiti, hamwe naimwe Abapuresibatee n'Abanazarayo, Pilgrim Holiness, kandi naimwe mwena. Nikyo kimwe mukarugirayo kimwe, mukaaga ahari emwe, n'ekicweka ky'edaazini y'ekindi. Nikyo ekyo, "Nyina wa baamaraaya." Ekigombe kyanyu ky'ediini kiti, "Kasita baatandikiire aha ntebe nkuru, hariho entaaniso yoona?" Mwareeba? Hariho entaaniso mpango munonga. Tigaratandikiire, aha Ntebe nkuru aho. Nigabaasa kuba gaatandikiire aha ntebe nkuru yaanyu eifo aha, kwonka hatari aha Ntebe nkuru ahaiguru Kuri. Nikirugiirira ei waarrugire. Ago n'amazima.

90 Hati, tindikuteekateeka ngu twine obwire bw'okukwata ahari eki ekindi, shana ekirungi ka nkirekyere akasheeshe. Kare, ka tukwate ekikye eki ekigufu. Twine, hanu, "okubatiza omu maizi." Kandi twagira "okutooranwa ira tutakabaireho," kandi, oo, ebintu bingi. N'ahabw'ekyo ka tukwate eki, ekikye eki, ekigufu "ky'abakazi ababuurizi," reero tukwate eki.

Hati, hati, omukazi omubuurizi, tindikwenda kukushaasha, kureka niinyenda kugira eki naakugambira. Toine kacweka na kamwe k'Ekyahandiikirwe, tihariho na kamwe omuri Baiburi. Yee, nimmanya ahu orikuza, kandi naaherize kutunga ebyawe byona, yee, "Batabani baanyu na bahara baanyu baryaragura." Hati, omuriisa waawe ku araabe atarikumanya ekigambo "kuragura" eki kirikumanyisa, ti-thihaine eki arikumanya. Taine murimo muhango munonga enyima y'ekituuti, yaaba naagyezaho kukugambira ngu obe omubuurizi. Waareeba? Habw'okuba, buzima, kizibiirwe kuruga omu kitabo ky'Okutandika kuhika omu ky'Okushuururwa. Hati, ka mboorekye eki, mwareeba.

91 Hati niinyenda ngu mubiikuure naanye omuri Timoseo y'Okubanza 2:11. Mubiikuure hanu kwonka reero tureebe eki hati, kandi ekyo nituza kikitunga hanu, nakyo, Ebyakozirwe byawe 2. Yee. Kandi mu-muhurikize hanu eki Ebyahandiikirwe birikugamba ahari eri ishomu.

Hati, omuntu omwe akaguma naagira ngu, "Mbweni, Ow'eishe-emwe Branham, ori omugurusi orikwanga abakazi." Tindikwanga abakazi. Ndi e . . . Kureka tindikwenda kureeba abakazi nibagyezaho kuza omu myanya etari yaabo.

Nimwijuka enyima hanu aha Ikorero ry'obwato erya Howard, rimwe aha makorero g'obwato agatunguukire munonga agariho aha Mugyera gwa Ohio? Bakatamu omukazi kuryebembera. Mureebe ekyabaireho.

Bakaha omukazi obugabe bw'okuteera akaruuru. Reeba ekyabaireho.

92 Murekye mbagambire hati hati. Ti kujumiirira abakazi kwonka. Niinyenda abashaija mwetegeyereze ngu naimwe eki mukirimu. Kwonka reka ngire eki naakugambira, ow'eishe-emwe. Eihanga eri n'eihanga ry'omukazi. Ekyo naaza kukibahamiza, kurabira omu Byahandiikirwe, kurabira omu kintu kyona eki murikwenda ngu kikihamye. Nikyo eki. Ekirikureebeka aha sente zaitu niki? Omukazi. Nirishangwa nkahi? Omu kitabo ky'Okushuururwa, hanu, noorireeba. Ni namba ya ikumi na ishatu, kandi na, buri kintu eki ryatandikaine; enyonyoozi ikumi na ishatu, eminyarara ikumi na ishatu, amatware ikumi na ashatu. Ikumi na ishatu, buri kintu kikaba kiri ikumi na ishatu, okubanza kwa byona. Nirireebeka omu kitabo ky'Okushuururwa eshuura ya 13. Omukazi, ikumi na ishatu!

93 Kandi omu gwa 1933, obu Mukama . . . Obu twabaire twine oruteerane hanu ahu ekanisa ya Church of Christ eyombekirwe hati, omu ka ya Masoniki eya ira, okworekwa kwa Mukama kukaanyizira aharuguru hanu naaragura nti, "Bugirmaani ekaba neeza kwimuka kandi eyombekye orwo Rugo rwa Maginot okwo." Baingi omuriimwe nimukijuka. "Kandi n'oku boona baabaire nibaza kwerindira omwo, kandi Abanyamerika bakaba nibaza kuteerwa munonga aho aho ahari orwo rugo. Kandi kukagaruka kwagamba ebyabaire nibiza kubaho, n'ahari Roosevelt hamwe n'ebyo bintu, oku yaabaire naaza kwetsimba omu karuuru kandi akategyeke egoye ncuro ya kana." Kurungi munonga, buzima nk'oku kyahikire kikabaho. "Kandi okworekwa kukagaruka kwagamba ngu emotoka zikaba niziza kuguma nizeeyongyera kushusha nk'eihuri okuhitsya obu omu biro by'aha muheru zaabaire niziza kushushana n'eihuri." Kandi nkagira nti, "Obwire buryahika obu ezo motoka zitarivugwa na siteeringi. Haryabaho ekindi kintu ekiraije kuzivuga." Nizo ezo motoka ezi barikureeta hati hati, nibakozesa rimooti kuzivuga, ahabw'okwerinda. Kihikire. Torikwija kubaasa kutaaha omu rurembo . . . Obwo, gwaba guri omwanya gw'okuvugamu obwira bwa mahiro makumi abiri buri shaaha, noobaasa kugyenda obwira bwa mahiro makumi abiri buri shaaha. Torikubaasa kutomera endijo motoka, 'habw'okuba nooba nookozesa rimooti waaba noovuga. Mwareeba, nibigyenda bityo, hati hati. Kandi nkagira nti, "Mwijukye, omu biro ebyo, obwire bw'aha muheru butakahikire, obwire bw'aha muheru butakahikire, ngu omukazi . . . Hati, eki mwena mukibiikye kihandiikirwe. Haryabaho omukazi mukuru, w'amaani owaimuka, obundi abe Purezidenti, nari ngambanyenka, nari omukazi mukuru w'amaani omuri eri ihanga rya Amerika. Kandi riryamirwa, n'amaani g'emize y'abakazi. Hati, mwijukye, ekyo ni OKU NIKWO MUKAMA ARIKUGIRA."

#### 94 Mwareeba?

Kandi riri omu nshobe. Kwonka nikishuuura ki? Ka mbagambire. Mube ab'omwoyo. Ka . . . Muhuguukye. Mureebe. Ahabw'enki nirikora ekyo? Kuha ekanisa Enkatorika omwanya kutaahamu. Mwareeba? Nimuramya abazaani ba sineema aba hamwe n'ebantu ebi ebindi ebitari bimwe aheeru hanu. Nimwijuka eishomo eri naabuuriire? Margie, noorijuka, emyaka mingi ehwngwire, aha ku-kutaahirirwa kwa Amerika, okujuumika obutegyeki bwa Amerika. Kandi n'oku naagizire ngu akaimuka omuri Paris bwanyima yaitu kubajuna abo bakazi okwo, viinyo n'obwire burungi. Bwanyima yaija yaataahira kimwe omuri Hollywood. Hati, omu mwanya gwaitu okutuma omuri Paris ngu batuhe eby'omutindo, nibatuma hanu kutunga eby'omutindo. Kikakora ki? Kika . . . Tukaba tutakiriza abaana baanyu kuza kureeba filimu, kwonka ekataahira kimwe omuri televijioni, yaagumirizamu kimwe aheeru yaashiisha ekintu kyona, yaamara eihanga ryona. Mbweni turi hanu ebi, abaishiki bato boona hamwe n'aboojo boona, boona nibareebeka nk'abarikukunda abazaani b'ahari televijioni. Niki? N'okutaho omuhanda. Mwojo 'we, omukazi omwe w'emicwe mibi naabaasa kutwara abantu baingi omuri gehena kukira amabaara g'amaarwa goona agu orikubaasa kutandikaho omu rurembo. Nikwo kiri. Mureebe naashuumma omu ruguuto rw'omu rurembo ebijwaro bye byona abijwiremu, tindikufayo ni mushaija ki, yaaba ari omushaija oine amagara marungi kandi omubiri gwe guri gye, ku arikureeba ogwo mukazi nihateekwa kugira ekintu ekyamurabamu. Hati, mube ab'amazima.

#### 95 Tindikufayo . . .

Mazire emyaka mingi nyine Omwoyo Orikwera. Torikubaasa kureeba omukazi haza ajwaire kubi . . . Ntwa-ntwara omusharaba mukye omu mutoka yangye, baingi omuriimwe mwagureebire. Omuntu omwe akambuuza ati, "Ori Omukatoriki?" Ni nkahi ahu Abakatoriki baratungire obushoboorozi aha musharaba? Omusharaba nigumanyisa "Omukristaayo."

Abo Barikwera bakye aba ira ba Sesiriya n'ebindi n'akamanyiso k'Obukatoriki. Titurikwikiririza omu bintu nk'ebyo. Nitwikiririza omuri Kristo. Baine abantu abaafiire b'emiringo yoona abu barikuramya. N'omugyenzo gw'ekika ky'ahaiguru gw'okubandwa emizimu. Nikwo kiri, okuramya abaafiire. Tihariho ekintu nk'ekyo, ngaaha.

#### 96 Nkabuuza ogwo musaserdooti. Naagira nti, "Ahabw'enki, kandi, ku . . . Petero akaba ari paapa w'okubanza?"

Yangarukamu ati, "Ekyo kihikire."

Naamubuuza nti, "Kandi ahabw'enki Petero yaagizire ati, 'Tihariho ondiijo muteerani owa Ruhanga n'abantu kureka ogwo Muntu ni Kristo Yesu'? Kandi mwine abakazi enkumi itaano abaafiire, hamwe n'ebindi byona, ebi murikuhindura abateerani. Hati, n'enki ekibaireho?" Nkikyo aho. Tibaine eky'okugarukamu ahari ekyo. Ekyo kihikire.

97 Hati zimwe aha nyegyesa zaabo, enyegyesa zaabo z'ebishuba, ekibiina kya baanabi b'ebishuba b'Abapurotesitante kiizire kandi nikizeegyesa, kandi naimwe Abapurotesitante nimuzimira. Ekyo buzima kihikire. Ebigombe by'amadiini n'emigyenzo y'okubatiza, hamwe n'ebiragiro ebitari bimwe kandi n'ebintu ebi murikurabamu, buzima ebitari omu Byahandiikirwe. Ebyahandiikirwe nibihakanisa ebintu ebyo, beitu nabwo nimubiramatiroho. N'amazima.

98 Hati muhurikize eki ekikwatsire aha bakazi ababuurizi. Kare. Timoseo y'Okubanza, niinyenda e-ekitabo kya Timoseo y'Okubanza 2:11. Hati muhurikize eki Kirikugamba hanu.

(Abakazi baanyu bagume beegye bahunami) omu kworoba kwona.

Ahakuba tindikwikiriza mukazi kubuurira nari kutegyeka abashaija; kureka agume ahunami.

Tindikjunaanwa okukitamu. Ninjunaanwa kubagambira ku kirimu. Mwareeba? Mwareeba?

(Abakazi baanyu bagume beegye bahunami) omu kworoba kwona. (Ku oraabe oragiire omu kanisa ya Orthodox haza okabareeba, mwareeba. Mwareeba?

Ahakuba tindikwikiriza mukazi kubuurira nari kutegyeka (kuba omuriisa, omudiikoni, nari ekintu kyona nk'ekyo) abashaija; mwareeba, kutegyeka abashaija; kureka agume ahunami.

Ahakuba Adamu niwe yaabandize kuhangwa, haakurataho Haawa.

99 Mubaire nimumanya? Hati muhurikize, bakazi 'mwe. Imwe abakazi Abakristaayo barungi, abahikiriire niimwe kintu ekirikukirayo oburungi eki Ruhanga yaabaire naabaasa kuha omushaija, kitari ekyo Akaamuhaire ekindi kintu. Eego, sebo. Mwareeba? Omukazi akaba atari n'omu byabandize kuhangwa. Omukazi tari kihangirwe kya Ruhanga. Omukazi n'ekiihirwe omu mushaija. Ruhanga akakora omushaija, ari byombi omushaija n'omukazi. Bwanyima Yaabataanuura. Reero bwanyima omushaija ku yaaherize kutuura omu nsi kandi n'okweta enyamaishwa amaziina, kandi n'okutuura hanu obwire buralingwa, Ruhanga yaiha orubaju omu rubaju rwa Adamu, nk'ekimwihirwemu reero yaakoram omukazi. "Adamu niwe yaabandize kuhangwa, haakurataho Haawa." Hati reeba.

Kandi Adamu tiwe yaabeihabeihirwe, kureka omukazi niwe yaabeihabeihirwe akahinduka omusiisi.

100 Ruhanga akatwara omushaija. Sitaane yaatwara omukazi. Kireebe, butsimba omumaisho, ekirikukikora ebiro ebi niki? Reeba Ekanisa ya Ruhanga ey'amazima, neegira eti, "Yesu!" Antikristo naagira ati, "Mariya!" Reeba egoy myoyo. Waareeba? Ngigyo aho. "Kasingye Mariya, nyina wa Ruhanga, ohairwe omugisha omu bakazi boona, otushabire itwe abasiisi hati n'omu shaaha y'okufa kwaitu. Amiina. Mariya, shaba!" Oo, mugyenzi, barungi 'mwe! Mwareeba, nikyo ekyo, "omukazi," ekikozeso kya Sitaane. Kristo, ekintu ky'okuramibwa, kandi Ogwo wenka! Nikyo ekyo. Nikyo ekyo.

101 "Adamu niwe yaabandize kuhangwa, haakurataho Haawa." Adamu tiwe yaabeihabeihirwe. Mbwenu nimubaasa muta kugira omukazi omuriisa, omudiikoni? Adamu tiwe yaabeihabeihirwe, kureka omukazi niwe yaabeihwabeihirwe. Buzima, akabeihwabeihwa. Tarateekateekire ngu ashobize, kwonka akaba ari omu nshobe. "Omukazi niwe yaabeihabeihirwe akahinduka omusiisi." Ahabw'okuba, omukazi, buri kaire a-abarikugyenda kuziika ku baaraba omu ruguuto rw'omu rurembo, omukazi niwe yaatumire kwabaho. Buri kaire omwereere ku aborooga, omukazi niwe yaatumire kwabaho. Buri kaire omuntu ku afa, omukazi niwe yaatumire kwabaho. Buri ruju, omukazi niwe yaatumire rwabaho. Buri kintu, n'okufa, omukazi niwe yaatumire kwabaho. Buri kintu kibi, omukazi niwe yaakireetsire. Reero mumutaho kwebembera ekanisa, omuriisa, oo, bishopu obumwe n'obumwe. Omukazi yaashwara.

102 Hati ka mbatware omuri eki, ekindi, nk'edakiika emwe. Mwareeba? Hati, ka tubikuure omu kitabo ky'Abakorinso y'Okubanza 14:32 aho, tureebe eki Paulo arikugamba hanu, reero bwanyima tuyendere kimwe omu bindi, omu kaanya kakye. Kandi titurikwenda kubakyereza omwanya muraingwa munonga, kugira ngu mutaruha munonga mukaremwa kugaruka omu kasheeshe. Kare. Niinyenda kushoma. Ni bangahi abarikwikiriza ngu Paulo akaba ari omwegyesa ou Omwoyo yaabaire ariho? Hati, mwijukye, Paulo eki nakyo akakihandiikira Timoseo. Mwareeba? Ekyo, hati, ekitabo ky'Abakorinso y'Okubanza 14:32. Hati ka tutandikire hanu honyini, kandi tutandikye kushoma hanu, 14:34, niinyikiriza.

Abakazi (baanyu) bahuname omu makanisa; . . .

Mwahurira eki yaagambire?

Abakazi (baanyu) bahuname omu makanisa; ahakuba tibarikwikirizibwa kugamba, kureka (nibaragiirwa) okworoba, . . .

Mwine ebigambo ebirikujuriza ekyo aha rubaju rw'Ebyahandiikirwe? Ku muraabe mubiine, mubijurize enyima haza mureebe yaaba bitaabatwara omu kitabo ky'Okutandika 3:16. Obu Ruhanga yaagambira Haawa, ahabw'okuba akaba ahurikiize enjoka omu mwanya gwa iba, ngu aryamutegyeka ebiro byona eby'amagara ge. Omukazi naabaasa ata kwija akategyeka omushaija, akaba omuriisa nari omudiikoni, kunu Baiburi yaagizire ngu "ayorobere," nk'oku kyabaire kiri omu kutandika? Kunu Ruhanga . . .

103 Ruhanga-Ruhanga taabaasa kuhinduka. Torikubaasa kutuma Ekigambo kyagamba ekintu kimwe hanu n'ekindi hanu. Tikikaakikora. N'ekintu kimwe obwire bwona.

N'ahabw'ekyo, omu kutandika, aho niho, eki kitakahweire, ku ndaatungye omwanya, niinyenda kubagororera egeo nshonga y'Obushwere N'Okushenda. Tinkakikorahoga omuri egi kanisa. Kwonka mureebe egi ndagaano y'enyabubiri. Omwe naagira ngu omukazi naabaasa kushwerwa; ondijo naagira ngu omushaija tarikubaasa kushwera; kandi ogu naagamba eki, kiri, nari ekindi. Hati rindaho kakye haza oreebe eki Baiburi erikugamba, ku turaakihikyeho. Mwareeba? Kare. Hati mureebe hanu.

104 Abakazi (baanyu) bahuname omu makanisa; . . . tibarikwikirizibwa kugamba, kureka (nibaragiirwa) okworoba, nk'oku Ebiragiro nabyo biragiira.

Kandi, omu Ndagaano eya Ira, bakaba batarikwikirizibwa kugamba, 'habw'okuba Paulo hanu naagira ngu bakaba batarikwikirizibwa. Tikwo kiri? "Abakazi baanyu bahuname. N'okworoba." Hati, ku oraajurize ebigambo byawe ebiri aha rubaju rw'Ebyahandiikirwe aho, nikikugarura omu kitabo ky'Okutandika 3:16. Waareeba? Ni kirungi. "Nk'orikutegyekwa, nk'orikutegyekwa ebiragiro."

Kandi baaba . . . kushoborokyerwa ekigambo, k'abaabo . . . bakibuurize-bakibuurize abashaija baabo . . . omuka, ahabw'okuba n'eky'enshoni omukazi kugamba omu kanisa.

Niki, . . .

105 Hati mureebe ako kabuuza omuri Baiburi zaanyu zonna, ahari ekyo, "Niki?" N'enki ekyatumire Paulo yaagamba ekyo kandi n'okukitwaza atyo? Hati, kuri nimwija kutunga amabaruhu agu Abakorinso baahandiikiire Paulo. Hati, nimubaasa kugatunga omu ibiikiro ry'ebitabo ryona erirungi, mwareeba, agu Abakorinso baahandiikiire Paulo. Bakahandiika baamugambira, ahanyima y'abakazi aba abaajunirwe . . . Bakaba baine ru-ruhanga-kazi okwo, owaabaire naayetwa "Atemi." Kandi nawe, akaba ari owa Efeso. Kandi Abakorinso bakaba bamuramya, 'habw'okuba ekaba eri endamya y'abatamanya Ruhanga. Bakabona eibaare okwo omu ishwa eizooba rimwe, eryabaire riine enshusha nk'ey'omukazi. Baagira bat, "Ruhanga n'omukazi, mbwenu atwoherereize ekishushani kye." Kandi ab'ebayaayo nibagira ngu, hekalu yaabo ekaba eri nungi munonga okukira eya Sulemaani. Oo, yoona ekaba eri maburo, ehunzirwe n'ezaabu; kunu, hekalu ya Sulemaani yaabaire eyombekirwe omu myereezi, ehunzirwe n'ezaabu. Mwareeba? Kandi ekaba neegikirira hare munonga. Kandi ekyo, mbwenu, Ruhanga ku araabe yaabaire ari o-omukazi, ahabw'enki, buzima, akaba naabaasa kugira abanyamurwa b'abakazi. Buzima, Ruhanga ku araabe ari omukazi, obwo omukazi omubuurizi ahikire. Kwonka, Ruhanga n'Omushaija, Baiburi neegira ngu N'Omushaija, kandi buzima kwo N'Omushaija. Waareeba? Kandi Ruhanga ku araabe yaabaire ari Omushaija, n'ahabw'ekyo ashemereire kuba omushaija.

106 Hati yetegyereze hanu, "Niki?"

Hati, bamwe omuri abo banyamurwa b'abakazi, ku baahindukire kuruga omu bukaafiri bakataaha omu Bukristaayo, bakateekateeka ngu bakaba nibabaasa kugumya ofiisi zaabo nk'ababuurizi, kufa kurugayo bakagumizamu kunu. Ku baraabe baabuuriire kuri ebya Atemi, baije na kunu babuurire ebya Kristo.

Paulo akagira ati, "Mbwenu, nimugira ngu niimwe Ekigambo kya Ruhanga kyakomookiremu . . .?" Hati hurikiza Eki. Ow'eishe-emwe, abaheereza nibabaasa bata ekyo kukikora? Omushorongo gwa 36.

Mbwenu, nimugira ngu, niimwe Ekigambo kya Ruhanga kyakomookiremu? Nari niimwe mwenka abu kyaiziire?

Omuntu weena orikweteekateekaho ngu ni nabi, nari ow'omwoyo (nangwa tikirkwetaagisa ngu abe nabi; kureka omuntu oine emiteekateekyere y'omwoyo), amanye ngu eki mbahandiikiire n'ekiragiro kya Mukama. (Ekyo nimukiikiriza?)

Kandi, kandi weena-weena otarikukiikiriza tarikwikirizibwa.

Hati, okwo n'okushoboora kurungi munonga nk'oku ndikumanya kukishoboora. Mwareeba? Akagira ati, "Omuntu weena ku araabe ari omuntu w'omwoyo, nari nabi, naija kwikiriza ngu ebi ndikuhandiika hanu n'Ebiragiro bya Mukama." Kwonka yaagira ati, "Ku araabe-ku araabe atarikukiikiriza tarikwikirizibwa." Waareeba, nikyo kintu kyonka eki orikubaasa kukora. Ku baraabe nibenda kugumizamu nibatwaza batyo, noobareka bagumizemu, 'habw'okuba akakireeba nikitandikira okwo.

107 Kandi omukazi omwe akangambira, yaagira ati, "Oo, Paulo akaba ari omugurusi orikwanga abakazi."

Akaba atarikwanga abakazi. Nimumanya, Paulo akaba ari entumwa, aha Kanisa y'Abanyamahanga. Reeba hanu. Okaba noomanya ngu Paulo . . . Ni bangahi abarikwikiriza ngu ekyo nikyo Paulo yaabuuriire? Ekyo nikyo ya-yaagambire hanu? Kandi Paulo akagamba . . .

Noogira oti, "Mbwenu, rindaho kakye hati, Ow'eishe-emwe Branham. Rindaho kakye! Hati, bishopu waitu naagira ngu ekyo tikiine nshonga. Omureeberezi omukuru, w'aba Assemblies naagira ngu tikiine nshonga. Bishopu w'aba Oneness naagira ngu tikiine nshonga."

Tindikufayo ebi barikugamba. N'ebishuba! Kandi mbagambiire ngu eki nituza kukihamisiriza munonga. Kandi baanabi b'ebishuba bakaabaasa kugamba batyo. Ahabw'okuba Baiburi neegira ngu, "Omuntu weena orikweteekateekaho kuba ow'omwoyo, nari nabi, amanye ngu eki mbahandiikiire n'ekiragiro kya Mukama." Kandi omwoyo gwe ku guraabe guitarikwikirizana n'Ekigambo ekyo, ni nabi w'ebishuba, eky'okubanza kya byona. Haakiri mbe orikwanga abakazi okukira kuba enkunzi y'abakazi, okukora ekintu nk'ekyo, kugumisiririza ekintu nk'ekyo omu Kanisa ya Ruhanga, ekirikuhanisa ebiragiro bya Ruhanga. Kandi Paulo akagamba . . . Mubiikuure Abagalatia 1:8. Paulo naagira ati, "Maraika orugire omu Iguru ku yaakubabuurira Engiri etari nka i naababuuriire, akyeenwe." Hati Ekyo nooza kukigira ota?

108 Hati noogira oti, "Kandi shi ahu Kirikugira ngu, 'Batabani baanyu na bahara baanyu baryaragura,' omuri Yoeli, a-ahu Petero yaajuriize aha Izooba rya Pentekoote?" Ekyo buzima nikwo kiri.

Okaba noomanya, omu Ndagaano eya Ira, ngu omuhanda gwonka, kandi na hati nigwo muhanda gwonka, ogu omuntu weena arikubaasa kuza omu ndagaano, kurabira omuri Abrahamu, niwe owaaraganisiibwe, kandi a-akamanyiso k'okuraganisibwa kakaba kari okusharwa. Ni bangahi abarikumanya ekyo? Ogwo akaba ari Ruhanga naahamya.

109 Nk'ow'eishe-emwe w'Omubaputisiti, akagira ati, "Ow'eishe-emwe Branham, ahabw'enki, itwe Ababaputisiti tukaheebwa Omwoyo Orikwera."

Naamubuuza nti, "Mukamuheebwa ryari?"

Yaagarukamu ati, "Eshaaha ei twaikiriza."

Naagira nti, "Paulo akababuuza ati, 'Kwiha obu mwaikiriza, mukaheebwa Omwoyo Orikwera?'" Mwareeba? Naagira nti, "Hati, imwe Ababaputisiti 'mwe Ogwo mwije mumutungye, reero nituza kugamba naimwe aha burinzi Obutahwaho." Naagira nti, "Kwonka, mbwenu, nookiiha nkahi ekiri nk'ekyo?" Waareeba?

Akagira ati, "Kwiha obu mwaikiriza Mukamuheebwa?" Bakaba bari abaikiriza, nibateera akaari kandi nibashemererwa hamwe n'ebindi byona. Kwonka bakaba batakahairwe Omwoyo Orikwera. Paulo naagira ngu bakaba batakamuhairwe. Mwareeba? "Kwiha obu mwaikiriza mukaheebwa Omwoyo Orikwera?"

Baamugarukamu bati, "Titurikumanya yaaba habaho Omwoyo Orikwera."

Yaagira ati, "Mukabatizibwa omu kubatizibwa ki?"

Baagira bati, "Tukabatizibwa." Kwonka, omu muringo ogugwire, mwareeba. N'ahabw'ekyo akaba naateekwa kubatizibwa, ogundi murundi. Nikwo.

110 Mbwenu yetegyereze eki hati, ngu aba bakazi ababuurizi, ku baataahiremu, bakateekateeka ngu nibaza kugumizamu n'obushoboorozi bwabo. Kwonka buzima tikirikwikirizibwa Ruhanga kukora batyo. Kandi reka . . . hati obu tukiri ahari eri ishomo ryonyini hanu, abakazi aba, waareeba. Kandi ekyo, hati, akagira ati, "Ku haraabe hariho omuntu weena omuriimwe, ow'omwoyo, nari nabi, amanye ngu eki mpandiikire n'Ekiragiro kya Mukama. Kwonka ku araabe atarikukiikiriza tarikwikirizibwa." Kandi egoyi niyo nshonga e . . . egi Tabirinaakuru etarikwemerera haza ekeemeka abakazi ababuurizi, abakazi abadiikoni, nari ekintu kyona ky'okukorwa omukazi nka ofiisi y'ekanisa egi, n'ahabw'okuba Ekyahandiikirwe eki kiri hanu kandi nikireebwa butunu.

111 Hati, Baiburi neegira eti, "Batabani baanyu na bahara baanyu baryaragura." Hati, ekigambo kuragura nikimanyisa ki? Kisherure. "N'okugamba ekintu, oshukirweho," nari "okuhanuura ekintu ekiraije kubaho kitakabaireho." N'ekigambo ekiine amakuru abiri nari maingi.

Nk'okweza nikimanyisa "kushemezibwa, kikateebwa aha rubaju kugira ngu kikozesibwe." Mwareeba? Nari, n'ekigambo ekiine amakuru abiri nari maingi, kirikumanyisa ebintu ebirengire ahari kimwe, nk'oku tubiine bingi munonga omu Rungyereza hanu.

Nk'oku, twakugamba ekigambo "board" (orubaaho). Mbwenu, board nikimanyisa ki? Noogira oti, "Mpaho, naamanyisa ngu ashashuriire eby'okurya bye." "Ngaaha, tabishashuriire. Amanyisize ngu atimbire ekiina." "Ngaaha, takitimbire. Amanyisize ngu amuruhiize." Nimmanyisa, nooreeba, ekigambo kyonka, nooteekwa kumanya eki orikugambaho. Waareeba?

Kandi okwo nikwo kiri hamwe n'ekigambo eki ekiine amakuru abiri nari maingi, ahu kirikugira kiti, "Batabani

baanyu na bahara baanyu baryaragura." Hati, omuringo gwonka ogu Ruhanga . . .

112 Ogu Mubaputisiti akagira ati, "Mpaho, tukaheebwa Omwoyo Orikwnera." Naagira . . . "Obwire obwo obu tukiikiriza." Naagira . . . Hati, mwareeba, yaagira ati, "Ruhanga akaha Abrahamu e . . ." Ati, "Abrahamu akaikiriza Ruhanga." Okwo nikwo yaakigambire. Yaagira ati, "Abrahamu akaikiriza Ruhanga kyamubarirwa kuba okuhikiirira." Ni bangahi abarikumanya ngu ago n'amazima? Hati, reeba oku-oku Sitaane arikubaasa kwanguhirwa kukitaasya omu w'eishe-emwe. Mwareeba, kyanguhi munonga. Hati, ekyo n'Ekyahandiikirwe.

Ow'eishe-emwe, ninkugambira, omuri eki aharuguru hanu, oshemereire kushukwaho amajuta otakataahire omuri eki. Oshemereire kutaaha omu mwanya ogwehereire kandi oshabe. Abantu bagira ngu, "Ahabw'enki otarikushohora okaza kureeba abantu abo?" Ow'eishe-emwe, ku oraabe noozza kugambira abantu nari kubeegeyesa, kikaabaire kirungi oyehereere, na Ruhanga, okumara akaanya, otakagiire ahari ekyo kituuti. Buzima, mwareeba, 'habw'okuba Sitaane n'omunyabwengye, omunyabwengye munonga.

113 Yaagamba hati, yetegyereze, yaagira ati, "Abrahamu akaikiriza Ruhanga, kyamubarirwa kuba okuhikiirira." Ekyo kihikire. Yaagira ati, "Hati, ekindi n'enki eki Abrahamu arikubaasa kukora kutari okwikiriza?"

Naagira nti, "Nikyo ekyo kyonka eki yaabaire naabaasa kukora."

Yaagira ati, "Ekindi n'enki ekirikukira ahari ekyo eki orikubaasa kukora nari eki ondijjo muntu weena yaakubaasa kukora kutari okwikiriza?"

Naagira nti, "Nikyo ekyo kyonka eki turikubaasa kukora. Kwonka reeba, ow'eishe-emwe, bwanyima Ruhanga akagarukanisa, nimmanyisa akasiima okwikiriza kwa Abrahamu. Yaamuha akamanyiso, akamanyiso k'okusharwa, nk'akamanyiso k'endagaano. Waareeba? Akakamuha. Akagira ati, 'Hati, Abrahamu, Naasiima okwikiriza kwawe, n'ahabw'ekyo Naaza kukuha akamanyiso hati kworeka ku Naakwakiira.'"

N'ahabw'ekyo yaashara Abrahamu, kandi ako niko kaabaire akamanyiso k'endagaano. Kandi hati omu biro ebi . . . Hati, omukazi akaba atarikubaasa kuba omuri egoo ndagaano; kureka omukazi oshweirwe wenka. Kisherure, okaba otarikubaasa kushara omukazi; n'ahabw'ekyo kikeetaagisa kutaahamu, ahabw'okuba we na iba n'omuntu omwe. Baba batakiri babiri; baba omwe. Ni bangahi abarikumanya ekyo? Ebyahandiikirwe nikwo birikugira. N'ahabw'ekyo, omukazi ahabw'okushwerwa, obwo na-naaba omwe na iba. Kyo gumizamu omu maisho hanu oreebe hanu omuri Timoseo, nihagamba ekintu nikyo kimwe, nihagira hati, "Kwonka omukazi ku ariguma omu kwikiriza, omu kwera, hamwe n'omu kwerinda, aryaguma atabaarukye gye omu kuzaara abaana."

114 Hati, kwonka, nabwo, okusharwa kw'omu Ndagaano eya Ira kukaba kuri okw'aha mubiri, kwonka omuri egi Ndagaano Ensyo, Yoeli akagira ati, "Ndyashuka Omwoyo wangye aha bantu boona, kandi batabani baanyu na bahara baanyu baryaragura." Hati, ekigambo kuragura tikirikumanya okwegyesa. Okuragura obumwe nikimanyisa "okugamba ebibaireho, oshukirweho Omwoyo," nari "okuhanuura ekintu ekirikwenda kubaho." Kandi nitumanya ngu hakaba hariho baanabikazi omu Ndagaano eya Ira. Bakaba batagambira omu kyombeko, kugambira omu kanisa, omu bateeraine, nk'omwegyesa. Kwonka we, Anna, hamwe na baangi omuribo omuri hekalu, bakaba bari baanabikazi. Kandi bakaba baribo. Miriamu akaba ari nabikazi, nari ekintu nk'ekyo. Omwoyo akaba amuriho, ago n'amazima, kwonka akaba aine ahu arikugarukira. Buzima, abakazi nibabaasa kuba baanabikazi ebiro ebi; kwonka batari beegyesa, hamwe n'ebindi, enyima y'ekituuti hanu. Ku oraakikore, nootumanootuma Baiburi Yaayehakanisa. Baiburi terikubaasa kugamba ekintu kimwe hanu, n'ekindi kintu hanu. Neeteekwa kugamba ekintu kimwe obwire bwona kitari ekyo Teri Kigambo kya Ruhanga. Mwareeba? N'ahabw'ekyo, "Batabani baanyu na bahara baanyu baryaragura," nikimanyisa ngu obundi "baryahanuura ebiraije kubaho" nari "kuha obujurizi." Hati, ekyo kisherure, kwata kashoborozi ya Baiburi haza oreebe ekyo ku kiraabe kitahikire. "Batabani baanyu na bahara baanyu baryaragura."

115 Hati, nabwo Baiburi neegamba aha mukazi owaayegizire, atyo, nari-nari owaayegambire ngu na . . . Eki kikaakora hamwe n'ekanisa Enkatorika, kandi nabwo nikikora hamwe . . . hamwe n'eri ishomu eri twaza kugambaho hati. Tubiikuure omu Kitabo ky'O-Okushuururwa, tukwate nk'e-eshuura ya 2 n'omushororongo gwa 20, obu tukiri hanu haihi nakyo, kugira ngu mubaase kwetegyereza hanu kandi mureebe oku ekyo kintu kirikubaasa kuba ekya sitaane, eky'okugamba ebiribaho omuri ebi biro by'aha muheeru, oku ngu ebi, eki omukazi ogu araije kuba. Mwijukye, ekanisa Enkatorika n'omukazi. Twaheza kukishoma, tikwo? Hati hurikiza eki, oku Kirikugamba. Okushuururwa 2:20, "Kwonka hati . . ." Naagambira egi kanisa ya Suatira, mwareeba, "Kwonka hati . . ." Nibwo busingye bwa rwagati aho, obwarabire omu Busingye bw'Omwirima.

Kwonka hati nyine eki ndikufa naiwe; ogumisiririza omukazi Yezebeeli, orikweyeta nabikazi, kandi oyegyesa . . . abahuku bangye, akabasingura ngu bashambane, kandi ngu barye ebitambiirwe ebishushani. (Mwareeba?)

116 Hati, ku oraabe oretegyereize, reeba obusingye bw'ekanisa obu; reero tuhendere. Bwanyima omu kasheeshe nituza kkwata ebintu ebi ebindi. Reeba. Omuri . . . Ahansi y'e-ebikondo by'etabaaza eby'ezaabu by'eihema y'Abayudaaya, omu nda, eby'emigaati y'okumurikwa n'ebindi nk'ebyo, hakaba harimu ebikondo by'etabaaza mushanju eby'ezaabu. Mwena ekyo nimukimanya. Mwareeba? Hariho obusingye mushanju bw'ekanisa. Obwo nibumanyisa obusingye mushanju bw'ekanisa, omu buryo obwo. Hati ku muraayetegyereze omu Kitabo ky'Okushuururwa 1, nitireeba Yesu ayemereire omu busingye mushanju bw'ekanisa, ebikondo by'etabaaza

mushanju eby'ezaabu, ku yaahindukire yaareeba Orikushusha Omwana w'omuntu, ayemereire, ajwaire oku kyabaire kiri. Akaba ari Omugore ayemereire ahagati y'ebikondo eby'etabaaza, ayorekirwe.

Hati, omu Ndagaano eya Ira, bakaba bakwata e . . . egi tabaaza emwe, bagihemba, bakwata endijo tabaaza bagicumika ahari egyo, bacumika ahari egyo, bacumika emwe aha ndijjo, batyo, kuhitsya obu baabaire bahemba ebikondo by'etabaaza mushanju byona.

117 Ku oraayetegyereze, aha kutandika, obu Ruhanga yaatandika kukoragana n'Abayudaaya, kandi bakaraba omu busingye bukuru munonga. Reero obusingye oburukukirayo kuba obw'omwirima obw'enkoragana y'Abayudaaya, obu Ruhanga yaakoragaine n'Abayudaaya, bukaba buri omu butegyeki bwa Ahabu. Kandi ku oraayetegyereze, twaba nitushoma obwo busingye bw'ekanisa aho, Naagaruka abugarukaho. Hati, Akagamba ati, "Ebintu bikye ebyahingwire," kandi yaagamba. Hati, omuri obwo Busingye bw'Omwigirima bwonyini, emyaka rukumi na magana ataano okwo, nari omu bwire bwa Ahabu, okubanza, n'Abayudaaya. Obusingye bw'omwigirima oburukukirayo obu baagizire, n'obu Ahabu yaashwera Yezebeeli atyo akataasya omuri Israeli okuramya ebishushani, reero kikareetera abantu boona kuramya nibakuratira Ahabu, nibakuratira ruhanga wa Yezebeeli. Nimwiju, bakakwata, bataho Ashera, baasheenya amatambiro ga Ruhanga. Reero Elisa yaagambira ahaiguru, ku niwe "omwe wenka," kwonka Ruhanga akaba aine magana mushanju abataratsimbiire Balamu amaju. Ekyo nimukijuka? Ekyo nikyo kirikushushanisa egyo Kanisa eyaatoorainwe neerugayo. Mwareeba aho? Mwareeba oku kiri?

118 Hati, omu kanisa egi, ku oraayetegyereze ekanisa y'okubanza, ekanisa ya Efeso, ekaba eri ekanisa y'amaani. Akagira ati, "Okiine, amagara." Kandi ku oraayetegyereze, buri kanisa, ekatandika kukyendeera, kukyendeera, okuhitsya obu yaahikire omuri Suatira. Bwanyima, egyo myaka rukumi na magana ataano. Bwanyima Yaarugirayo aha rundi rubaju na, "Kandi mwine omushana mukye. Muhamye ekyo eki mwine, kitari ekyo ekikondo eky'etabaaza yaanyu kiihweho." Kandi kyagumizamu kyahika omu busingye bw'ekanisa ya Filadelufia, reero kyataaha omu busingye bw'ekanisa ya Laodikea.

119 Hati, ekirungi nkiki hanu. Oo, mugyenzi! Eki ninkikunda buzima, Ow'eishe-emwe Smith. Waareeba, ranzya eki. Hati, omuri obu busingye bw'ekanisa, nk'oku tuburabiremu . . . Hati reeba eki. Obusingye bw'okubanza bw'ekanisa bukaba buri obwa Efeso, obusingye bw'ekanisa ya Efeso. Hati, buri bumwe ahari obwo busingye bw'ekanisa, okuhitsya obu bwahikire omuri egi myaka rukumi na magana ataano, ku oraayetegyereze . . . Hati ku oraataahe omuka okishome ekiro eki, ku oraabe oine obwire, nari kare omu kasheeshe, otakaizire aha kanisa, eshuura 1, 2, n'eya 3 z'Okushuururwa. Nooza kushanga ngu, buri bumwe ahari obwo busingye bw'ekanisa, Naagira ati, "Oine amaani makye, toyehakaine Eiziina Ryangye," okuhitsya obu Yaahikire ahari egi myaka rukumi na magana ataano ya Suatira, Obusingye bw'Omwigirima. Bwanyima Yaarugirayo aha rundi rubaju, yaagamba.

. . . oine eiziina ry'okuba ohuriire, kwonka ori ofiire.

120 Kandi obu, tihariho na bumwe ahari obu busingye bw'amakanisa obundi, obwo nari obusingye bw'ekanisa ya Filadelufia, obwagarukire kwetwa eryo Eiziina na kakye. Tiburatungire eryo Eiziina na kakye, 'habw'okuba rikabura omuri obu bwire. Hati, oo, ekyo ka nitubaasa kukita ahari ezo nyegyesa z'ebishuba hati, munda aho honyini, tukabooreka ku niyo nyina, ekanisa Enkatorika, nyina waazo zonna, oku eri "nyina, Babulooni, y'omubonano." Kandi ekyo ni, reeba, obu busingye bw'ekanisa hanu obu burugayo, bukaba bwine omushana mukye, bwanyima gwatandika kukyendeera, kukyendeera, reero bwaza omu kibiina ky'ediini enyima hanu, egi myaka rukumi na magana ataano. Kandi bwarugayo hati, butari nk'Ekanisa ya Mukama Yesu Kristo, kureka nk'ekanisa Enkatorika. Luteeri akarugayo ata? Nk'ekanisa y'aba Luteeri. Omubaputisiti akarugayo ata? Nk'ekanisa y'Ababaputisiti. Ritari Iziina Rye, ritari Iziina Rye; erindi iziina, "oine eiziina." "Ahakuba tihariho rindi iziina ahansi y'Eiguru eryahairwe, erishemereire kutujuna, kureka Eiziina rya Yesu Kristo ryonka." "Oine eiziina ry'okuba ohuriire, kwonka ori ofiire," eryo n'ery'ekyo kigombe ky'ediini.

121 "Oo, ndi Omupuresibateeri," kwonka ori ofiire! "Oo, ndi Omubaputisiti," kwonka ori ofiire! Nooba ohuriire waahinduka ohuriire omuri Kristo Yesu wenka. Ekyo kihikire. Okubatiza kwanyu kw'ebishuba, amaizi, okubatiza kw'ebishuba; okushukyeera, okushukaho, omu mwanya gw'okwibika; nimukozesa "Ishebona, Omwana, n'Omwoyo Orikwera," omu mwanya gw'Eiziina rya Mukama Yesu Kristo. Ebintu ebyo byona eby'ebishuba nibija, Baiburi neegamba, nk'okubishukamu n'amaani munonga nk'oku kirikubaasika. Kwonka hanu nitubagumisiriza tugumizamu nabo tuti, "Mbwenu, ekanisa yangye Neekiikiriza eti." Kwonka Baiburi neegamba Eki. Mwareeba? Tihariho ebintu nk'ebyo. Tihariho ekintu nk'ekyo.

122 Kandi tihariho omwanya omuri Baiburi ahu baraihireyo orurimi rwabo reero bakarya Ukarisitia erikwera, n'omusaserdooti akanywa viinyo reero bakakyeta Omwoyo Orikwera. Tikikabahoga omuri Baiburi ahu barakwataine omu ngaro kandi bakaheerezana omukono gwa buryo gw'okukwatanisa, reero bakakyeta Omwoyo Orikwera. Tihakabahoga mutu weena oraimukire akagira ati, "Hati ndi omwikiriza," haza akaheebwa Omwoyo Orikwera. Kuri kyakozirwe kityo, ngugu hanu omuringo ogu Ebyakozirwe 2 yaakushomirwe, "Kandi Eizooba rya Pentekoote obu ryahika, eifo omu ruguuto hakareetwamu omusaserdooti Omurooma, kandi akaba ajwaire engoro. Yaija, yaagira ati, 'Mwena mwiheyo endimi zaanyu hati reero murye Ukarisitiya erikwera, okushembera kw'okubanza.'" Ogwo tigukaabaire omuringo gw'okushomamu Ebyakozirwe 2?

123 Mpaho, imwe Abapurotesitante naimwe nikwo muri babi mutyo. Nimugarukayo reero mugira muti, "Hati

nitwija kubairira haihi imwe Abametsodisiti, mubata aha mukono gwa buryo, mubaheereza omukono gwa buryo gw'okukwatanisa, n'ameezi mukaaga g'omugigi." Ekyo nimukishoma nkahi omu Byakozirwe 2? Mwareeba? Ekyo nimukiha nkahi? Mwareeba?

Nikigira kitii, "Ku baabaire boona bateeraniire omu mwanya gumwe, omu kwikirizana kumwe!" Aho tiharaizireho omureeberezi n'omwe reero akakora eki, kandi aho tiharaizireho omusaserdooti n'omwe akakora eki. "Kureka okuhoorera kukaruga omu Iguru, nk'omuyaga oku guhoorera n'amaani, Omwoyo yaijurira kimwe omu nju omu baabaire bashutami." Okwo nikwo Baamuhairwe, eego, sebo, nk'omuyaga oku guhoorera n'amaani kuruga omu Kitiinisa. Ti kuruga omu ruguuto eruguru nari kuruga omu kigombe ky'ediini nanka.

... oine eiziina ry'okuba ohuriire, kwonka ori ofire.

124 Mwareeba, enyikiriza zaanyu n'ebigombe by'amadiini bikingiire Ruhanga bityo, kuhitsya obu, "Nitwikiriza eki, kandi nitwikiriza ngu ebiro by'ebi'amahano bikahwaho." Ni nabi w'ebishuba orikugamba ekyo. Ni nabi w'ebishuba orikukugambira, ngu, "Noobaasa kukwata omu ngaro z'ondijo nikwo oheebwe Omwoyo Orikwera." Ni nabi w'ebishuba orikukugambira ngu, "Nooheebwa Omwoyo Orikwera waikiriza." Ni nabi w'ebishuba orikukugambira ngu, "Oshemereire kushukwaho amaizi kandi oshukyeerweho amaizi omu mwanya gw'okwibikwa mu maizi." Ni nabi w'ebishuba orikukugambira ngu "Obatizibwe omu Iziina rya Isheboona, Omwana, n'Omwoyo Orikwera," kunu hatariho Ekyahandikirwe kyakyo omuri Baiburi. Ekyo kihikire. Tihariho Ekyahandikirwe kyona omuri Baiburi ekirikukugambira kubatizibwa, ahu omuntu weena arabatiziibwe, kureka omu Iziina rya Yesu Kristo. Kureka, abakuratsi ba Yohaana; kandi kikabeetaagisa kwija bakagaruka bakabatizibwa, omu Iziina rya Mukama Yesu Kristo, kutunga Omwoyo Orikwera. Ekyo kihikire. Hati, egyo ti nyegyesa ya Yesu Wenka. Nimmanya enyegyesa ya Yesu Wenka. Egi tiyo. Egi n'enyegyesa ya Baiburi. Ekyo kihikire.

Kwonka nkikyo aho. Nookikorera ki? Nyoko ngugwo aho. Ngugwo aho nyina w'ezo nyikiriza.

125 Hati, reeba enyima omuri Baiburi haza ongambire ahu omuntu weena yaashukirweho amaizi. Abametsodisiti, Abapuresibateeri, Abakatoriki, mungambire ahu n'obu yaakuba omuntu omwe arashukirweho amaizi, omuri Baiburi. Mungambire ahu omuntu arashukirweho amaizi, omuri Baiburi, ahabw'okusaasirwa ekibi. Muhamgambe. Nimubaasa kuhabona? Ku muraahabone, mwije ahariinye, ninza kushuuma omuri oru ruguuto rw'omu rurembo nyine ekipande aha mugongo gwangye, kihandiikirweho ngu, "Nabi w'ebishuba! Ntwire ndi omu nshobe." Nari, musherure n'obu gwakuba omwanya gumwe omuri Baiburi yoona ahu omuntu weena arabatiziibwe omu iziina rya Isheboona, Omwana, n'Omwoyo Orikwera, nk'oku ebicweka makumi munaana ahari igana byanyu mwabatiziibwe. Muunyorekye n'obu kyakuba Ekyahandikirwe kimwe ahu omuntu weena arabatiziibwe atyo, reero niinyija kuta ekipande aha mugongo gwangye ekihandiikirweho ngu, "nabi w'ebishuba," kandi nshuume nakyo omu ruguuto bat. Kandi muunyorekye ahu omuntu weena arabatiziibwe, omu Kanisa ensya, ou kitareetaagiise kugaruka akabatizibwa ogundi murundi, omu . . . atari omu iziina rya "Yesu" wenka, kureka omu Iziina rya Mukama waitu Yesu Kristo. Ekyo kihikire. Mureebe ekyo ku kiraabe kitahikire.

126 Kandi, hanu, niki? Akaba ari nyina wa baamaraaya. Ekyatumire yaaba maraaya niki? Ekyamukozire enshambani niki? Enyegyesa ye! N'enki ekyabakozire baamaraaya? Enyegyesa ye!

Egyo niyo nshonga erikutuma tutaaagumisiriza ebigombe byabo by'amadiini n'ebigunjano byabo. Nituguma tushemeire na Baiburi egi. Tindikumanya oku orikugituura kurungi, kwonka nabwo, Noogyegyesibwa. Nikwo. Ekyo kiri ahariiwe. Tindikubaasa kutuma waagituura. Nimbaasa kukugambira Amazima kwonka. Egyo niyo nshonga ahabw'enki tutari kigombe ky'ediini. Tinka-tinkaayenzire ngu tweshiishe nitutaaha omu bintu nk'ebyo, kuteekwa kwehayo n'obweziriki aha bigunjano bimwe. Haakiri ntoore omuhanda ogw'aba Mukama abakte abarikugaywa. Haakiri ngume nshemeire kandi ndi mwere omu maisho g'Ekgambo na Ruhanga, reero nyemerere aho, ngire nti, "Tihariho shagama y'omuntu n'omwe aha kijwaro kyangye." Egyo niyo nshonga erikutuma twaguma omuri Tabirinaakuru ya Branham. Egyo niyo nshonga ahabw'enki tutari aba Assemblies. Egyo niyo nshonga ahabw'enki tutari ab'ekigombe ky'ediini ekya Oneness. Egyo niyo nshonga ahabw'enki tutari ab'ekigombe ky'ediini ekya Jesus Only. Egyo niyo nshonga ahabw'enki tutari Abametsodisiti. Egyo niyo nshonga ahabw'enki tutari Ababaputisiti. N'e-ekanisa nkye hanu. Buzima titwine kigombe ky'ediini. Tukomoroirwe, omuri Kristo. Egyo niyo nshonga erikutuma twaguma oku turi. Kandi Ruhanga atuhaire omugisha, Ruhanga naatuhwera.

127 Hati, nitubaasa kubagambira ahabw'enki nitusembera, tubagambire ahabw'enki nitunaabisana ebigyere, ahabw'enki tutarikwiriza baamemba kusembera twaba nitumanya ngu bari omu kibi. Egyo niyo nshonga ahabw'enki, saabiiti ibiri nari ishatu ezi ezhilweire mbaire ninduga ahari memba omwe nza aha ndiijo, ahu mubaire mwine empaka zaanyu nkye hanu, naimwe. Nimugyendagyenda, omwe atakaabaasa kugamba n'ondijo, mukirabanaho omu muhanda ohindura omutwe gwawe. Mwashwara, imwe abaanyweire aha kikopo kya Ruhanga ekihairwe omugisha hanu, aha itambiro hanu, kandi mukeeyeta ab'eishe-emwe n'ab'eishe-emwekazi, kwonka mukaza aha simu mukagambuurana. Timushemereire kwetwa Abakristaayo mwaba muri mutyo. Kihikire. Murugye ahari ago masimu; ku muraabe mutarikubaasa kugamba kurungi aha muntu, mutagamba na kakye. Mwijkuye, Ruhanga naaza kubajunaana. Obwire bwona omwoyo nk'ogwo gwaba guri omuriwe, omanye ngu t'origye na Ruhanga. Ku oraabe otarikwehuriram . . .

128 Omuntu ku araabe ari omu kibi kyona, gyenda omumanyise mugarukane. Ku muraabe mutarikubaasa kugarukana, otware ondiijo. Ticky'okutangaaza Ruhanga tarikubaasa kuta ekanisa Ye omu buteeka, 'habw'okuba

timurikukikora kurungi. Omu mwanya gw'okuza aha simu mukagamba ahari ogu, ekibaireho, n'obudiini bukye bw'ebikwangara n'ebindi nk'ebyo, omu buryo obwo. Omu mwanya gw'okukora ekyo, ahabw'enki mutarikukora eki Baiburi erikugamba? Ow'eishe-emwe ku araabe agwire omu kibi, gyenda omumanyise oreebe yaaba noobaasa kugarukana nawe. "Mbwenu, hati, eki yankozire!" Tindikufayo eki yaakozire, gyenda omumanyise oku biri kwona! Tikirikugira ngu niwe oshemereire kwija ahariiwe. Gyenda omumanyise ku araabe ari omu nshobe. Noogira oti, "Niwe ori omu nshobe. Niwe oshemereire kwija ahariinye." Ekyo tikyo Baiburi erikugamba. Baiburi neegira ngu niiwe oshemereire kugyenda kumumanyisa. Ku araabe ari omu nshobe, gyenda omumanyise.

Reero ku araayangye kukworobera, otware ondijjo, nka kareebi.

Kandi ku araayangye kureeba kareebi ogwo, obwo ogire oti, "Hati naaza kutwara omuriisa waawe." Reero omugambire, ogire oti, "Ninza kukigambira ekanisa, kandi omu biro makumi ashatu okuruga hati, imwe ab'eishe-emwe ku muraabe mutakagizire eki mwacwamu . . . Ow'eishe-emwe ogu hanu naayenda kumara enhonga. Iwe torikwenda. Kandi ku oraabe otacwiremu omu biro makumi ashatu, obwo nihaza kubaho ki, nooba otakiri naitwe."

129 Baiburi neegira eti, "Ku araayangye kworobera ekanisa, obwo abe nk'omunyahanga n'omuhooza." Nimureeba, ow'eishe-emwe yaaba ari ahansi y'obwo burinzi bw'ekanisa, Eshagama ya Kristo neeba neemurinda. Egyo niyo nshonga erikutuma tutaaressa ekanisa neegyenda nk'oku eshemereire. Hati, kare, Egi n'Enyegyesa y'Ababapu- . . . y'ekanisa y'Ababaputisiti, nimmanyisa eya Tabirinaakuru ya Branham hanu, ku muraakikore. Mwareeba, ahabw'enki tuta . . .

130 Noohika hanu, ka tugambe, eky'okureeberaho, abantu babiri, ka tugire ngu niinye na Leo. Nondeka ku . . . Naanye ngire nti, "Mbwenu, a-akanshaagiza." Ekyo tikirikureetaho entaaniso yoona. Niinye oshemereire kugyenda nkumanyisa. Mpaho, ni memba w'ekanisa egi. A-akahinduka Omukristaaayo. Nitushembera hamwe hanu aha rubaju rw'ekituuti. Kandi tukabatizibwa omu Iziina rya Mukama Yesu. Tutwire nitugyenda hamwe kurungi, nk'ab'eishe-emwe, bwanyima haagira ekyabaho.

Ti muntu ogwo. Emirundi makumi mwenda ahari igana n'aba ari Sitaane orikuba agiire rwagati y'abantu abo. Ti bantu abo. Ni Sitaane. Kandi ku oraarekye Sitaane akakora ekyo, nooba nookora kubi ow'eishe-emwe mugyenzi waawe. Ekyo kihikire.

131 Mpaho, hariho ekishobire ahagati yangye na Leo; ka tuyende tukigorore. Kandi ku oraareebe ngu haine ekirih, n'obujunaanizibwa bwawe kwija okatumanyisa, okagira oti, "Imwe boojo 'mwe babiri mwije hanu mugarukane. Twaza kugorora ekintu eki." Hati, reero, ku kiraahikye aho, nitwija kureeba ngu, mbwenu, turi hanu. Ngire nti, "Mpaho, eky'okubanza, ku tu-turaabe tutarikubaasa kwikirizana, reero mwije aha kanisa batyo."

Kwonka ku mu-muraabe mutakikozireho ekintu kyona, nabwo, Eshagama ya Yesu Kristo neeturinda twemb. Mwareeba? Kwonka kandi egyo-egyo kookoro eya ira neeza kuzaara endijjo kookoro, n'egyo kookoro ezaare endijjo kookoro, reero ekintu kyona kirware, kyona, ekanisa yoona. Bwanyima ohikye ahu orikutaaha omu kanisa, efukire buzima, kikwetaagise kweta omurinzi w'ekanisa kwija akaata orubaare, abashomi batakataahiremu. Hati, nimumanya ngu ekyo kihikire. Buzima efukire kwo! Omuntu ashutame aho, noomanya, kandi ataagira eki yaagamba. "Mpaho, tukaba tuba ab'omwoyo munonga." Mbwenu, n'enki ekyabaireho? Okaba oiruka kurungi, n'enki ekyabaireho? Waareeba, ebibi byawee nibikutaanisa. Kandi Ruhanga aryakibajunaana, b'eishe-emwe. Hati mugorore ekintu eki.

132 Tihariho kintu ekishobire ahariinye, tihariho kintu ekishobire ahari Leo; ni Sitaane otugiire rwagati. Ekyo kihikire. Mugorore ekintu ekyo. Gyenda omumanyise. Reero ku araayangye kukworobera nari ku ndaayangye kukworobera, oku kiri kwona, obwo okigambire ekanisa. Ku araayangye kwija kugarukana n'ekanisa egoy omu biro makumi ashatu, obwo naaba atakiri ahansi y'oburinzi bwa Yesu. Nitumuayo. Ekyo buzima kihikire. Bwanyima oreebe ekiraabeho. Murekye Ruhanga amuhane. Mwamwhaho engaro zaanyu. Mukozire ekirikukirayo oburungi eki murikubaasa kukora. Reero murekye Ruhanga amukwatemu akaanya kakye; Naamuhayo ahari Sitaane. Obwo naaza kwija. Ku araabe ataizire, ebiro by'amagara ge nibicuubwaho.

133 Nimwijuka omuri Baiburi, obu haabaire hariho ow'eishe-emwe otarenzire kugarukana na Ruhanga? Ni bangahi abarikwiju ekyo? Akaraara na muka ishe, kwonka yaayanga kweteisa ku baamuteisize. Paulo akagira ati, "Mumuheyo ahari Sitaane, ahwerekyerere omu mubiri." Nooshanga ngu, omu kitabo ky'Abakorinso ya Kabiri, akeegarukamu.

134 Nyine ow'eishe-emwe, omunywani murungi, ninkunda kweta eiziina rye hanu, ow'eishe-emwe omubuurizi. Kandi ogu w'eishe-emwe omubuurizi, eiziina rye n'Ow'eishe-emwe Rasmussen. Baingi omuriimwe abaheereza abashutami hanu, ekiro eki, eiziina rye riri omu mpapura zaanyu z'amakuru. N'okwo kukwatanisa kw'amadiini g'omuri Chicago. Kandi reeba. Akaba aine omutsigazi, omuheereza, yaagyenda yaataasya omuhara w'Omukatoriki, reero yaatandika atyo. Kandi bakaba nibaza kukora eki, kiri, na kiriya, n'e-n'ebindi nk'ebyo; yaagwa omu kabi. Reero ishe yaagyenda yaamuhikaho, yaamubuuza ati, "Hati reeba, mutabani, nooza kwegianukamu?"

Yaagira ati, "Taata . . ."

Yaayeta ekanisa yaabo ekibiina ky'abarikwera abeekuringa ahansi, ishe. Ishe yaagira ati, "Hati, reeba, ekintu ekyo nooza kukyegarukiramu ekanisa egi?"

Yaagira ati, "Hati, taata, ori tata, tindikwenda kuhondana naiwe."

135 Kare.

Ishe yaagyenda yaareeta omwe aha badiikoni reero baashuumma baaza omu ka ye. Yaamweta-yaamweta ati, "Wesili, niinyenda kugamba naiwe." Yaagira ati, "Ekintu eki nooza kukigorora n'ekanisa?" Yaamugarukamu ebantu bibiri bigufu atyo. Yaagira ati, "Ijuka, Wesili, niinye muriisa w'egyo kanisa. Ndi sho, kwonka naaza kukora eki Ruhanga arikugamba ngu nkore. Naakuha ebiro makumi ashatu kugorora ekintu ekyo n'egyo kanisa, kitari ekyo nituza kukubinga orugye Omu maisho ga Ruhanga. Ori mutabani wangye buzima; We n'Omujuni wangye." Yaagira nti, "Ninkukunda. Kandi noomanya ngu ninkukunda, Wesili. Na hati hati nkaabaasa kukufeera. Kwonka nooteekwa kwija ottereere n'Ekigambo kya Ruhanga. Waareeba?" Yaagira ati, "Ndi omureeberezi. Ndi omuriisa w'obw'obusyo. Ku oraabe ori omwana wangye, nari ou waakuba ori weena, nooteekwa kutereera n'Ekigambo kya Ruhanga. Ku oraabe otakikozire, obwo nimba ntashemereire kuba omuriisa wa Ruhanga."

Mwojo 'we, ogwo n'omuriisa. Ogwo n'omushaija. Tikwo kiri? Ogwo n'omushaija. Akagambira mutabani we atyo, "Kandi kyamushasha," nikwo yaagambire. Kwonka akagira ati, "Niki? N'oha ou orikuza kushasha, omuntu nari kushasha Omujuni waawe? N'ahabw'ekyo," yaagira ati, "reero twagumizamu."

136 Kandi ishe yaagira ati, "Akanga kukikora. Reero twa . . . naagambira ekanisa."

Yaagira nti, "Mutabani wangye wenyini, Wesili, ayangire kuunyorobera, omu nshonga egi. Yaayanga kworobera omudiikoni. Kandi ori kareebi w'eki, Ow'eishe-emwe Nanka na Nanka?" "Eego, ndiwe." "Kare. Shaaha ibiri, Sande erikwija, saabiiti ina okuruga hati, ekyo ku araabe atakakitereeze n'ekanisa egi, nituhayo Wesili, mutabani wangye, ahari Sitaane ahwerekyerere omu mubiri. Eshagama Ye, eshagama ya . . . ya Yesu Kristo, n'ekanisa egi, bitagaruka kumurinda."

137 Reero ekiro ekyo kyahika. Yaayemerera aha kituuti, yaagira ati, "Aine ezindi dakiika ibiri." Obwire bwahika. Yaagira ati, "Hati, nka mutabani wangye, Wesili Rasmussen, ningambira abateeraine aba, kandi Naiwe, Ruhanga ow'Obushoboorozi bwona. Tukozire byona ebi turikubaasa kukora, kurugiirira aha Bigambo Byawe n'obuhabuzi bw'Omwna Wa-Waawe, Omujuni waitu, obu yaatutsigiire. Hati nitu, nimpayo mutabani wangye, nkwataniise n'ekanisa egi, ahari okuhwe- . . . ahari Sitaane, ahwerekyerere omu mubiri, amagara ge gabone kujunwa." Ebyo byonka nibyo byagambirwe. Tihariho ekyabaireho, kumara saabiiti emwe nari ibiri, obundi okwezi kumwe nari ameezi abiri.

138 Ekiro kimwe, Wesili okuzire akarwara. Kandi ku yaarwaire, oburwaire bwaguma nibweyongyera. Yaayeta dokita. Dokita yaija yaamukyebera. Akaba aine omushwija gw'ekipimo kya igana na itaano. Tiyaabaasa kumanya enshonga erikukireeta. Oburwaire bwaguma nibweyongyera. Dokita yaagira ati, "Mutsigazi 'we, tindikumanya ekikubaireho." Taramanyire eky'okukora. Yaagira ati, "Twaza kweta dokita omukugu." Baayeta dokita omukugu, reero dokita omukugu yaija aho. Baamutwara omu irwariro, baamukyebera, buri kintu. Reero yaagira ati, "Tindikubaasa kukugambira. Omutsigazi na-naareebeka ari nk'ow'okufa." Omukazi we ayemereire aho, naarira, na buri kintu batyo. Kandi n'abaana beemereire aha rubaju rw'ekitanda n'ahandi hoona batyo. Yaagira ati, "Ariyo naafa. Nikyo ekyo kyonka." Ati, "Okuteera kw'omutima gwe n'okwitsya, nibyeyongyera kukyendeera."

Wesili yaagira ati, "Nyetera tata." Oo, eego. Okwo nikwo kishemereire kukorwa. Nikyo ekyo. "Nyetera tata." Reero ishe yairuka yaaza aha irwariro okwo, jubajuba buzima, kumureeba. Yaagira ati, "Taata, hati tindikubaasa, kwonka Ruhanga naahurira ebigambo byangye. Ninja kwegianukamu buri kintu. Ninja kukyegarukamu. Eego, ninja kukikora." Eego, sebo, ow'eishe-emwe. Eshaaha egyo okwitsya kwe kwatandika kugaruka omu buteeka.

Reero Sande eyaakuratsireho, yaayemerera omu maisho g'ekanisa. Yaagira ati, "Nsisiire omu maisho ga Ruhanga, n'omu maisho g'ekanisa egi. Nkanga kworobera ebigambo by'omuriisa. Na-naayanga kworobera n'omudiikoni hanu." Yaagira ati, "Ninshaba ekanisa egi kunsaasira ahabw'ekibi eki nkozire batyo." Ati, Ruhanga akirize amagara gangye. Nimbagambira, akatereera kurungi. Yee. Ekyo nikyo murikuteekwa kukora, mwareeba. Mwareeba? Imwe, kuri nimukikora omu muringo gwa Ruhanga! Mwareeba?

139 Hati, nimureeba, oku turikukikora, nitweta akakiiko k'abeebembezi, reero tugira tuti, "Mbweni, hati, tushemereire kugumya . . ." Tindikumanyisa tabirinaakuru egi, kureka nimmanyisa itwe Abapurotesitante. Nitweta akakiiko k'abeebembezi, reero tuti, "Nimuteekateeka ki ahari Jones? Nimuteekateeka ngu tushemereire kumukorera ki? Nintekateeka ngu akaaba memba murungi ho w'Abametsodisiti kukira oku yaakuba owaitu hanu." Nikyo ekyo. Ekyo, ekyo kigwire. Egyo niyo nshonga erikutuma kitaatwetaagisa kukuratira emigyenzo yaabo; nituteekwa kumweta, bishopu nanka, memba wa . . . Nimumweta ki, omukuru w'ekyanga omuri egi kanisa y'Abapentekoote? Omukuru w'Ekyanga, kumweta kureeba emitwarize y'ogu muntu.

Baiburi neetugambira eky'okukora. Egyo niyo nshonga erikutuma tutaayejwanzya n'ebigombe byabo by'amadiini. Nitwetantara ekintu ekyo. Amiina. Mutangwerwa kubi, tikwo? Mutakikora. Kare. Nintekateeka ngu ninza kutunga ebibuuzzo birungi munonga nyencakare ekiro. Kwonka, mbwenu, ekyo kihikire. Mwareeba?

## 140 Mwijukye. Mumanye . . .

Ningamba eki hati. Imwe abantu abari hanu kuruga omu makanisa g'ebigombe by'amadiini ebitari bimwe, ekigombe kyawe ky'ediini, kandi, ow'eishe-emwe, tindikugira ngu t'ori Mukristaayo. Tindikugira ngu ebicombe byanyu by'amadiini tibirimu enkumi n'enkumi z'Abakristaayo barungi okwo. Ningyezaho kugamba enhongha ahabw'enki tutari kigombe ky'ediini. Habw'okuba, ekyo tinkaakishagika. Ngaaha, sebo. Buzima nka . . . nari kugyezaho kubagambira eky'okukora. Ruhanga ku araabe yaanyetsire kubuurira Engiri, obwo Ningibuurira nk'oku Ruhanga arikungambira ngu ngibuurire. Ekyo buzima nikyo, nk'oku kihandiikiwe hanu omuri egi Baiburi. Ku kiraabe kitashorongire n'Eki, obwo ni ngu . . . Ruhanga naija kuncwera orubanja ahabwakyo. Kwonka ku ndaku nda-ku ndaareebe omushega nigwija, nari omuzigu naija, hazza nkaremwa kubarabura, obwo Ruhanga naakintura. Kwonka ku ndaababarabure, obwo kiri ahariimwe obwo. Mwareeba?

141 Mwijukye, "Okwo omu biro by'aha mperu, haryabaho ebiro by'akabi kaingi munonga, abantu baryaba abarikwekunda, abanyamaryo, abarikwemanya, abarikujumiirana." Mwareeba, abarikujumiirana, "Oo, abo n'ekibiina ky'abafire omutima. Ebiro by'ebi'amahano bikahwa. Tihariho ekintu nk'ekyo." Ni nabi omugurusi w'ebishuba. "Hati, nitumanya ngu abakazi baitu baine obwengye bwingi nk'abashaija baitu." Ekyo tindikukihakanisa na kakye, kwonka Baiburi ya Ruhanga neegira ngu otamwikiriza kuza aha kituuti. Ekyo-ekyo ni kirungi munonga ahariinye, mwareeba. Ekyo kihikire. Kare. Mwareeba?

Kandi yaagira ati, "Mpaho, hati, omu bigombe byaitu by'amadiini, twinemu abantu barungi baangi munonga nk'abu mwine okwo omuri tabirinaakuru." Ekyo tindikukigamba na kakye, kwonka Baiburi neejuukirira ebicombe by'amadiini. Ekyo kihikire. N'ahabw'ekyo, tindikugira ngu timwine baamemba barungi omu kanisa yaanyu. Ekyo ni kirungi munonga. N'abantu barungi. Bamwe aha bantu abarikukirayo oburungi, mbabugana omuri ebyo byona, Abakatoriki n'abandi boona. Byona, mbuganamu baamemba barungi.

142 Hati, omuringo ogu twaza kureetamu eki hati, banywani, Mukama ku araakunde, omuri aga mashomo abiri agarakurateho, obundi . . . ninza kubamanyisa nyencakare omu kasheeshe yaaba kiraatwetaagise kugumizamu nyencakare omu ihangwe nari tutaraagumizemu, mwareeba, kukiihayo. Enshonga erikutuma twagyezaho kukikora, niinyenda kukireeta nkihitsye ahantu nanka hati. Hati, ku oraabe nooyenda kwija n'omuntu, nootangirirwa buzima waaba nookikora. Kwonka ijuka hati, ota-otagyenda noogyezaho kusherura enhobe. Oije hanu . . . Ningambira abashomi ba-bangye bonka, mwareeba. Eki tinkyegyesa aheeru y'ekanisa yangye hanu, 'habw'okuba ogwo n'omurimo gw'ondijo muntu. Ogwo, niwe muriisa w'obusyo obwo. Na-naanye ndi . . . [Omwanya oguriho busha aha rutambi rw'amaraka -Omur.]

143 Naagarukira kimwe omu kitabo ky'OKutandika, akihireyo kimwe, reero tureebe ahu kiri. Hati twaza kugaruka omu kitabo ky'OKutandika, tureebe ahabw'enki ekinyandaaro kyabaire kitarikuza omu kuteerana kw'abantu ba Mukama okuhitsya aha ruzaaro rwakyo rw'omwijkuru wa ikumi na bana. Ka nikitwara . . . Egyo ekaba neeba emyaka magana ana kugira ngu ekyo kibi kihweho. Oku twaza kureeba oku ngu o-okutahikiirira kw'abazaire kurikuturwa abaana n'abaana, oku ekyo kyatandikiire omu kitabo ky'OKutandika, n'ebindi nk'ebyo. Reero nooza kureeba oku ngu . . .

144 Ku orikugarukira kimwe enyima okwo, nooshanga ngu, Ruhanga, ensi etakabaireho, atomu n'emwe etakabarukire, enyima okwo hatakabaireho nangwa n'ekyererezi ky'ekibonwomwe ngu kireebwe, Ruhanga akaba naamanya buri kihangirwe na buri kintu ekyabaire nikiza kuba omu nsi. Hariho omuntu weena hanu . . . Tokaabaasa kushoboorora eki ekigambo ekyo, reero okakishoboorora, okagamba eki ekigambo "okutagira muheru" kirikumanyisa. Nk'okuhindura kamera yaawe okagyorekyerera aha-ahataine bugarukiro. Mbwenu, n'okuruga aho okagumizamu, nikyo ekyo kyonka. Mwareeba? Okutagira bugarukiro! Kandi titurikubaasa, omu biteekateeko ebiine obugarukiro, kwetegyereza eki ebiteekateeko Ebitaine bugarukiro birikubaasa kumanya. Mwareeba, ekyo titurikubaasa kukikora. Iwe, torikubaasa kukikora. Waareeba? Kwonka ku oraareebe, okaguma omu Mwoyo, noobaasa kukyehuriram u okwo hare munonga. Reero-reero ogarukye hanu omu Byahandiikirwe oreebe hati, mwareeba, okwo hare ensi etakahangirwe.

145 Hati, Baiburi neegira ngu Yesu Kristo n'Omwana gw'entaama wa Ruhanga. Hati tega amatu otaireho omutima munonga. Ahabw'okuba, bamwe omuriimwe nimuza kuba mutariho nyencakare kubuhurira okuhika aha omuheru gwabwo. Baiburi neegira ngu Yesu Kristo n'Omwana gw'entaama wa Ruhanga, owaitsirwe kuruga aha kuhangwa kw'ensi. Tikwo kiri? Akaitwa ryari? Kuruga aha kuhangwa. Egyo n'ensi, ku eraabe ekozirwe omu kikuku ky'obucwekacweka bwa za atomu, ekyacwekire aha izooba okwo, etakabaire etyo. N'ahabw'ekyo, hatakabaireho atomu n'emwe eyaabanza kuhaguka aha izooba, egi ku eraabe yaabaire eri ekibonwomwe ekyahagukire aha izooba, neebaasa kuba emyaka biriyoni igana twiriyoni twiriyoni kare munonga hatakabaireho n'omushana gw'ekibonwomwe, Kristo akaba yaitsirwe. Ebiteekateeko bikuru bya Ruhanga ku bisharamu kukora ekintu, ekyo kintu nikiba kyahwa. Ruhanga ku yaagizire ati, "Habeho," kikaba kyaherize kuhwa. Ku kiraabe kyamazire emyaka biriyoni igana kuhikiirira, kikaba kyahweire ahonaaho obu Yaakigamba. "Kandi Omwana gw'entaama ku yaitsirwe kuruga aha kuhangwa kw'ensi," Baiburi niyo emwe, Omwoyo ogwo omwe akahandiika yaagira ati, "amaziina gaitu gakahandiikwa mu Kitabo ky'Amagara eky'Omwana gw'entaama ensi etakahangirwe."

N'ahabw'ekyo omuntu owaahandiikire ekyo kyeshongoro ekirikugira ngu, "Hariho Eiziina Risya Eririkuhandiikwa Omu Kitiinisa," akaba aine ekiteekateeko kirungi, kwonka kikaba kitari ky'Ebyahandiikirwe.

Mwareeba? Eryo iziina rikahandiikwa omu Kitiinisa obu ensi . . . iranaira ensi etakahangirwe. Obu Omwana gw'entaama yaitwa, amaziina gaitu gakahandiikwa omu Kitabo ky'Amagara eky'Omwana gw'entaama.

146 Reka-reka mbahe Ekyahandiikirwe kimwe kikye. Nimutegyerezaho edakiika emwe? Kyajia omu biteekateeko byangye hati. Nintekateeka ngu nimbaasa kubiikuura nkihikyeho. Tindikuhamya. Kandi hati munsaasire ababw'okubakyerereza munonga nti, kwonka mbagambiire ngu niziza kuhika shaaha mukaaga z'ekiro; tizikahikire buzima. Kwonka ni-niinyenda ku-kwihayo eki, Ekyahandiikirwe kimwe kyonka ahari ekyo.

Mubiikuure naanye hati omu Kitabo ky'Abarooma, kandi niinyenda ngu eki tukishome hamwe. Hati, ka tureebe, Abarooma, ku ndaabe nimbaasa kukibona, haihi na hanu honyini. Hati ka tubiikuure Abarooma 8, kandi kandi tutandikire aha mushororongo gwa 28 gw'eshuura ya 8 y'ekitabo ky'Abarooma. Hati niinyenda ngu mukishome naanye nimushaba. Hati hurikiza hanu eki Ruhanga yaagambire.

Nitumanya ngu, aha barikukunda Ruhanga, . . . bakeetwa nk'enaama ye oku eri, byona ebibabaho bikwatanisiza hamwe kubareetera oburungi.

Ahakuba abu yaamanyire ira, . . .

Ekyo nikikuha . . . Nitubaasa kushoma hamwe? "Ahakuba abu . . ."

Ahakuba abu yaamanyire ira, nibo yaashoroire batakabaireho (kare) kushushanisibwa n'Omwana we, ngu abone kuba omujaijo omu b'eishe-emwe baangi.

Abu yaashoroire batakabaireho, nibo yaayetsire; n'abu yaayetsire, nibo yaihireho orubanja; kandi n'abu yaihireho orubanja, nibo yaahaire ekitiinisa.

147 Omusingye gw'ensi gutakabaireho! Ruhanga ku yaarangize ahansi . . . Hati, Ruhanga takozesa ofiisi Ye, eky'okureeberaho ati, "Mbwenu, hati, naaza ku . . . Oo, twaza kukora ki hati?" Mwareeba? Tihariho ekintu . . .

Mwijukye, obutahikiirira, ekibi, n'okuhikiirira kukiikamisiibwe. Sitaane tarikubaasa kuhanga. Ekyo buri omwe, mwena, nimukyetegyereza? Egyo n'Enyegyesa y'ekanisa egi. Sitaane tarikubaasa kuhanga. Naabaasa kukiikamya eki Ruhanga yaahangire. Hati, okukiikamya niki? Hanu, mwena nimureebeka nk'abakuzire, haihi mwena. Muherikize eki. Turi abantu abashweire n'abashweirwe. Kandi imwe abashaija abashweire naimwe abakazi abashweirwe nimubaasa kuba hamwe nk'omushaija n'omukazi, kandi abo bakazi bari nk'abataka . . . N'abashugaine ku oraagume na baro. Ekyo kihikire. Hati, ekyo ebiragiro nibikiirkiriza kandi kihikire omu mateeka, kandi ni kirungi. Kikateebwaho Ruhanga kuba kityo. Omukazi ondiijo naabaasa kukora ekikorwa ekyo eky'omukazi waawe; kimwe ahari ebyo, ori ohikiriire omu maisho ga Ruhanga; kwonka ekikorwa ekyo n'ondiijo mukazi, noocwerwa orubanja rw'okufa, omu maisho ga Ruhanga. Niki? Okuhikiirira kukiikamisiibwe, mwareeba, okuhikiirira kukiikamisiibwe.

148 Hati, Sitaane tarikubaasa kuhanga, kureka naakiikamya eki Ruhanga yaaherize kuhanga.

Ekishuba niki? N'amazima gakiikamisiibwe. Omuntu omwe akagira ati, "Oo, reeba, rukaba ruri Orwamukaaga nyekiro, shaaha ishatu, eego, Bill Branham akaba ari omuri Jeffersonville," kihikire. "Eifo kuri aha baara ya Antz, asinzire," ekishuba. Kikaba kiri ki? Nkaba ndi omuri Jeffersonville. Ago n'amazima. Kukaba kuri okuhikiirira kukiikamisiibwe kwaba ekishuba. Nimureeba eki ndikumanyisa? Mwareeba, ekishuba nikikiikamya amazima. N'ekintu ekyagambire ahu naabaire ndi. Hati, kuri kyagizire kiti, "Aha kanisa, naabuurira," n'amazima. Okwo n'okuhikiirira. Akagamba amazima. "Aha baara, naanywa amaarwa," ekishuba. Okukiikamya; mwareeba, amazima gakiikamisiibwe. Nimureeba eki ndikumanyisa? Okutahikiirira kwona n'okuhikiirira kukiikamisiibwe.

149 Okufa, niki? N'amagara, gakiikamisiibwe. Endwara? N'amagara agari gye omu mubiri, gakiikamisiibwe. Oshemereire kuba omuntu ori gye, oine amaani. Ni kirungi. Ku oraabe n'orwararwara, niki? Amagara gaawe gakiikamisiibwe. Waareeba? Nikyo ekyo kyonka eki kirikumanyisa. Niki? Mukaba muri abakazi bato, barungi; n'abashaija b'amaani, barungi. Hati muriyo nimukookoota, nimuba abagurusi n'abakaikuru. Niki? Amagara, gakiikamisiibwe, mwareeba, nigagaruka omurundi ogundi. Mwareeba? Kandi nigateekwa kugaruka. Eiziina rya Mukama risiimwe! Ruhanga akaraganisa kugagarura. Kandi buzima nk'oku ga . . . Ku garaabe gariho, nitumanya ngu gari hanu. N'ahabw'ekyo buzima nk'oku gariho, Ruhanga naaza kugagarura ogundi murundi. Akakiraganisa kandi Yaarahira ngu Aryakikora. Ekyo nikyo kirikukihamya.

150 Hati, oku, tushemereire kuba turi abantu ba muringo ki? Hati yetegyerezaho oku ebintu ebi birikubaho. Hati, abo abu Yaamanyire ira, nibo yaayetsire; abo abu Yaayetsire, nibo abo abu Yaihireho orubanja. Ryari? Omusingye gw'ensi gutakateirweho, ensi etakabaire n'okuhangwa. Hati, ku twakubaasa kukwata Ekyahandiikirwe eki haza buzima tukakishoboorora, tukaakimaraho eshaaha nydingi, kwonka ekyo ti-titurikwenda kukikora. Kwonka oku kutahikiirira kwona hanu, n'okuhikiirira kukiikamisiibwe kukaba okutahikiirira. Ekyo nikyo Sitaane akora.

Hati, ku orikuhitsya emyaka y'okubarirwa ekibi, okamanya ekigwire n'ekihikire, oshemereire kuhinduka okaruga omu nshobe yaawe. Ahabw'okuba, okazaarirwa omu kibi, waahangirwa omu kutahikiirira, waija omu nsi noogamba ebishuba. N'ahabw'ekyo buzima o-okazaarwa ahabw'okumanyana omu by'omubonano kw'omushaija

n'omukazi, n'ahabw'ekyo nooteekwa kuzaarwa obwa kabiri, kugira ngu oheebwe Okuzaarwa busya, obone kutaaha omu Iguru. Ahabw'okuba, okuzaarwa kw'omuringo ogu orimu hanu . . .

Nimureeba aho ahu ab'ediini ya Jehovah Witness baagwtereire kimwe buzima, kuteekateeka ngu Okuzaarwa busya n'okuzooka kw'omubiri? Nimureeba, tikikaabaasika. Mwareeba? Nikiteekwa kuba ekintu . . .

151 Ori, ori omu kyanga ky'obwire. Kandi ekintu kyonka Ekitahwaho n'ekintu ekitaine obutandikiro nari obugarukiro. Ekintu kyona Ekitahwaho tikiagirahoga obutandikiro, kandi tikirigira muheru. Mwareeba? N'ahabw'ekyo ku oraabe ori orugingo rwa Ruhanga, Omwoyo ori omuriyiwe takagirahoga butandikiro kandi tarigira bugarukiro, n'ahabw'ekyo ori Otahwaho hamwe n'Omwoyo ori omuriyiwe. Waareeba? Nka ru-ru-rukundo ya Agapao, bwanyima eshuume ehikye ahari rukundo ya fileo, etyo eshuume ehikye ahari rukundo y'okurigira okubi. Neegumizamu neeshuma ahansi, neeshuma ahansi, neegumizamu neekiikama okuhitsya obu ebaire orujwangye rw'omuzambaaro. Mbwenu, omuhanda gwonka, Yesu akashuumira ahari ago madaara gonyini, yaija ahansi hanu kukwata n'okugarura ogundi murundi aha rugyero orurukirayo kuba orw'ahaiguru munonga, kuruga omu mbeera y'ahansi munonga; kuruga omu kufa kutaaha omu Magara, kuruga omu kurwara kutaaha omu magara agari gye omu mubiri, kuruga omu kutahikiirira kutaaha omu kuhikiirira. Mwareeba? Akaruga omu kuba orikukirayo kuba ow'Ahaiguru munonga yaaba orikukirayo kuba ow'ahansi munonga, kugira ngu Abaase kutunguura orikukirayo kuba ow'ahansi munonga abe orikukirayo kuba ow'Ahaiguru munonga. Akaba nyowe kugira ngu, ahabw'embabazi Ze, mbaase kuba We, omuhunguzi w'Ekitebe ky'obukama omu Kitiinisa. Nimureeba eki ndikumanyisa, ebintu ebyo?

Hati reeba. Enyima okwo hare munonga ensi egi etakatandikire kubaho omuri ezo atomu enyima okwo, Ruhanga ku yaareebire ekyabaire nikiza kubaho, obwire obwo Akakireeba, Yandeeba, Yaareeba buri mura, buri nshohera, buri kikyere, buri mubu. Buri kintu ekyabaire nikiza kuba aha nsi, Akakireeba obwire obwo. Buzima, Akakireeba.

152 Hati, Taragizire ati, "Ndyayohereza Omwana Wangye omu nsi kandi Murekye afe, shana obundi hariho omuntu Orimusaasibwa. Kandi kiryaba ekintu ky'okusaasibwa munonga, obundi shana haryagira omuntu owaajunwa."

Akamanya ira orijunwa atakabaireho! Eego, sebo. Akagira ati, "Esau Nkamwanga, Yakobo Naamukunda," bombi batakabaire n'okutunga omugisha gw'okworeka eki baabaire bari, ahabw'okuba Akaba naamanya eki bari. Akaba naakimanya. Naamanya buri kimwe. Akaba Naamanya eki orikora, otakazairwe, nari okuruga aha kuhangwa kw'ensi.

153 Hati mureebe. Nk'oku murikumanya, ndi-ndi-ndi omunyamwoga omu mbundu. Ni-ninkunda embundu. Mbwenu omukazi omwe omuri Texas, nintekateeka ngu ni Texas, anguriire embundu y'ekika kya Swift, Swift y'omudimo gwa makumi abiri n'ebiri. Ntuura ningyetenga. Niinyenda kugigyeza. N'embundu nkye erikurasha n'amaani maingi. N'ey'amasaki makumi abiri n'abiri, amasaki g'ekipimo kya makumi ana na munaana. Kandi noobaasa kugitamu eisasi n'engaro. Hati, eikorero nirigira riti, "Otakikora: n'eky'akabi munonga." Kwonka noobaasa kugitamu eisasi eryo n'engaro riirukye fuuti enkumi itaano omu sekonda emwe, kandi nabwo ogume ogihamiize omu mwanya gwayo. Fuuti enkumi itaano omu sekonda emwe, egyo ni mahiro emwe omu sekonda emwe. Omu bindi bigambo, akaca akateekami, omu yaadi magana abiri. Noobaasa kurasha akaca ako, orebee amooya nigatumuuka embundu etakakutengyeitse. Mwareeba? Ekyo, kwonka kwata, ekicweka ekitereire ky'akati k'okurabya omu maino, okataasye omu buganga bwawe, reero oshukye munda omwo obundi bwingi oburikwingana buti, obu orikubaasa kukwatira aha kat i'k'amaino kusha; reero orashe enyamurimi eshutami aha muheru gw'ekyombeko eki hanu, neeguma eshutami neekuranzya kwonka. N'ahabw'enki? Eisasi eryo niricwanyagurika, ahabw'okwiruka juba munonga. Kandi-kandi noobaasa kutaho orutimbe rwagati y'aha na hari, kandi torireeba nangwa n'akacweka kamwe k'ebitsigarira nikagwa aha rutimbe. Nirihinduka rigaruka omu mbeera y'okubanza; atari o-okuhinduka iju, eiju erirugire omu rushozi orurikwakamu omuriro, kureka nirirenga ahari ekyo. Nirigaruka omuri za asidi ez'okubanza ezikora ekikomo n'ekyoma kya rusasi ekirimu. Nirigaruka riba nk'oku ryabaire riri emyaka biriyoni igana echingwire. Hati, hanu hariho eisasi rikye, eisasi ry'ekipimo kya makumi ana na munaana eri nyine omu ngaro zangye, kwonka omu sekonda eraakurateho rigarukye ribe nk'oku ryabaire riri emyaka miriyoni igana echingwire. Kandi obundi ensi ku yaakugumaho endiijo myaka miriyoni igana, rikaagaruka riba eisasi ogundi murundi, rikaagaruka rihindurwa buzima, ahakuba rikaahindukira kimwe riba ekikomo.

154 Hati mureebe eki Ruhanga yaakozire, reero nimuza Kumukunda. Bwanyima nimuza kutaaha omu ka, reero omu kasheeshe mubyame mukyerereirwe kakye. Kandi-kandi ni-nimuza Kumukunda munonga okukira oku Muramukunzire. Hati, Ruhanga n'Omupatani w'ebiyombeko. Ni bangahi abarikumanya ekyo? N'Omwbeki. Kare. Hurikiza otaireho omutima munonga. Hati, Ruhanga enyima okwo, ku bagamba . . . Hati twaza kutwara ekiteekateeko ky'abashomire oku ebintu bigyenda nibikuratana. Ruhanga, emyaka biriyoni igana echingwire, ku Yaabaire naaza kuhanga ensi, mpaho, Akatandika. Hati, Akaba aine . . . Akagira ekiteekateeko omu biteekateeko Bye.

155 Hati mwaza kugira muti, "Ku Araabe ari mukuru atyo, Ow'eishe-emwe Branham, Akaikiriza ata Sitaane kukora ekibi?" Mpaho, Ruhanga Akamanya, Sitaane atakabaire n'okuhangwa, ngu aryaba Sitaane. Ekitiinisa! Hati naahurira naataaha omu Mwoyo. Oo, mugyenzi! Ruhanga akamanya, Sitaane atakahangirwe, ngu aryaba Sitaane.

Hati, nooza kubuuza oti, "Kandi shi ekyo?" Noobuuza oti, "Ahabw'enki Yaamurekire akaba Sitaane?" Kugira ngu Abaase kuhamibwa ku ni Ruhanga. Nikyo kyatumire Yaakikora. "Ahabw'enki haabaireho okutahikiirira? Ahabw'enki?"

156 N'oha owaabandize, Omujuni nari omusiisi? N'oha owaabandize? Omujuni. N'oha owaabandize, omutambi nari omurwaire? Ahabw'enki kyaikiriziibwe ngu omusiisi abeho? Ahabw'okuba Ebimukozire n'Omujuni. Kuri hatarabaireho musiisi, t'Akaabaire naamanywa nk'Omujuni na kakye. Haleluya! Naabaasa kutuma ebintu byona byakwatanisiza hamwe Kumuhaisa ekitiinisa. "Omubumbi naabaasa kubuuza e . . . Nimmanyisa, Enyungu neebaasa kubuuza omubumbi eti, 'Ahabw'enki wankozire oti?'" Omubumbi n'oha? N'oha oine ibumba? Riri omu ngaro z'oha? Paulo akagira ati, "Oo, iwe mushema 'we, Taragizire ngu akeemeka Faraho ahabw'ekignydererwa eki kyonyini?" Buzima. Akaba naakimanya. Ensi etakabaireho, Akaba naamanya buri kintu oku kiriba. Reero Yaareka haabaho ekibi, kugira ngu Abone kuba Omujuni. Akareka haabaho endwara kugira ngu Abone kuba omutambi. Akareka haabaho rwango kugira ngu Abone kuba rukundo. Buzima, Akakikora. Ni Ruhanga, kandi ebyo nibyo Bimukozire. Kandi Naateekwa kugira ekintu okugira ngu kyorekye Ebimukozire.

Okaamanyire ota ngu habaho ekiro, okaamanyire ota ngu habaho na kimwe? Kuri bwona bwabaire buri nyomushana, okaamanyire ota ngu habaho nyekiro? Hariho nyekiro, kugira ngu ebaase kuhamya ku hariho nyomushana. Buzima, nikwo. Amiina. Nimureeba eki Yaakozire?

157 Kwonka ku Yaabaire ari enyima okwo, ensi etakahangirwe, Atakakwatsire eri izooba erya ira Akaryetoorooza egi nyonyoozi eya ira ei tutwireho hati, egi nsi, Akagibumbira hanu aha rubaju rw'eizooba, kandi akagita haihi n'eizooba. Ka tugire ngu, eri n'eizooba. Akaribumbira aha rubaju oru, reero yaarireka ryazeereera okwo kumara emyaka biriyoni igana. Akaba naakora ki? Emiika. Akeetooroora yaija orubaju oru, Yaagira ekindi eki yaakora. Akaba naakora ki aho? Potaashi. Yaaryetoorooza kunu, obwo Akaba naakora ki hanu? Akaba naakora karisiyaamu. Akaba naakora ki? Akaba naakora nyowe naiwe. Akaba naakora ki? Nk'omupatani orikutaho ibiri ahari ina ze zoona na za ibiri ahari munaana ze, ebikozeso bye, embaaho ze, akaba naamanya omubaro gw'ebiyombeko ebi yaabaire naaza kwombeka. Kandi tukozirwe omu bintu ikumi na mukaaga by'ensi, n'ahabw'ekyo twena Akaba naatuhanga, kandi naatuta aheeru aho ensi etakahangirwe. Kandi Na . . . Neebaasa kuba yaabaire etarikwingana obukiika n'obwemi obwire obwo; tindikumanya oku yaabaire eri. Ezaabu, ekikomo, omuringa, amaizi, n'ebintu ebyo byona Akaba naakora eby'enki? N'Omupatani. Naabaasa . . . Omwombeki, Akaba naata buri kintu aho, buri kintu kishazirwe omu muringo gwakyo. Ku Yaaherize kubitebeekanisa byona, kikaba kiri okubarukaho kw'amaani kw'omuriro ogurikuruga okuzimu omu itaka. Yaareka ogwo muriro ogwa ira gwaruga okuzimu omu itaka okumara emyaka miriyoni igana, kukora karisiyaamu. Niki? N'ekicweka kyawe.

158 N'ahabw'ekyo, hatakabaireho akacweka k'amagara na kamwe ahari egi nsi, emibri yaitu ekaba erambiire aha. Haleluya! Eitondo rimwe ry'amaizi ritakabaire kuragara ahari egi nsi, tukaba turi aha. Obu Adamu yaagyendagyenda oku n'oku omu kibanja kya Edeni, nkaba ndambiire aha. Amiina. Eego, sebo. Oo, ekitiinisa! Obu Baakerubi, enyonyoozi z'akasheeshe zaayeshongorera hamwe, n'abaana ba Ruhanga bakateera akaari k'okusemererwa, nkaba ndambiire aha ntegyereize omwitsyo gw'amagara kwija. Nkaba ndi aha. Akampangira hanu, omubiri gwangye gukaba guri aha. Eego, sebo. Ku guraabe gwabaire gutari hanu, gukaruga hi? Ha? Gukahika hanu guta? Ruhanga akaguta hanu. Ruhanga akagukora. Tukozirwe omu bintu ikumi na mukaaga, peterooriyamu, potaashi, n'ekyererezi kya kozimiki, hamwe n'ebindi. Mwareeba, tukaba turambiire aha.

159 Reero n'enki ekyabaireho? Bwanyima Ruhanga yaagambira Omwoyo Orikwera, twaza kikitwara omu muringo gw'ebirkushushaniriza, "Hati irooko ogyende, kandi egyo nsi otandikye kugikorera ebya rukundo. Ahabw'okuba Ndi rukundo, kandi Ori Ekindugiremu, n'ahabw'ekyo hati Irooko ogyende okorere ensi ebya rukundo." Reero Omwoyo Orikwera muhango, nikwo turikuteekateeka, yaarugayo yaija aho; n'omu muringo gw'okushushaniriza kwonka hati. Tikwo kyabaire. Hataraho kubanganisa Omwoyo Orikwera na Ruhanga n'ekignydererwa kimwe, ekignydererwa ekyo kimwe, Omuntu. Munsaasire. Mbwenu ka tugire ngu Akajanjamura amapapa Ge gaashweka ensi, Yaatandika kugibumbatira. Okubumbatira okwo niki? Nk'enkoko aha baana baayo, neegamba, neekora ebya rukundo eti, "kuru, kuru, kuru." Oo!

160 "Iwe magara 'we, rugayo!" Yaagamba n'eiraka rihango. Yaaranzya oku n'oku. Ati, "Niinyenda ensi egi ebe nungi. Rugayo, mushana 'we!" Omwoyo Orikwera naakora. Kandi ku Yaakozire atyo, nindeeba; nihija, hariho ekirikuhiringita nikiruga aha rushozi okwo, okwo haarugayo karisiyamu neeyeshukyeera ahansi, yaayejwanga na potaashi. Neeyekoramku ki? "Amagara, rugayo!" Reero akamuri kakye ka Paasika kaatunguura omutwe gwako kaaruga ahansi y'orukiri. Ati, "Ija hanu, Taata, oreebe kiri."

"Ekyo nikireebeka kurungi. Gumizamu noobumbatira." Yaabumbatira haarugamu ebimuri. Yaameza ebimera byona. Yaihamu enyamaishwa. Enyonyi zaaruga omu mucuucu zaaguruka. Bwanyima y'akaanya kakye, harugamu omushaija n'omukazi; harugamu omushaija, kandi omushaija akaba ari byombi omushaija n'omukazi. Ti kinyabibiri, hati. Kureka, omuriwe,

161 hakaba harimu omwoyo gw'ekikazi.

Ku orikukwata omushaija orikwetwarira kimwe nk'abakazi, naabaasa kuba ataine nshonga, omubiri gwe guri gye, kwonka hariho ekishobire. Kandi ku orikukwata omukazi, orikwenda kushara eishokyre rye kandi akajwara ovoro, reero akaza aheeru okwo, reero ati, "Nkugambire, Ruhanga asiimwe!" Hariho ekishobire. Omukazi aine

omwoyo gw'ekikazi, kandi omushaija aine ogw'ekishaija. Ekyo nitukimanya. Naimwe ekyo nimukimanya. Omukazi naareebeka gye, orikugyezaho kuba, kutwaza nk'omushaija?

162 Ahabw'enki, ekiro kimwe nkashutama, nkaba ndi omurinzi w'enyamaishwa z'omu paaka hanu, naashutama omu baasi ninza eruguru kuri reero naagyenda ninteerateera aha kuguru kw'ogwo mukazi, n'engaro zangye, ningaaniira nawe, ntarikumanya ku n'omukazi. Akaba ajwaire emwe ahari ezi nkofiira z'abarikwotsya ebyoma, na zaagaarubindi mpango z'eizooba batyo, kandi nkaba nshutami enyima okwo hare, haza hariho ekintu eki yaabaire naagambaho aha kintu ekikozirwe. Yaagira ati, "Noomanya," reero yaagira ati, "kandi ekiro ekihweire," arikureebeka akazire nk'oku arikubaasa, arikureetsa sigara. Yaagira ati, "Ekiro ekihweire, ninkugambira, omuntu ogwo atereire, ahaiguru y'ekyo kintu." Yaagira ati, 'Mugyenzi!' Aizire naaterera naashuumma kurabira aho. "Ati, "Tinkashekahoga munonga ntyo omu magara gangye."

Kandi nkaba ninsheka, noomanya, batyo. [Ow'eishe-emwe Branham yaareeta eiraka nk'ery'okuteera omu ngaro -Omur.] Naagira nti, "Mwojo 'we, ekyo kibaire nikishetsya buzima, tikwo?" Ashutami aho naagamba atyo. Kandi kuri ataraihiremu ekyo kintu akatengyetsa omutwe gwe, kandi akaba aine eishokye ringi rijagaraire aho, eryabaire niryoreka ngu n'omukazi. Tinkeehurirahoga naaba mukye ntyo omu magara gangye. Nka-nkamubuuza nti, "Ori omukazi?"

Yaagarukamu ati, "Ahabw'enki, buzima!"

Naagira nti, "Nsaasira." Tinkareebahoga ekintu nk'ekyo. Hati, ago, n'amazima.

163 Nkareeba ekyapa ekiro kiri ekyayenzire kunshemeza munonga. Kikaba kiri ekyapa kihango kihanikire, nikigira kiti, "Abakazi beetegwire kujwara ebijwaro." Naateekateeka nti, "Ruhanga ahimbisibwe ahabw'ekyo." Mwareeba? Kwonka, naashanga, byabaire biri ebijwaro ebi baabaire baaherize kutunga, noomanya. Nkankeekateeka nti buzima nibaza kujwara ebijwaro. Buzima nikwo naateekateekire. Kikaba nikigira kiti, "Abakazi beetegwire kujwara ebijwaro." Naagira nti, "Ruhanga asimwe ahabwabo. Ekyo ni kirungi. Ekyo, buzima ninsima Mukama ahabw'ekyo." Kwonka, mwareeba, bikaba biri ebijwaro ebi baabaire baaherize kutunga, ekindi kintu. Kikaaba kiri ekintu ekirikushetsya, tikwo, omu ihanga eri? Kare.

164 Reero Adamu ku yaarugiremu. Kwonka Adamu akaitwa eirungu, n'ahabw'ekyo Ruhanga yaiha orubaju omu rubaju rwe yaakoramu Haawa, ekirugire omuriwe ahabwe. Bwanyima Yaakora . . . Yaiha omwoyo gw'ekikazi omuri Adamu, yaaguta omu mukazi, omwoyo gw'okukunda, gw'ekikazi, ogw'embabazi, ogurikutwaza gye. Reero Yaatsiga omwoyo gw'ekishaija omuri Adamu. Hati, ku haraabe hariho ekintu kyona ekihindukireho, aho nihaba hariho okukiikamya. Hati, reero ababiri abo baaba omwe.

165 Ka tukishoboorore omu buryo bw'omuzaano mukye tutakahendeire. Hanu haija . . . Hanu, ngugu Adamu yaakwata Haawa omukono reero baashohora. Ninkunda ebigambo ebi. Kandi baashohora, nimumanya. Reero Haawa yaagira ati, "Oo, mukundwa, noomanyisa ngu waaherize kukikora?"

"Eego, egyo naagyetsire eiziina."

"Kwonka shi eriya noogyeta ki?"

"Egyo neeyetwa embaraasi. Ahaa."

"Eriya neeha?"

"Egyo n'ente. Ahaa."

"Eriya ogyetsire iziina?"

"Yee. Ahaa."

"Eriya noogyeta ki hariya, ezo ibiri eziteekami hari zihikaniise emitwe yaazo?"

"Ezo n'enkushu."

"Oo, naayetegyereza. Naayetegyereza." Reero baagumizamu batyo. "Kandi egi n'enki hanu."

"Egyo ningyeta, ekyo, hamwe n'egi hanu."

"Kandi, "Oo, naayetegyereza. Ahaa. Ekyo ni kirungi." Reero entare yaatsinda. "Egyo noogyeta ki?"

"Egyo n'entare."

"Eki niki?"

"N'orutaragwe."

Kandi, oo, nka . . . "Oo, naayetegyereza." Nk'obwana bw'enjangu, noomanya, nibuniagiirira aho.

166 N'ahabw'ekyo, bwanyima y'akaanya kakye, Haaawa yaamagamaga. Yaagira ati, "Mukundwa, ranzya kuriya,

eizooba nirirengarenga. N'obwire bw'okuza aha kanisa."

Noomanya, habaho embeera y'omutaano eizooba ku rirenga, noohurira waayenda kuramya. Ku orikuba otagiire aha kanisa ekiro ekyo, noohurira waayenda ngu oze omu kishengye, oshome Baiburi. Ni bangahi abakunda kukora ekyo, kwehereera wenka? Mwareeba? Ekyo kiri omu muntu okukikora. Ekyo oshemereire kukikora.

"N'obwire bw'okuza aha kanisa."

Hati, tibaragizire ngu, "Hati, rindaho kakye hati, hati, Jones n'owa Assemblies, kandi itwe turi aba . . ." Ngaaha, kikaba kitari kityo obwire obwo, n'ahabw'ekyo bakanyegyera. Bakaba bataine kanisa, entebe nungi y'okushutamaho batyo. Bakanyegyera baaza ahansi y'ekanisa rutaaba y'emiti, kandi baatsimba amaju.

167 Kandi ekyo Kyererezi Ekyebumburikire kikaba nikizeereera ahaiguru aho omu rushaka. Mwareeba? Nimpurira Eiraka nirigira riti, "Abaana Bangye baayeshemezamu omu nsi, eriizooba, ei Mukama Ruhanga waanyu abahaire?"

"Yee, Mukama, twayeshemezamu eriizooba." "Tikwo, mukundwa?"

"Eego. Eego, mukundwa, twayeshemezamu." "Mukama, buzima Nitukusiima. Hati, ka mbyame." Mwareeba? Reero agorora omukono gwe muhango, na Haawa abyama, aha mukono gwe, reero abyamisa orutaragwe n'entare ahansi, na buri kintu kibyama, omu busingye.

N'ahabw'ekyo Ruhanga ashuma Areeta, oo, ekibiina kya Baamaraika, Gaburieli, ebihangirwe Bye by'omu Iguru. N'ahabw'ekyo bashuma kandi bagyenda bucece munonga bataaha omu kishengye ky'okuraaramu, mwareeba, bamagamaga. Gaburieli agira ati, "Ija hanu, Taata. Ija hanu. Reeba hanu. Ngugu hanu. Hanu, mbaba hanu abaana Baawe babyami aha."

168 Ni bangahi hanu abaaragiire aha rubaju rw'ekitanda, bamwe omuriimwe abakazi abazaire, iwe hamwe na ishe w'abaana, haza mukareeba ako koojo kato, n'ako kahara kato, reero mu-mukajutsyana muti, "Tikaritikarikukushusha, aha na hari?" Ekyo murakikozire? Ahabw'enki, emirundi mingi ningyenda ngambira Meda, kugamba ahari Yosefu. Agira ati, "Bill, aine enkombe nkaiwe."

"Yee. Kwonka, Meda, aine amaisho mahango nk'agaawe." Ahabw'enki? N'ekicweka kyaitu ekiturugire- . . . N'orugire omu kuteerana kwa-kwaitu.

Hati, kandi Ishe yaagamba, nimbaasa kugamba eki ahari eki. Yaagira ati, "Noomanya . . ." Reero Gaburieli yaagira ati, "Noomanya, Naakushusha buzima." Okwo nikwo Ruhanga arikushusha; yereebe. Okwo nikwo Ruhanga arikushusha. Naakushusha. Ori oruzaaro Rwe. Ni bangahi abarikumanya ekyo? Mwareeba?

169 Hati reeba. Ni kihangirwe ki ekirikukirayo kuba eky'ahansi eki twine? Ekikyere. Ni kihangirwe ki ekirikukirayo kuba eky'ahaiguru? Omuntu. Buzima. Kandi ekirikukirayo kuba eky'ahaiguru ni kiiha? Bikaguma nibiruga aha birikukirayo kuba eby'ahansi, nibiza ahaiguru, kuruga aha kikyere kuza ahari eki n'ahari kiri, n'okuhika aha nyonyi, okuhitsya, n'ebindi, omu bihangirwe ebirikukirayo kuba eby'ahaiguru, okuhitsya obu byahikire aha buhangwa oburikukirayo kuba obw'ahaiguru obu byakubaasize kuhikaho, reero byahangwa omu nshusha ya Ruhanga. Nikyo ekyo. Kandi omukazi tarahangirwe omu nshusha ya Ruhanga, kureka omu nshusha y'omushaija. Mwareeba?

Hati, hati, mbabo aho. Kandi Ruhanga yaabareeba, yaagira ati, "Eego, nibareebeka-nibareebeka kurungi."

170 Ekyo kikaba kiri ki, ow'eishe-emwe? Bakaba batarikubaasa kufa na kakye. Orwo rukaba ruri oruhi rwa karisiyamu rw'okubanza, potaashi y'okubanza, reero na buri kimwe kyatandikaho kityo. Ti kirungi? Kwonka ekibi kikaija kyashiisha ekyo kishushani. Hati, Ruhanga ni . . . Ruhanga akakiiriza ngu kikore ki? Ahabw'enki Yaasiimire ngu kibe nk'oku twaba nitukigambaho akaanya kakye akahwaho? Akakiiriza kugira ngu Abaase kuhamya ku N'Omujuni. Akakikora. Akaikiriza endwara zaabaho, kugira ngu Abaase kuhamya ku N'omutambi. Akaikiriza okufa kwabaho, kuhamya ku Niwe Magara. Mwareeba? Akaikiriza ebantu byona ebi ebibi byabaho, kuhamya ku Ni murungi, eki Yaabaire ari. Nitwija . . .

171 Kyo gamba aha kweshongoro ekyo kyeshongoro ky'obucunguzi! Ahabw'enki, ow'eishe-emwe, Yesu ku ariija, Ekanisa e-egi eryayemerera okwo aha muheru gw'ensi egi reero beeshongore ebyeshongoro by'obucunguzi, obu Baamaraika bariniika emitwe yaabo, batarikumanya eki turikugambaho. Eego, tibakazaahagaho. Tibarikumanya ebi twarabiremu. Nitumanya okuzaaha n'okuzaahuuka eki birikumanya. Oo, nitubaasa kugambira ahaiguru Eby'okumuhibisa! Ti Mujuni aharibo. Tibakeetengaga okujunwa kwona. Takabaga omutambi waabo. Ngaaha. Ekitiinisa! [Ow'eishe-emwe Branham yaateera omu ngaro emirundi etaano -Omur.] Tari-Tari Magara aharibo. Buzima tariwe. Tibakafeeraga omu kibi n'ebi'okushiisha. Itwe tukaba tubifeereiremu, bwanyima twahindurwa abahuriire. Aho naho turi. Turyagamba ki, tujwiremu ebirunga byaitu turikugira tuti, "Oo, ori Reverenda Nanka na nanka"? Ngaaha, ngaaha, ngaaha, ngaaha. Ekitiinisa kyona n'Ekye! Nikyo ekyo. Nkikyo aho. Obwo turyatebya oku twasingwire. Turyakyetegyereza gye bwanyima y'akaanya kakye.

172 N'ahabw'ekyo, reero omuri ekyo aho, ahanyima n'enki ekyabaireho? Obwo Ruhanga akafa kugira ati,

"Mbwenu, ka Nfe kucwekyereza potaashi Yangye yoona na karisiyamu. Yoona esiisikaire"? Ngaaha, ngaaha. Akaba naamanya ngu kiryaba kityo.

Hati, hati, Omwoyo Orikwera ku araabe yankozire oku ndi, kandi nindya eby'okurya mbigarura omu mubiri gwangye, kandi nkura mpika ahi naahika hati. Hati, kandi nabwo, nkahangwa omu nshusha. Buri kishushani eki Ruhanga yaareebire, ensi etakahangirwe, nikikura, kireebeka. Mwareeba? Kikaruga omu mukazi, nk'oku Yaagambire ngu kiryaba; ogundi murundi nikiruga ahari Ruhanga. Obwire obwo kikajja, nikirabira omu mukazi; ogu murundi nikija, nikirabira omu Mushaija. Mwareeba? Obwo bwire kikajja, nikirabira omu kwetenga kw'okumanyana omu mubiri kw'omushaija n'omukazi; ogu murundi nikija ahabw'Ekigambo kya Ruhanga ekyagambilwe. Mwareeba?

Aho, hati, tihariho kintu ekirikubaasa kunkora kubi. Ngaaha, sebo. Tihariho kintu kyona ekirikubaasa kutukora kubi. Paulo akagira ati, "N'obu byakuba ebantu ebiraho, ebiribaho, endwara, okufa; tihaine kirikubaasa kututaanisa n'okukunda kwa Ruhanga okuri omuri Kristo." Tihaine kintu kyona ekirikubaasa kututaanisa.

173 Nk'oku ngambire obujurizi bugufu. Ntsigaize nk'otushokyey tutaano omutwe gukaba oruhara, kyarimwe. Kandi eryo rikye nkaba nindishokoza hanu enshumi nkye ehwiringire, omukazi wangye yaagira ati, "Billy, omutwe gwawe guri haihi kubeera kimwe oruhara."

Naagira nti, "Kwonka tinkaburizeho na rimwe."

Yaabuuza ati, "Rirahi?"

Naagarukamu nti, "Rikaba rirahi ntakaritungire? Mwareeba? Hoona ahu ryabaire riri ntakaritungire."

Hati, hariho obwire bumwe, emyaka igana ehwiringire, eishokye eri rikaba ritari hanu na kakye, kwonka rikaba riri aheeru hanu omu mucuucu. Tikwo kiri? Reero nk'emyaka makumi ataano ehwiringire, ryatandika kumera aha mutwe gwangye. Rikaruga hi? Omu mucuucu. Mbwenu hati nirigaruka ahu ryarugire. Tikwo kiri? Rikaba ritariho, bwanyima ryabaho, mbwenu hati tiriraho. Niki? Owaarakozire eki riri n'oha? Ruhanga! Ngugwo aho. Akateera ekishushani, yaagira ati, "Ogwo nigwo muringo ogu Ndikumwendamu.

174 "Iwe rufu, oruburi rwawe rurahi? Ekituuro, obusinguzi bwawe burahi?" Nimubaasa kunziika hanu kimwe omuri ebi biro. Tindikumanya. Kwonka, ow'eishe-emwe, ndyaba ntafiire. Ekyo ninkibagambira. Ngaaha, sebo. Oo!

Turyazooka! Haleluya! Turyazooka!

Omuri ako kasheeshe k'okuzooka, obu emikingo ya rufu erihendagurwa,

Turyazooka! Haleluya! Turyazooka!

Tihaine ekirikubaasa kunzibira kuzooka. Tihariho baadaimoni abarikugasha okuzimu yoona abarikubaasa kunzibira kuzooka. Tihariho ekintu kyona ahantu hoona ekirikugasha kunzibira kuzooka. Nyine okuraganisa kwa Ruhanga. Nyine Omwoyo Orikwera. Nyine Zoe, Amagara ga Ruhanga Agatahwaho, gari omunda hanu. Ogu mutumbi ogwa ira gukaruga muri, reero Ruhanga yambumbatira naaruga omu itaka. Kandi Ogwo owambumbatiiire nkaruga omu itaka ku Araabe . . .

175 Ku naakuzire, hati, buri kaire ku naabaire mpurira ekide ky'ekanisa, hariho Ekintu ekyabaire kingambira, omu Karaka kakye munonga. Maraika akagamba naayema omu rushaka, yaagira ati, "Otarinywa amaarwa nari okureetsa. Nkwiniire omurimo ogu orikora. Otarishiisha omubiri gwawe, nari okuraaya n'abakazi n'ebindi." Ngaaha. Nkwiniire omurimo ogu orikora ku orikura."

"Ori Oha? Ori Oha?"

"Oryamanya bingi ahari ekyo okukiraho bwanyima." Bwanyima y'akaire kakye, ngugu hanu Yaija. Yaayemerera ahaiguru okwo aha kubatiza. Yaayeyoreka. Yaayerangirira. Yaagarukamu. Niimureeba ayeemereire okwo, hoonahoona, buri rubaju. Noosa kukora ki, ku . . .

176 Akampanga nk'oku ndi, ntaine obugabe bw'okucwamu na kakye. Tindagarukireyo okwo nkagira nti, "Hati, Charlie Branham, taasya Ella Harvey reero munzaare omu nsi."? Ngaaha, sebo. Nkaba ntaine obugabe bw'okucwamu ekyo buzima. Ekyo Ruhanga niwe yaakikozire.

Kandi ku Araabe yampangire oku ndi, nteetooraniire; buzima nikikiraho munonga, Omwoyo Orikwera ogwo yaatandika kunsangira, reero nkagira nti, "Yee, Mukama, Ori Omuhangi wangye. Ninkukunda, kandi Ninkwakiira nk'Omujuni wangye!" Noosa kungumya ota omu mucuucu? Torikubaasa kukikora, ow'eishe-emwe. Torikubaasa kukikora.

177 Ruhanga tarahangire akacweka na kamwe ka karisiyamu egi, nari potaashi, nari ekindi kintu kyona, kugira ngu ki-kife busha. "Boona abu Tata Yampaire ensi etakahangirwe, baryaija Ahariinye." Hyu! Nimpurira ndikwenda kuteera akaari; buzima kwo. "Boona abu Tata yampaire baryaija Ahariinye, kandi tihariho n'omwe aharibo oribura, kureka Ndyabazoora omu kuzooka." Nkamuhurira naayeeta, naanye naija ah'Ari. Nibabaasa bata kungumya omu mucuucu gw'ensi? Tihariho baziiki abarikumara omu nsi okunteeateera aha buso n'ekitihi,

abaakubaasa kungumya omu mucusu gw'ensi. Ekiro kimwe ndyazooka nyemerere ndi omu nshusha Ye, nyogire omu Shagama Ye, nzairwe Omwoyo We! Haleluya! Mugire ebigombe by'amadiini byanyu byona ku muraabe nimwenda; nyowe nintwara Yesu. Amiina!

178 Omushaija wa inshuwarensi akaija ahariinye. Wilbur Snyder, munywani wangye murungi. Yaagira ati, "Billy, niinyenda kukuguza inshuwarensi."

Naagira nti, "Nkaheza kugitunga." (Omukazi wangye yaareeba aha rubaju, nk'orikwenda kugira ati, "Ekyatuma waabeisha niki, mwojo 'we?")

Yaabuuza ati, "Oine inshuwarensi?"

Naagarukamu nti, "Eego, sebo."

Yaabuuza ati, "N'eya kampuni ki? N'eha?"

Naagarukamu nti, "Obuhame obuhairwe omugisha, Yesu n'owangye, oo, ka n'omurozo gw'ekitiinisa kya Ruhanga ekirija. Ndi omuhunguzi w'okujunwa, nkagurwa Ruhanga, naazaarwa Omwoyo We, naanaaba omu Shagama Ye."

Yaagira ati, "Egyo ni nungi, Billy, kwonka terikuziika omu irimbo."

Naagira nti, "Eryanyihamu." Haleluya! Tindikwemereza omutima oku nditaahamu; n'okurugamu.

179 N'ahabw'ekyo, nyine inshuwarensi erikungambira ngu, "Nindeeta. Abu Tata Yampaire boona n'Abangye." Tindikufayo eki tata yaakozire, eki maawe yaakozire, ekintu kyona ekyabaireho. "Abu Tata Ampa boona baryaija Ahariinye, kandi tihariho orikubaasa kwija Tata atamwiriize haihi." Haleluya! Ahabw'enki Yaabamanyire? "Nkabamanya ira ensi etakahangirwe. Obu naita Omwana gw'Entaama, nkagwita Nawe." Amiina. "Nkatoorana Ekanisa ira etakabaireho." Ni kintu ki ekyatoorainwe ira kitakabaireho? Ekanisa. Nootaaha ota omuri egyo Kanisa? "Ahabw'Omwoyo omwe twena tubatizibwa kuba Omubiri gumwe." Akamanya, ensi etakahangirwe, ngu turyazayo. Kandi abu Yaamanyire ira, Akabeeta. Abu Yaayetsire, nibo Yaihireho orurbanja. Abu Yaihireho orurbanja, nibo Yaaherize kuha ekitiinisa.

180 Omu Bitabo bya Ruhanga, Yaaherize kugamba ku Arimbunganayo okwo. Tihaine baadaimoni boona kuruga okuzimu abarikubaasa kubarindira ahanti hantu hoona kugira ngu babazibile kuzayo, 'habw'okuba Ruhanga yaaherize kukigamba, kandi ekyo nikimara. Ku . . . Emysaka biriyoni igana ensi etakahangirwe, enyonyoozi z'akasheeshe zikeeshongorera hamwe n'abaana ba Ruhanga baateera akaari k'okushemererwa, omusingye gw'ensi gutakateirweho. Mwareeba? Omusingye gutakateirweho . . . Kandi Baamaraika abo na buri kintu bakaba bashemereirwe, nibateera akaari ahabw'ekyo, omusingye gw'ensi gutakateirweho. Sitaane naija kungumya ata omu mucusu gw'ensi? Tarikubaasa kukikora. Ohikire.

181 Ka tureebe, hati. Obu n'obwire bw'oburingaaniza obu nyine, hanu. Nihaburaho edakiika makumi abiri kuhika shaaha itaano. Ezo n'edakiika makumi abiri zonka ezibuzireho kuhika shaaha ina. Tikwo kiri, Ow'eishe-emwe Wood? Ekyo kihikire, n'edakiika makumi abiri ezibuzireho kuhika shaaha ina. Buri omwe ashemereirwe?

Oo, nimpurira naayenda kugumizamu orugyendo,

Nimpurira naayenda kugumizamu orugyendo;

Eka yangye y'omu Iguru neeyengyengyeta kandi eboneire,

Mbwenu nimpurira naayenda kugumizamu orugyendo.

Oo, nimpurira naayenda kugumizamu orugyendo,

Nimpurira naayenda kugumizamu orugyendo;

Eka yangye y'omu iguru neeyengyengyeta kandi eboneire,

Mbwenu nimpurira naayenda kugumizamu orugyendo.

182 Nimmukunda ebyo byeshongoro ebya ira mutyo? Hakaba hariho kimwe ekya ira eki twabaire tweshongora, ekirikugira ngu, "Embabazi n'okusaasira bikanzaahuura. Aho egoy Nyonyoozi y'Akasheeshe ekaaka." Ni kiiha, Ow'eishe-emwe kazi Gertie? Ka tureebe. Bata . . . Ni kiiha, Ow'eishe-emwe Neville? Mwareeba, ekirikugira ngu, "Embabazi n'okusaasira bikanzaahuura. Aho egoy Nyonyoozi y'omu Kasheeshe Erikumurinkana ekooreka . . . ahariinye." Ahaa. Yee. "Omu musharaba." Tuhe eiraka ryakyo, ow'eishe-emwe kazi, ekirikugira ngu, Haihi N'Omusharaba. Ija hanu, Ow'eishe-emwe Neville. Oo, ebi nimbikunda. Ni bangahi abarikukunda ebyo byeshongoro ebya ira by'omwoyo? Guma n'ebyeshongoro byawé byona ebya disiko by'okugurukyeera ebi orikwenda. Mpeereza eki, "Aha niho embabazi n'okusaasira byanzaahwire." Nikyo ekyo. Kare, kurungi munonga hati.

Yesu, guma ondindire haihi n'omusharaba,

Ahu enshuro y'omuhendo eri,  
 Omugyera ogurikutambira boona, ahabwa busha,  
 Ogurukuhimintika niguruga aha rushozi Gologosa.  
 Omu musharaba, omu musharaba,  
 Nimwo nyine ekitiinisa kyangye ebiro byona;  
 Okuhitsya obu amagara gangye agaijwire okushemererwa garitunga  
 Oburuuhukiro seeri y'omugyera.

[Ow'eishe-emwe Branham yaatandika kweshongora Haihi N'Omusharaba abumbire eminwa -Omur.] Oo, ka ni kirungi! Kiteekateekyeho! Mbwenu shi kuri hatarabaireho Omujuni? Mbwenu shi kuri tutaragizire eki Kigambo? Mbwenu shi kuri Atarakwetsire? Mbwenu shi kuri Atarakumanyire ira, haza ori aheeru hanu omuri aba abandi ab'ensi ekiro eki? Noomukunda? Oo, mugyenzi! Muteebwa zaasaaviisi omu kasheeshe, hati, shaaha ishatu n'ekicweka.

Omu musharaba, omu musharaba,  
 Nimwo nyine ekitiinisa kyangye ebiro byona;  
 Okuhitsya obu amagara gangye agaijwire okushemererwa garitunga  
 Oburuuhukiro seeri . . .

183 Hati tuhe eiraka ry'ekirkugira ngu Omwanya Aha Nshuro. Eki kyeshongoro kirungi ekya ira, "Hariho omwanya aha Nshuro." Ni bangahi abarikukimanya? "Omwanya, omwanya, eego, hariho omwanya, omwanya aha Nshuro." Ku oraakikore hati, n'obucureezi bwingi, ogorore omukono gwawe, aha rubaju rwawe, reero okwate omu ngaro ow'eishe-emwe ogwo. Noomanya, hariho omwanya hati gw'Abametsodisiti boona. Hariho omwanya gw'Ababaputisiti. Hariho omwanya gw'Abapentekoote. Hariho omwanya gwaitu twena hati, aha Nshuro. Ni bangahi abarikumanya ekyo kyeshongoro ekya ira? Oo, buzima nimukimanya. Bamwe omuriimwe aba ira hati, eki n'ekyeshongoro kirungi kya Kentucky, ekya ira hati.

Omwanya, omwanya, (mukwatane omu ngaro), eego, hariho omwanya,  
 Hariho omwanya gwawe aha Nshuro;  
 Omwanya, omwanya, eego, hariho omwanya,  
 Hariho omwanya gwawe aha Nshuro.  
 Oo, omwanya, omwanya, hariho omwanya muhango,  
 Hariho omwanya gwawe aha Nshuro;  
 Oo, omwanya, omwanya, eego, hariho omwanya,  
 Hariho omwanya gwawe aha Nshuro.

184 Hati, mbainiire eky'okubatangaaza kikye. Amashomo goona amasya munonga, hamwe n'ebitabo, na buri kimwe, nibijja kuguzibwa aha rubaju ruri rw'ekanisa, saabiiti erikwija, omu ruteerane; entambi z'amaraka na buri kimwe, na byona, biri omu muringo murungi gw'ebitabo. Nihaija kuba hariho emeeza kuri aha muheru, omuri kimwe ahari ebyo bishengye. Kandi ebitabo, amashomo masya munonga, na bimwe aha bihandiikirwe birungi ebyabandize kushohora, omu bitabo bisya, ebishohoire busya, byona nibijja kuteebwaho, aha-aha muheru gw'ekyombeko, Orwakashatu oru orurikwija nyekiro.

Kandi twine ekihika ky'okugiraho o-obwire burungi omuri Mukama. Mwije, nimushaba, hati. Hati, mwete abarwaire baanyu n'abarikubonabonesibwa, mubahandiikire ebaruha. Mubareete hanu. Nituza . . . Ruhanga naaza kukora n'amaani. Kandi nitumanya ngu Naaza kukikora hati.

185 Kandi hati ngiire ahari buri muntu ou mbaire nimmanya, oine akantu kakye. Ku haraabe hariho ekintu kyona ekitari omu buteeka hati, mwijukye, nkabagambira omwanya muraingwa oguhingwire, ku twabaire nituza kikitereesa. Kandi nimmanya ngu nimumanya ku hanu hariho omwoyo gw'omutaano ogutari ogwabaire guriho. Mwareeba? Mwareeba? Nikwo kiri. Hati, mutarigureka gukarugaho bundi. Nimbeehanangiriza omu maisho ga Yesu Kristo, mutarikiriza gukarugaho. Mugumire kimwe nagwo hanu, mwareeba, mugorore buri kintu reero mugumizemu nimugyenda. Muri eishe-emwe. Takabaga ow'eishe-emwe nari ow'eishe-emwekazi okora ekintu kyona ekibi; n'ogwo mwoyo wa Sitaane otaahamu aho. Mwareeba, naaza oku n'oku. N'ahabw'ekyo saasibwa ow'eishe-emwe ogwo nari ow'eishe-emwekazi ogwo, omanye ku ni Sitaane ogiire rwagati yaabo. Ku oraabe oine oku orikukyehuriramu, kyeihemu ahonaaho, nooreeba, 'habw'okuba nikiza kukushiisha. Eego, nikiza kukushiisha.

N'ahabw'ekyo, okyetantare. Oijukye.

Hariho omwanya, omwanya, muhango,

Hariho omwanya gw'Abametsodisiti, omwanya gw'Ababaputisiti, omwanya gw'Abapuresibateeri. Hariho omwanya gwa buri omwe.

Omwanya, omwanya, eego, hariho omwanya,

Hariho omwanya gwawe aha Nshuro.

186 Ni bangahi abarikwiju ka ekyeshongoro kyaitu ekya ira ky'okusiibuurana, obwire obwo?

Twara Eiziina rya Yesu,

Iwe mwana w'obujune n'enaku;

Nirija kukuha okushemererwa kandi rikuuumurize,

Ritware hoonahoona ahu oraaze.

Nkaabaasibwa ki muguma naitwe, Ow'eishe-emwe Jeffrey, iwe n'Ow'eishe-emwekazi Jeffrey, n'abo boojo aho, hamwe n'abo boona.

Reero nitwinamira Eiziina rya Yesu,

Nitugwa turambiire aha bigyere Bye; (Oo, mugyensi!)

Omugabe w'abagabe omu Iguru nitwija Kumujweka Ekirunga,

Orugyendo rwaitu ku rurihwa.

Twara Eiziina rya Yesu,

Ritware nk'Engabo eriizooba;

Oo, ebigyezo ku birairire haihi,

Oitsye eryo Eiziina Eririkwera omu kushaba.

Oo, eryo nindikunda. Naimwe tikwo? Eryo Eiziina rirungi munonga rya Yesu! Hati, ka twemerere hati hati, twaba nitweshongora hati. Kare.

Twara Eiziina rya Yesu,

Iwe mwana w'obujune n'enaku;

Nirija . . .

[Ow'eishe-emwe Branham yaagamba n'Ow'eishe-emwe Neville -Omur.]

O ka ni rirungi!

Matsiko g'ensi n'okushemererwa kw'Eiguru;

Eiziina ry'omuhendo, (O Eiziina ry'omuhendo) O ka ni rirungi!

Matsiko g'ensi n'okushemererwa kw'Eiguru.

187 Eki kiineho omutaano kyakye hati. Ka twinikye emitwe yaitu hati, reero, tuhunamiire kimwe, ka twimutsye omukono gumwe. Tugire tuti:

Nitwinamira Eiziina rya Yesu,

Nitugwa turambiire aha bigyere Bye,

Omugabe w'abagabe omu Iguru nitwija Kumujweka ekirunga,

Orugyendo rwaitu ku rurihwa.

Eiziina ry'omuhendo, O ka ni rirungi!

Matsiko g'ensi n'okushemererwa kw'Eiguru;

Eego, Eiziina ry'omuhendo, O ka ni rirungi!

Matsiko g'ensi n'okushemererwa kw'Eiguru.

Tukiinikire emitwe yaitu, nitugamba . . . [Ow'eishe-emwe Branham yaatandika kweshongora, Twara Eiziina Rya Yesu abumbire eminwa -Omur.]



[www.messagehub.info](http://www.messagehub.info)

Obutumwa obu bukabuurirwa  
**William Marrion Branham**  
“... omu biro by'eiraka ...” Kush 10:7